

***Akazi wiko Zuta wanuwhawete romo***

52 Zuzapa Zuta wanuwhawete romo heko mehe 17 haw kwarahy rehe Akazi Akaw ta'yr wiko Izaew wanuwhawete romo kury. Umumaw mokoz kwarahy Xamari pe tuwhawete romo wiko pà. 53 Uzapo ikatu 'ym ma'e Tupàn henataromo. Nuzawy kwaw u Akaw a'e, iaiw ma'e iapo mehe a'e.

Nuzawy kwaw uhy Zezamew no, iaiw ma'e iapo mehe no. Nuzawy kwaw tuwhawete Zeromoàw no, iaiw ma'e iapo mehe no. Zeromoàw uzapo kar ikatu 'ym ma'e Izaew wanupe a'e. 54 Akazi umuwete katu tupàn Ma'aw her ma'e. Nuzawy kwaw u a'e, Tupàn Tuweharupi Wiko Ma'e Izaew wazar imuikwahy kar pà a'e.

**2 TUWIHAWETE WÀ*****Eri, tuwhawete Akazi no***

1 1 Akaw Izaew wanuwhawete imàno re Moaw izuapypyr uzàmàtyry'ym Izaew wà a'e wà kury.

2 Tuwhawete Akazi a'e, Akaw hekuzaromo tuwhawete romo wiko ma'e kwer a'e, u'ar wàpuzuhu Xamari pe har apyr ywyttàma'e wi. Ima'eahy u'ar ire. Hahy tetea'u. A'e rupi omono kar amo uzehe we har tupàn ua'u Ma'awzemu pe wà kury. Tawhu Piri ywy rehe har waneko haw Akerom her ma'e pe har wazar romo hekon Ma'awzemu. — Epuranu hehe nehe. — Aipo Akazi ikatu putar u'ar awer wi a'e nehe, peze izupe nehe, i'i wanupe. 3 Amo Tupàn Tuweharupi Wiko Ma'e reko haw pe har uze'eg Tupàn ze'eg imume'u har Xizime pe har Eri her ma'e pe a'e kury. — Ezàwàxi tuwhawete Akazi ze'eg heraha har ne wà nehe. Epuranu wanehe nehe. — Mâràzàwe tuwe peho peiko Ma'awzemu Akerom pe har wazar rehe pepuranu pà, ere wanupe nehe. — Aipo naheta kwaw Tupàn Izaew ywy rehe. 4 Peze'eg peho tuwhawete pe nehe, ere wanupe nehe. — Nanekatu kwaw nehe. Nuke'e kwaw neperew awer nehe. Eremàno putar nehe, i'i Tupàn Tuweharupi Wiko Ma'e iko newe, peze tuwhawete pe nehe, ere wanupe nehe, i'i Tupàn reko haw pe har Eri pe. Weruzar Eri Tupàn ze'eg. 5 Na'e uzewyr a'e awa tuwhawete heko haw pe wà. Upuranu wanehe a'e. — Mâràzàwe tuwe pezewyr pezuwà ra'e, i'i wanupe.

6 Uwazar ize'eg wà.

— Amo awa ureàwàxi urewe uze'eg pà a'e. — Pezewyr pezar pe peze'eg pà nehe, i'i urewe. — Tupàn pepuranu kar tuwhawete rehe a'e. — Mâràzàwe tuwe eremono kar neze'eg heraha har Ma'awzemu Akerom pe har wazar pe wamuze'eg kar pà ne wà, i'i Tupàn iko newe, i'i urewe a'e, i'i tuwhawete pe wà. — Aipo naheta kwaw Tupàn Izaew ywy rehe a'e. Nuke'e kwaw neperew awer nehe. Eremàno putar nehe, i'i iko newe, i'i Eri urewe, i'i ze'eg heraha har tuwhawete pe wà.

7 — Ma'e hexakaw wereko a'e awa peme uze'eg ma'e kwer a'e, i'i tuwhawete wanupe.

8 Uwazar ize'eg wà.

— Umunehew kamir puhuz ma'ea'yr pirer iapo pyrer a'e. Uzàpixipixi uku'aw har ma'ea'yr pirer pupe no, i'i izupe wà. — Eri Tupàn ze'eg imume'u har Xizime pe har hekon a'e, i'i tuwhawete.

9 A'e rupi uze'eg amo tuwhaw uzehe we har pe. — Eraha 50 zauxiapekwer Eri ipyhyk pà ne wà nehe, i'i izupe. Oho hekar pà wà. Na'e tuwhaw wexak Eri amo ywytyr apyr iapyk mehe. — Awa Tupàn hemiruze'eg, i'i izupe. — Tuwhawete nemuezyw kar iko a'e wi a'e, i'i izupe.

10 Uwazar Eri tuwhaw ize'eg izupe.

— Aze awa Tupàn hemiruze'eg romo aiko, tuwe tata u'ar ywak wi nezuka pà zauxiapekwer nerehe we har wazuka pà nehe, i'i Eri izupe. A'e 'ar mehe we u'ar tata ywak wi a'e tuwhaw izuka pà a'e, hehe we har zauxiapekwer wazuka pà a'e no.

**11** A'e ma'e imume'u haw henu mehe tuwiawete omono kar amo tuwiawete 50 zauxiapekwer wanupi kury. Uzeupir ywytyr rehe Eri pe uze'eg pà. — Awa Tupàn hemiruze'eg. — Tuwiawete nemuezyw kar iko a'e wi tártyka'i a'e, i'i izupe.

**12** Uwazar Eri ize'eg.

— Aze awa Tupàn hemiruze'eg romo aiko, tuwe u'ar tata ywak wi nezuka pà nehe, zauxiapekwer nerehe we har wazuka pà nehe no, i'i izupe. A'e 'ar mehe we tata Tupàn wi ur ma'e kwer wezyw ywak wi a'e tuwiawaw izuka pà, zauxiapekwer wazuka pà no.

**13** Omono kar wi tuwiawete amo tuwiawete 50 zauxiapekwer wanupi izupe. Uzeupir ywytyr rehe. Wapyk upenàràg rehe Eri henataromo ma'e henoz pà izupe. — Awa Tupàn hemiruze'eg, i'i. — Aze ikatu newe, hezuka zo pe nehe. Ezuka zo ko 50 awa ne wà nehe. **14** Tata ywak wi u'ar ma'e kwer uzuka amogwer mokoz tuwiawete wà, uzuka amogwer zauxiapekwer tuwiawete wanuhe we har wà no. Hepuhareko pe nehe. Hezuka kar zo nehe, i'i izupe.

**15** Na'e uze'eg Tupàn reko haw pe har Eri pe kury. — Ewezyw hupi nekyze 'ym pà nehe, i'i. A'e rupi oho Eri a'e tuwiawete rupi tuwiawete pe uze'eg pà kury. **16** Henataromo uhem mehe uze'eg izupe. — Tupàn Tuweharupi Wiko Ma'e uze'eg iko newe nezewe a'e kury. — O tuwiawete, i'i newe. — Naheta kwaw Tupàn Izaew ywy rehe a'e, ere nepy'a pe. Ereiko herehe useruzar 'ym ma'e ài tuweharupi ne. — A'e rupi naheta kwaw hepuranu haw iwazar àràm ihewe, ere nepy'a pe. A'e rupi eremono kar teko Ma'awzemu Akerom wazar rehe wamupuranu kar pà ne wà. A'e rupi nanekatu kwaw nehe. Eremàno putar nehe, i'i Tupàn newe, i'i Eri tuwiawete pe.

**17** Na'e umàno Akazi Tupàn Tuweharupi Wiko Ma'e ze'eg Eri pe imume'u pyrer rupi katete. Nata'yr kwaw Akazi. A'e rupi tywyr Zoràw wiko hekuzaromo tuwiawete romo a'e kury. A'e ma'e uezapo Zeoràw Zuzapa ta'yr Zuta wanuwihawete romo heko mehe.

**18** Amo umuapyk amogwer tuwiawete Akazi hemiapo kwer paw pape Izaew

wanuwihawete wanemiapo kwer her ma'e rehe.

### **Tupàn weraha Eri ywak rehe a'**

**2** <sup>1</sup>— Arur putar Eri xe hereko haw pe ywytyr uwauwakahy ma'e pupe ihe nehe, i'i Tupàn Tuweharupi Wiko Ma'e uzeupe amo 'ar mehe. Na'e uhem etea'i izeupir haw 'ar kury. Uhem Eri Ziwkaw tawhu wi Erizew rupi. **2** Pe rupi wata mehe Eri uze'eg Erizew pe. — Epyta xe nehe, ta'e Tupàn Tuweharupi Wiko Ma'e hemono kar iko Metew tawhu pe a'e xe, i'i izupe. Uze'eg Erizew izupe. — Amume'u putar ko ma'e Tupàn Tuweharupi Wiko Ma'e henataromo kury, nerendaromo no. — Nurezar kwaw ihe nehe, i'i izupe. A'e rupi oho hupi Metew pe. **3** Amo Tupàn ze'eg imume'u har a'e pe wiko ma'e uze'eg oho Erizew pe wà kury. Upuranu hehe wà. — Kutàri Tupàn Tuweharupi Wiko Ma'e weraha putar nemu'e har muitea'u newi a'e nehe. Aipo erekwaw heraha àwàm ne, i'i izupe wà. — Akwaw ihe. Zaze'eg zo hehe nehe, i'i Erizew wanupe.

**4** Na'e uze'eg Eri Erizew pe. — Epyta xe kury, ta'e Tupàn Tuweharupi Wiko Ma'e hemono kar iko Zeriko tawhu pe a'e xe, i'i izupe. — Amume'u putar ko ma'e Tupàn Tuweharupi Wiko Ma'e henataromo kury, nerendaromo no. — Nurezar kwaw ihe nehe, i'i izupe. A'e rupi oho hupi Zeriko pe.

**5** Amo Tupàn ze'eg imume'u har a'e pe har uze'eg oho Erizew pe wà. Upuranu hehe wà. — Tupàn Tuweharupi Wiko Ma'e weraha putar nemu'e har muitea'u newi a'e nehe. Aipo erekwaw heraha àwàm ne, i'i izupe wà. — Akwaw ihe. Zaze'eg zo hehe nehe, i'i wanupe.

**6** Na'e uze'eg Eri Erizew pe. — Epyta xe kury, ta'e Tupàn Tuweharupi Wiko Ma'e hemono kar yrykaw Zotàw pe a'e xe, i'i izupe. — Amume'u putar ko ma'e Tupàn Tuweharupi Wiko Ma'e henataromo kury, nerendaromo no. — Nurezar kwaw ihe nehe, i'i. A'e rupi uhem oho a'e wi wà. **7** Amo 50 Tupàn ze'eg imume'u har oho wanaikweromo yrykaw Zotàw pe wà. Eri a'e, Erizew a'e no,

upytu'u wata re yrykaw huwake a'e wà kury. A'e Tupàn ze'eg imume'u har ume'e 'äm wanehe muitea'u wanuwi wà. **8** Na'e wenuhem Eri ukamirpuku kury, iwaiwàn pà kury. Na'e unupà 'y ipupe. 'Y uzewàpytymawok wanenataromo. Wahaw ywy uxinig ma'e rehe uwyrkyk pà kury. **9** Na'e uze'eg Eri Erizew pe. — Tupàn hereraha putar xe wi newi a'e nehe. A'e ym mehe we enoz wyzài ma'e ihewe nehe, i'i izupe. — Emur nekàgaw mokoz haw imuhua'u kar pyrer ihewe nehe, i'i izupe.

**10** — Zawaiw katu a'e ma'e newe heremimono ràm. Aze herexak pe muite pe hereraha pà nehe, erepyhyk putar a'e ma'e nehe. Aze naherexak kwaw pe nehe, nerepyhyk kwaw nehe, i'i Eri izupe.

**11** Nezewé wata oho waiko uzeupeupe uze'eze'eg pà wà. Na'arewahy amo tata ywyramawa romo iapo pyrer ur wamyster pe kury. Tata kawaru romo iapo pyrer umuàzan a'e ywyramawa wà. Amo ywytu uzwewara ma'e weraha Eri ywak rehe kury. **12** Wexak Erizew heraha mehe. Uhapukaz kury. — Heru, heru, i'i izupe. — Awyzeharupi nerezawy kwaw zauxiapékwer tetea'u ne wà. Erepyro Izaew wàmàtytry'amar wanuwi ne wà, i'i izupe. A'e re nuekak wi pixik kwaw. Uzemumikahy kury. Umu'i ukamirpuku mokoz ipehegwer romo.

**13** Eri kamirpuku kwer u'ar huwake. A'e rupi upyhyk hupir pà kury. Uzewyr Zotàw yrykaw pe. Upytu'u a'e pe. **14** Na'e unupà 'y ukamirpuku kwer pupe. Uze'eg uzeupe. — Ma'e pe hekon Tupàn Tuweharupi Wiko



Ma'e Eri izar a'e, i'i uzeupe. Na'e unupà 'y kury. Uzepe'a kury. Wahaw yrykaw oho kury.

**15** A'e 50 Tupàn ze'eg imume'u har Zeriko tawhu pe har wexak a'e ma'e izeapo mehe wà. A'e rupi uze'eg nezewé wà. — Eri ikàgaw Erizew rehe hin a'e kury, i'i uzeupeupe wà. A'e rupi uwàxi oho wà. Wapyk upenàràg rehe henataromo wà. **16** — Ure xe wiko ma'e ure, uruiko 50 awa ikàg ma'e romo ure. Tuwe oroho nemu'e har hekar pà ure nehe. Aze ru'u Tupàn Tuweharupi Wiko Ma'e hekwe weraha amo ywytyr rehe a'e. Aze ru'u weraha amo ywyapyznaw pe a'e, i'i izupe wà. — Nan, i'i wanupe. — Peho zo nehe, i'i wanupe.

**17** Wenoz wi wi oho àwàm izupe wà. A'e rupi omono kar wà. A'e 50 awa umumaw na'iruz 'ar Eri hekar pà ywy nànàm wà. Nuexak kwaw wà. **18** A'e rupi uzewyr Zeriko pe wà. Erizew wàro iko a'e pe a'e wà. Uze'eg wanupe. — Peho zo, a'e peme ihe, i'i wanupe.

### ***Erizew umukatu 'y a'e***

**19** Amo awa Zeriko pe har uze'eg oho Erizew pe wà. — Erekaww 'aw tawhu ikatu haw ne. Xo 'y xe har zo na'ikatu kwaw. Aze kuzà ipuru'a ma'e u'u wà, uzuka umemyr wie pe har wà, i'i izupe wà.

**20** Uze'eg Erizew wanupe. — Pemono xa pixika'i amo kawaw ipyahu ma'e rehe ihewe herur pà nehe, i'i wanupe. Weraha izupe wà.

**21** Na'e oho Erizew ytyzuzàmaw pe xa imomor pà 'y pupe kury. — Tupàn Tuweharupi Wiko Ma'e uze'eg iko nezewé peme. — Amukatu 'aw 'y kwez ihe kury. Nupuruzuka kwaw nehe kury. Kuzà nuzuka kwaw umemyr wie pe har i'u pà wà nehe, i'i iko peme, i'i Erizew teko wanupe.

**22** A'e rupi a'e 'y ikatu. Te ko 'ar rehe ikatu Erizew ze'eg rupi katete.

### ***Kwàkwàmo uze'eg urywahyahy wà***

**23** Uhem Erizew Zeriko wi Metew pe oho pà. Wata oho iko pe rupi. Amo kwàkwàmo amo tawhu wi uhem ma'e kwer uzypyrog hehe uze'eg urywahyahy pà wà kury. — Eho xe wi nehe, iapyterew ma'e, i'i izupe wà.

**24** Uwak Erizew uzeaikwerexak pà kwàkwàmo wanehe ume'egatu pà kury. Umu'ar kar Tupàn Tuweharupi Wiko Ma'e ze'egaiw kwàkwàmo wanehe. Na'e mokoz zàwàruhu uruxu her ma'e uhem ka'a wi wà kury. Upe'i'ài'ág kwàkwàmo wà. Heta 42 ipei'i'ág pyrer wà.

**25** A'e wi oho Erizew ywytyr Karamew pe. A'e re uzewyr Xamari pe.

### Izaew uzàmàtyry'ym Moaw oho wà

**3** <sup>1</sup>Zuzapa Zuta wanuwhawete romo heko mehe 18 haw kwarahy rehe Zoràw Akaw ta'yr wiko Izaew wanuwhawete romo kury. Umumaw 12 kwarahy Xamari pe tuwhawete romo wiko pà. <sup>2</sup>Uzapo ikatu 'ym ma'e Tupàn Tuweharupi Wiko Ma'e pe. Nezewe rehe we nuiko kwaw u zàwe. Nuiko kwaw uhy Zezamew zàwe. Zoràw weityk Ma'aw hagaw paw u hemiapo kwer a'e. Teko umuwete Ma'aw a'e hagapaw wà. Tuwhawete weityk kury. <sup>3</sup>Amo ae ma'e iapo mehe wiko tuwhawete Zeromoàw Nemat ta'yr zàwe. Uzapo kar ikatu 'ym ma'e Izaew wanupe Zeromoàw zàwe. Nupytu'u kwaw a'e ma'e iapo re wà.

**4** Tuwhawete Mez Moaw ywy rehe har umugakwaw àràpuhàràn a'e wà. Kwarahy nànàñ omono ma'e Izaew wanuwhawete pe. Omono kar 100 miw àràpuhàràn izupe wà. Omono kar 100 miw àràpuhàràn wanawer izupe no. **5** Tuwhawete Akaw imàno re Mez uzàmàtyry'ym Izaew wà kury. **6** A'e rupi tuwhawete Zoràw uhem na'arewahy Xamari wi zauxiapekwer wamono'ono'og pà kury.

**7** Omono uze'eg Zuzapa Zuta wanuwhawete pe. — Moaw izuapyapyr wanuwhawete hèàmàtyry'ym iko a'e kury. Aipo neho wer herupi Moaw waàmàtyry'ym pà ne, i'i izupe. Uwazar tuwhawete Zuzapa iz'e'eg izupe. — Aha putar nerupi nehe. Ihe ihe, zauxiapekwer heremiruze'eg a'e wà no, hereimaw kawaru a'e wà no, uzapo putar neremipaò kàràm a'e wà nehe. **8** Ma'enugar pe rupi zaha putar wàmàtyry'ym pà zane nehe, i'i izupe. — Zaha putar pe ywyxiguhu Enom her ma'e rupi har rupi nehe, i'i Zoràw izupe.

**9** Nezewe mehe tuwhawete Zoràw a'e, Enom wanuwhawete a'e no, Zuta wanuwhawete a'e no, wata oho a'e wi wà kury. Umumaw 7 'ar wata pà wà. Na'e upaw 'y. Naheta kwaw 'y ni awa wanupe ni waneimaw warna'e heraha har wanupe no.

**10** Na'e tuwhawete Zoràw uze'eg kury. — Zàmàno putar nehe. Tupàn Tuweharupi Wiko Ma'e zanemono e Moaw wanuwhawete pe a'e, i'i wanupe.

**11** Tuwhawete Zuzapa upuranu wanehe. — Aipo heta amo Tupàn ze'eg imume'u har ko ywy rehe. Aze heta nehe, zapuner Tupàn Tuweharupi Wiko Ma'e rehe zanepuranu haw rehe iz'e'eg imume'u har pe zaneze'eg pà nehe, i'i wanupe. Amo zauxiapekwer wanuwhawete Zoràw rehe we har uwazar waze'eg kury. — Erizew Xapa ta'yr wiko ko ywy rehe. Eri ipytywà arer romo hekon a'e, i'i wanupe.

**12** — Tupàn ze'eg imume'u har romo hekon. Umume'u xo Tupàn Tuweharupi Wiko Ma'e hemimume'u kar zo a'e, i'i tuwhawete Zuzapa wanupe. A'e rupi a'e tuwhawete uze'eg oho Erizew pe wà. **13** Uze'eg Erizew Izaew wanuwhawete pe. — Naiko kwaw Tupàn ze'eg imume'u har romo newe ihe. Neru a'e, nehy a'e no, wikuwe mehe upuranu amo tupàn a'u'a u ze'eg imume'u har wanehe wà. Ne echo wanupe kury, wanehe nepuranu pà kury, i'i Erizew Izaew wanuwhawete pe. Uze'eg Zoràw izupe. — Nan ty. Ure na'iruz tuwhawete ure. Tupàn Tuweharupi Wiko Ma'e uremono Moaw wanuwhawete pe a'e, i'i izupe.

**14** — Amume'u putar ko ma'e Tupàn Tuweharupi Wiko Ma'e ikàg wera'u ma'e henataromo kury. Aze mo namuwete katu nerehe we har Zuzapa Zuta wanuwhawete ihe, nazekaiw iwer mo nerehe ihe. **15** Perur amo zegar haw kwaw par xe ihewe kury, i'i wanupe. A'e awa umupu uwioràwiràñ kury. Imupu mehe Tupàn Tuweharupi Wiko Ma'e hekwe ur Erizew rehe kury, imuze'eg kar pà kury. Uze'eg wanupe. **16** — Uze'eg Tupàn Tuweharupi Wiko Ma'e iko nezewe a'e. — Pezapo ywykwar

tetea'u ywy 'aw yrykaw izywyr har rehe nehe. **17** Ta'e napexak kwaw àmàn nehe. Ni ywytu nur kwaw nehe. Nezewe rehe we 'aw yrykaw iho haw tynehem putar 'y pupe nehe. A'e mehe heta tetea'u putar 'y peme nehe, peneimaw tapi'ak wanupe nehe no, peneimaw pema'e heraha har wanupe nehe no, i'i Tupàn iko peme, i'i Erizew wanupe.

**18** Uze'eg wi wi Erizew wanupe. — Nazawaiw kwaw a'e ma'e iapo haw Tupàn Tuweharupi Wiko Ma'e pe. Umur putar Moaw izuapyapyr waneityk àwàm peme a'e nehe no. **19** Pepyhk putar waneko haw tawhu ikatu wera'u ma'e pezeupe nehe. Tawhu pàrirogaw aiha ma'e hereko har pepyhk putar nehe no. Pemonohok putar ma'e'yw waiwy rehe har paw nehe no. Pewàptym putar 'ytyzuzàmaw waiwy rehe har paw nehe no. Pemuaiw putar wako paw nehe no. Pepyk putar wako paw ita pupe nehe no, i'i wanupe.

**20** Iku'egwer pe ku'em mehe, ma'e'yal'r hapy haw 'or mehe, uwryyk 'y Enom ywy wi kury. Upyk 'y a'e ywy kury.

**21** Moaw izuapyapyr ukwaw a'e na'iruz tuwihawete wanur awer wà. — Zaneàmàtyry'ym putar wà nehe, i'i uzeupeupe wà. A'e rupi wenoz wyzài awa zéamàtyry'ymawhu kwaw par a'e wà kury: awa tua'luez ma'e wà, kwàkwàmo wà no. Omono kar a'e awa paw zéamàtyry'ymawhu ràm huwake wà kury. **22** Iku'egwer pe upu'äm wà. Kwarahy uhypate katu 'y rehe. Umupiràg a'e 'y. A'e rupi nuzawy kwaw tuwykwer. **23** A'e rupi uhapukaz wà. — Tuwykwer aipo pa. Azeharomoete a'e na'iruz tuwihawete uzeàmàtyry'ry'y'm uzezukazuka pà wà. Xipyhk wama'e waker haw heityk pyrer zane nehe kury, i'i uzeupeupe wà.

**24** A'e rupi oho Moaw Izaew waker haw huwake wà. Na'arewahy Izaew ur wakutyr wà kury, waàmàtyry'ym pà wà kury. Umuzàn kar wà. Uzàn Izaew Moaw wanaikweromo wà. Uzukazuka oho waiko wazàn mehe wà. **25** Weityk waneko haw tawhu wà. Aze ukwaw amo wako rupi wà, Izaew pitàitágatu weityk amo ita a'e ko rehe wà. Nezewe mehe upyk wako paw ita pupe

wà. Uwàptym ytyzuzàmaw paw wà no. Omonohok ma'e'yw paw wà no. Iahykaw rehe heta we xo pitài tawhu Kir-Erez her ma'e zo. Na'e zauxiapekwer ita imomor har umàmè oho izywyr wà. Uzàmàtyry'ym wà.

**26** Moaw wanuwiawete wexak wemiaihu wazuka etea'i haw. Omono'og 700 zauxiapekwer takihepu hereko har wà kury. Uzeagaw wàmàtyry'ymar wanupi uhem pà wà. Ta'e izàn wer Xir wanuwiawete huwake oho pà wà xe. Nupuner kwaw wanupi oho haw wà. **27** Na'e uphyk wa'yr ipy kury. Umuigo kar mo tuwihawete romo wekuzaromo. Uzuka wa'yr kury, tupàn Moaw wazar henataromo kury, tawhu ipàrirogaw 'aromo kury. Izaew ukyze katu hexak mehe wà. A'e rupi uhem a'e wi weko haw pe oho pà wà kury.

### *Erizew uptyywà amo kuzà imen umàno ma'e kwer hemetarer 'ym ma'e*

**4** **1** Amo kuzà a'e, amo Tupàn ze'eg imume'u har umàno ma'e kwer hemireko kwer romo hekon a'e. Amo 'ar mehe uze'eg oho Erizew pe kury. — Hemen umàno a'e. Awa Tupàn Tuweharupi Wiko Ma'e wi ukyze ma'e romo hekon wiko mehe. Erekaw heko awer. Wikuwe mehe unewer amo temetarer amo pe. Imàno re a'e awa ur ihewe kury. Ipureraha wer mokoz hememyr wanehe ihewi a'e. Umuigo kar putar hememyr uma'erek e ma'e romo hemen umàno ma'e kwer inewer awer hekuzaromo a'e nehe, i'i kuzà Erizew pe.

**2** Upuranu Erizew hehe. — Ma'e apuner iapo haw rehe newe. Ma'e heta neràpuz me, i'i izupe. — Naheta kwaw ma'e ihewe. Xo uri kawer pitài zutahyky'a por zo heta, i'i kuzà Erizew pe.

**3** — Eze'eg echo neràpuz huwake wiko ma'e pe kury. — Pemur y'a tynehem 'ym ma'e tetea'u ihewe kury, ere wanupe nehe. **4** A'e re eixe neràpuz me nememyr wanupi nehe. Pewàptym uken nehe. A'e re pezypyrog uri kawer hakook pà y'a pupe nehe. Aze amo tynehem nehe, pemunyryk nehe, i'i izupe.

**5** Na'e oho kuzà wàpuz me umemeyr wanupi. UWàptym uken. Upyhk a'e zutahyky'a zany

uri kawer hereko har kury. Uzypyrog imono pà y'a pupe. Imemyr werur amo y'a izupe wà. Umynehem a'e. Na'e werur amo y'a izupe wà no. Umynehem a'e no. **6** Y'a paw tynehem mehe upuranu wanehe kury.  
— Heta we amo y'a, i'i wanupe.  
— Ximynehem iahykaw rehe har kwez kury, i'i imemyr izupe. Na'e uri kawer upytu'u uwyrk ire kury. **7** Oho kuzà a'e ma'e imume'u pà Erizew pe. Na'e uze'eg kuzà pe. — Eme'eg a'e uri kawer paw nemen inewer awer paw imekuzar pà nehe. Heta we putar temetarer ikurer nehe. Erepuner temi'u ime'eg kar pà ma'e ime'eg kar pà nezeupe nehe, nememyr wanupe nehe no. Pepuner putar peneko haw rehe nezewe nehe, i'i izupe.

### *Erizew oho Xunez tawhu pe*

**8** Amo 'ar mehe oho Erizew tawhu Xunez her ma'e pe. Amo kuzà hemetarer katu ma'e wiko a'e pe. Wenoz kuzà Erizew umai'u haw pe. A'e 'ar henataromo Xunez pe oho nànàn umai'u Erizew hàpuz me a'e. **9** Uze'eg kuzà umen pe. — Ko awa xe tuweharupi ur ma'e a'e, wiko awa Tupàn pe uzemonokatu ma'e romo a'e. Akwaw heko haw ihe. **10** Xiapo amo ipuyaikaw pyrer pixika'i ma'e zaneràpuz 'aromo nehe. Ximono amo ma'e a'e pe nehe. Tupaw, ywyrapew, tenaw, tatainy. Nezewe mehe aze ur xe zanepyr nehe, upuner a'e pe weko haw rehe nehe, i'i izupe.

**11** Amo 'ar mehe uzewyr Erizew Xunez pe. Uzeupir uker haw pe upytu'u pà kury. **12** Uze'eg Erizew uzehe we har Zeazi her ma'e pe. — Enoz tâpuz zar kuzà eho kury, i'i izupe. Oho henoz pà. Ur kuzà a'e pe. **13** Uze'eg wi Erizew Zeazi pe. — Epuranu hehe kury.  
— Ma'e apuner iapo haw rehe izupe ima'erekò awer paw imekuzar pà nehe. Ta'e uzekaiw katu zanerehe a'e xe. Aze uputar, aze'eg putar tuwhawete pe hehe nehe. Aze'eg putar zauxiapékwer wanuwihaw pe hehe nehe, i'i izupe. Upuranu Zeazi kuzà rehe. Uwazar kuzà iz'eleg kury. — Heremimutar paw heta xe ihewe heremaihu wainuromo, i'i izupe.

**14** Upuranu wi Zeazi rehe. — Ma'e apuner iapo haw rehe izupe, i'i izupe. Zeazi uwazar iz'eleg. — Na'imemyr kwaw a'e. Imen tua'uhez, i'i Zeazi izupe.

**15** — Erur xe kury, i'i Erizew izupe. Zeazi werur kuzà izupe kury. Kuzà upyta ukenaw huwake. **16** Na'e uze'eg Erizew izupe.  
— Amo kwarahy rehe ko zahy rehe eremuapyk putar amo nememyr ne'uwar rehe nehe, i'i izupe. Uze'egahy kuzà izupe.  
— Neremu'em zo ihewe 'y. Awa Tupàn pe imonokatu pyrer romo ereiko 'y, i'i kuzà izupe.

**17** Uzeapo ma'e Erizew ze'eg rupi katete a'e. Kwarahy rehe 'ar imume'u pyrer rehe imemyrak kar a'e. Awa a'e.

**18** Amo kwarahy pawire arozràn ipo'o haw 'ar rehe imemyr awa uhem oho u huwàxi mà. Tu wiko ko pe arozràn ipo'o har wanehe we.

**19** Na'arewahy uzypyrog u pe uhapukaz pà kury. — Az. Heàkagahy tuwe ihe, i'i izupe. Uze'eg tu amo uma'erekò ma'e pe. — Eraha kwarer ihy pe kury, i'i izupe.

**20** Uma'erekò ma'e upir kwarer heraha pà ihy heko haw pe. Upyta a'e pe umemyr u'uwar rehe ipyhyk pà. Te kwarahy wapyter pe uhem kury. Na'e umàno kwarer kury.

**21** Na'e weraha umemyr hetekwer Erizew ker haw pe. Omono hupaw rehe. A'e re uhem a'e wi uken iwàpptym ire. **22** Na'e wenoz umen imuwa kury. — Erur kar amo zumen amo uma'erekò ma'e pe kury. Ta'e aze'eg putar aha Tupàn ze'eg imume'u har Erizew pe ihe nehe 'y. Na'arewahy azewyr putar nehe, i'i izupe.

**23** Upuranu imen hehe. — Mâràzàwe tuwe ereze'eg putar eho izupe kutàri nehe. Ni pytu'u haw 'ar ni zahy pyahu rehe zanemynykaw 'ar kutàri, i'i wemireko pe.  
— Ikatu nezewe rehe we, i'i umen pe.

**24** — Pemono ikupe pe har hehe nehe kury, i'i uma'erekò ma'e pe. — Emuata kar zumen na'arewahy nehe. Aze amupytu'u kar newe nehe, xo a'e mehe zo emupytu'u kar zumen nehe, i'i kuzà a'e uma'erekò ma'e pe.

**25** Nezewe mehe uhem weko haw wi Karamew ywytyr pe Erizew heko haw pe oho

pà kury. Muitea'i a'e wi heko mehe we wexak Erizew kuzà ihm etea'i mehe. Uze'eg uma'erek ma'e Zeazi pe. — Eme'e ty. Kuzà Xunez pe har ur iko pe pe kury. **26** Ezàn eho hexak pà. Epuranu hehe. — Nekatu aipo. Nemen ikatu a'e no. Nememyr ikatu a'e no, ere izupe nehe, i'i izupe. Uze'eg kuzà Zeazi pe. — Ikatu paw rupi wà, i'i izupe. **27** Erizew heko haw pe uhem mehe wapyk upenàràg rehe henataromo ipy iwàiwàn pà uzywa rehe. Ipurupyro wer kuzà rehe a'e wi. Erizew uze'eg. — Tuwe rihi ty. Aipo nerexak kwaw ko kuzà izemumikahy haw. Tupàn Tuweharupi Wiko Ma'e numume'u kwaw ma'e ihewe. Mâràzàwe tuwe uzemumikahy, i'i Erizew izupe.

**28** Na'e uze'eg kuzà Erizew pe. — Hezar. Naenoz kwaw hememyr ràm newe a'e 'ar mehe ihe. — Neremu'em zo ihewe, a'e newe a'e mehe, i'i izupe.

**29** Uwak Erizew Zeazi pe uze'eg pà. — Ezemuàgà'y'm ty. Epyhyk ywyra hepokokaw kury. Eho kury. Epytu'u zo teko neremiàxi ràm pe neze'eg pà nehe. Aze amo uze'eg newe nehe, epytu'u zo izupe neze'eg pà nehe. Eho kwarer pe nepytu'u 'ym pà nehe. Emono ywyra hepokokaw hetekwer 'ar romo nehe, i'i izupe.

**30** Uze'eg kuzà Erizew pe. — Amume'u putar ko ma'e Tupàn Tuweharupi Wiko Ma'e henataromo nehe, nereneratromo nehe no. Nurezar kwaw xe ihe nehe, i'i izupe. A'e rupi upu'äm Erizew hupi oho pà kury.

**31** Oho Zeazi wanenataromo uhem pà a'e pe. Omono ywyra pokokaw kwarer hetekwer 'aromo. Na'ikuhem kwaw kwarer. Nuzapo kwaw ma'e wekuwe haw hexak kar pà. A'e rupi uzewyr Zeazi Erizew huwàxi pà izupe uze'eg pà kury. — Nukweraw kwaw kwarer, i'i izupe.

**32** Uhem Erizew a'e pe kury. A'e zutuya'i wiixe uker haw pe. Wexak kwarer umàno ma'e kwer upaw rehe i'aw mehe.

**33** Uwàptym uken kury. Uze'eg Tupàn Tuweharupi Wiko Ma'e pe. **34** A'e re u'aw kwarer 'aromo uzuru imono pà kwarer zuru

rehe, weha imono pà kwarer reha rehe, opo imono pà kwarer ipo rehe. Hehe i'aw mehe kwarer hetekwer uzypyrog haku pà. **35** Upu'äm Erizew. Wata ker haw pupe. Kwe rupi, ko rupi, kwe rupi, ko rupi. A'e re uzewyr kwarer 'aromo u'aw pà. Na'e kwarer iàxàxàm 7 haw kury. Ume'e kury. **36** Na'e wenoz Erizew Zeazi kury. — Enoz ihy imuwa ty, i'i izupe. Kuzà a'e pe heixe mehe uze'eg Erizew izupe. — Epyhyk nememyr, i'i izupe.

**37** U'ar kuzà Erizew ipy huwake. Umuhyk uwa ywy rehe. A'e re upyhyk umemyr. Uhem a'e wi.

### *Heta ipuruzuka haw temi'u inuromo, i'i wà*

**38** Amo 'ar rehe nuhyk kwaw temi'u a'e ywy rehe teko wanupe. Uzewyr Erizew Ziwkaw pe. Umu'e amo Tupàn ze'eg imume'u har a'e pe har iko wà. Na'e uze'eg uma'erek ma'e pe. — Emuapyk zapepohu tata rehe kury. Emupupur temi'u tetea'u urewe kury, i'i izupe.

**39** Pitài Tupàn ze'eg imume'u har uhem oho ka'a pe taz zàwenugar hekar pà wemi'u inuromo ràm romo. Wexak amo kuraw a'e pe. I'a iro. Opo'o i'ak kwer ukamirpuku pupe imono'og pà. Tynehem ikamirpuku. Na'e uzewyr weko haw pe. Upe'i'ài'ág a'e ma'e a kwer zapepohu pupe imomor pà. Nukwaw kwaw a'e ma'e a her. **40** Izyw mehe omono imupupur pyrer amogwer awa wanupe. Uzypyrog i'u pà wà. Na'arewahy uhapukaz Erizew pe wà. — Heta puruzuka haw temi'u inuromo ty, i'i izupe wà. Nupuner kwaw i'u haw rehe wà.

**41** Na'e wenoz Erizew arozràn imukui' pyrer awa ipo ipor izupe. Omono zapepo pupe uze'eg pà. — Pemono imupupur pyrer pixika'i awa nànàñ kury, i'i wanupe. U'u wà kury. Nuzuka kwaw wà.

### *20 Typy'ak 100 awa wanupe imono pyràm*

**42** Amo 'ar mehe amo awa uhem wà tawhu Ma'lawxari her ma'e pe kury. Werur 20 typy'ak xewar izypy mehe ipo'o pyrer a'e kwarahy mehe arer iapo pyrer. Werur amo

xewar haryw iakyr ma'e izupe no. — Emono a'e temi'u amogwer Tupàn ze'eg imume'u har wanupe nehe, i'i Erizew uma'ereko ma'e pe. **43** Upuranu uma'ereko ma'e hehe. — Aipo uhyk putar 100 awa wanupe nehe, i'i izupe. Uwazar Erizew ize'eg izupe. — Emono wanupe nehe. U'u putar wà nehe. Nezewe i'i Tupàn Tuweharupi Wiko Ma'e a'e kury. — U'u putar wà nehe. Uhyk putar wanupe nehe. Heta we putar ikurer nehe, i'i a'e, i'i Erizew izupe.

**44** Na'e uma'ereko ma'e omono temi'u wanupe. Umai'u paw wà. Uhyk wanupe. Heta we ikurer Tupàn Tuweharupi Wiko Ma'e ze'eg awer rupi katete.

### Nààmà imukatu haw

**5** <sup>1</sup> Zauxiapekwer Xir izuapaypr wanuwhaw Nààmà her ma'e, ikatuahy tuwhiweté pe a'e. Tuwhiweté umuweté katu a'e. Ta'e Tupàn Tuweharupi Wiko Ma'e umur waàmàtyry'ymar waneityk awer Xir wanupe a'e xe, Nààmà zauxiapekwer wanuwhaw romo heko mehe a'e xe. Zauxiapekwer ukyze 'ym ma'e romo hekon. Iperewahy a'e. Iro izupe. Hahy no.

**2** Amo 'ar mehe Xir uzàmàtyry'ym Izaew oho wà. Upyhyk amo kuzàtai Izaew a'e 'ar mehe wà. Xir weraha weko haw pe wà. Uzeapo Nààmà hemireko pe uma'ereko e ma'e romo. **3** Amo 'ar mehe uze'eg kuzàtai uzar pe. — Aze mo heruwhaw uze'eg oho Tupàn ze'eg imume'u har Xamari pe har pe, ikatu mo ihewe. Ta'e umukatu mo iperew a'e 'y, i'i izupe.

**4** Na'e umume'u Nààmà kuzàtai ize'eg awer oho tuwhiweté pe kury. **5** — Eze'eg echo Izaew wanuwhiweté pe nehe. Eraha ko heze'eg pape rehe imuapk pyrer izupe nehe, i'i tuwhiweté Nààmà pe. A'e rupi uhem Nààmà oho a'e wi 350 kir itaxig parat ipuhuz taw heraha pà, 70 kir itazu or ipuhuz taw heraha pà no. Weraha 10 kamirpuku hekuzar katu ma'e uezupi no. **6** Nezewe i'i a'e pape hemiraha a'e. — Ko pape heraha har a'e, Nààmà tuwhaw herehe we har

romo hekon a'e. Aputar imukatu àwàm ihe, i'i izupe.

**7** Izaew wanuwhiweté a'e pape imugeta mehe umu'i ukamir ukyze haw rehe kury. — Xir wanuwhiweté uputar ko awa imukatu haw a'e. Ma'e azapo putar imukatu pà nehe. Aipo Tupàn romo aiko ihe. Aipo apuner wyzai teko imuigo kar haw rehe. Aipo apuner wyzai teko hekuwe re imuputu'u kar haw rehe. Ipuràmàtyry'ym wer herehe a'e, i'i Izaew wanuwhiweté teko wanupe.

**8** Ukwaw Erizew ma'e uezapo ma'e kwer a'e. Omono kar uze'eg tuwhiweté pe. — Mâràzàwe tuwe erezemumikahy iko ne. Emur kar a'e awa ihewe imuze'eg kar pà nehe. Aexak kar putar Tupàn ze'eg imume'u har Izaew ywy rehe heta haw ihe nehe, i'i izupe.

**9** Na'e Nààmà oho heko haw kutyr weimaw kawaru wanupi ywyramawa wanehe kury. Upytu'u Erizew ràpuz hukenaw huwake. **10** — Eze'eg echo nezewe izupe kury, i'i Erizew uma'ereko ma'e pe. — Ezahak echo 7 haw rupi yrykaw Zotàw pupe nehe. Nezewe mehe nekatu putar tuwe nerekew wi nehe, ere izupe nehe, i'i izupe. **11** Wikwahy Nààmà kury. — Aipo ni pitai Tupàn ze'eg imume'u har uhem putar tâpuz wi ihewe uze'eg pà nehe. Aipo ni pitai Tupàn ze'eg imume'u har uze'eg putar uzar Tupàn pe herehe nehe. Aipo nopolok kwaw heperew rehe hemukatu pà nehe. **12** Hereko haw pe Namaz tawhu pe heta mokoz yrykaw ikatu wera'u ma'e wà. Aman Parupar waner romo wà. Yrykaw hereko har ikatu wera'u wyzai yrykaw xe har Izaew rehe har wi wà. Mâràzàwe tuwe napuner kwaw a'e yrykaw pupe hezahakaw rehe hezemukatu kar pà ihe, i'i wanupe. A'e rupi oho a'e wi wikwahy pà.

**13** Na'e izupe uma'ereko ma'e uze'eg oho izupe wà kury. — Aze mo Tupàn ze'eg imume'u har uzapo kar zawaiw katu ma'e newe, erezapo mo. Mâràzàwe tuwe nerekuner kwaw yrykaw pupe nezahakaw rehe ize'eg awer rupi nezemukatu kar pà, i'i izupe wà.

**14** A'e rupi wezyw Nààmà Zotàw yrykaw pe kury. Uzahak 7 haw rupi Eri ze'eg awer

rupi katete. Ikatu azeharomoete kury. Ho'o kwer ikàg. Heruhàg kwarer ài. **15** A'e re uzewyr Erizew heko haw pe uzehe we har wanupi kury. — Akwaw ko ma'e ihe kury. Naheta kwaw amo ae Tupàn azeharomoete har ywy rehe. Xo pitài zo. Xo Izaew wazar zo wiko Tupanete romo. Amono putar amo ma'e newe nehe kury. Aze ikatu newe, epyhyk nehe, i'i tuwihaw Erizew pe.

**16** Uwazar Erizew izupe. — Amume'u putar ko ma'e Tupàn Tuweharupi Wiko Ma'e henataromo ihe nehe kury, hezar romo ihe nehe kury. Napyhyk kwaw ma'e nemukatu awer hekuzaromo ihe, i'i izupe. Uzeagaw wi wi Nààmà amo ma'e imono pà izupe. Nuputar kwaw.

**17** Na'e uze'eg Nààmà kury. — Nereputar kwaw heremimono ràm ne. Tuwe araha ywy xe har mokoz kawaràn wakupe pe ihe nehe. Ta'e ko 'ar henataromo nazuka kwaw ma'ea'yr amo ae tupàn pe nehe. Namono pixik kwaw ma'e amo ae tupàn imuawyze kar pà nehe. Xo Tupàn Tuweharupi Wiko Ma'e pezar pe zo amono putar ihe nehe. **18** Amo ma'e heremiapo ràm wi hepurumueharaz kar wer hehe ihe. Tuwihawete oho tupàn ua'u Himo her ma'e ràpuzuhi pe tupàn ua'u Xir ywy rehe har wazar imuwete katu pà. Hereraha putar uzeupi a'e nehe no. A'e rupi imuwete katu kar putar uzar ihewe a'e nehe no. Tuwe Tupàn Tuweharupi Wiko Ma'e heharaz a'e heremiapo ràm wi nehe, i'i Nààmà Erizew pe.

**19** — Zazur rihi. Tuwe ereho katu nehe, i'i Erizew izupe.

### Tupàn uzepyk Zeazi rehe a'e

Muite a'e wi Nààmà heko mehe, **20** Zeazi Erizew pe uma'erekó ma'e uze'eg upy'a pe kury, — Hezar omono kar e Nààmà xe wi. Nuenoz kwaw temetarer izupe. Aze mo upyhyk a'e Xir hemetarer, a'e mehe mo ikatu. Amume'u ko ma'e Tupàn Tuweharupi Wiko Ma'e henataromo kury. Azàn putar haikweromo nehe. Apyro putar amo ma'e izuwi nehe, i'i uzeupe.

**21** Na'e Zeazi uzàn oho a'e wi uhem pà. Nààmà wexak tur mehe. — Kwa, amo awa uzàn wà heraikweromo a'e, i'i uzeupe. A'e rupi wezyw ywyramawa wi hehe upuranu pà. — Aipo uzeapo amo ma'e, i'i izupe.

**22** — Nan, i'i Zeazi izupe. — Hezar hemur kar newe hemuze'eg kar pà a'e. Tàrityka'i uhem mokoz Tupàn ze'eg imume'u har ywy Eparai rehe har ywytyr heta haw wi wà kury. A'e rupi hezar wenoz itaxig parat 30 kir ipuhuz taw newe. Wenoz mokoz kamirpuku ikatuahy ma'e newe no, i'i mua'u Nààmà pe.

**23** — Aze ikatu newe, eraha 60 kir ipuhuz taw itaxig nehe, i'i Nààmà Zeazi pe. — Eraha, i'i wi izupe. Na'e Nààmà omono a'e itaxig mokoz ma'eryru pupe kury. Omono mokoz kamirpuku hekuzar katu ma'e wanupe no. Omono mokoz wemiruze'eg uma'erekó ma'e hupi wà no. — Peata Zeazi henataromo nehe, i'i wanupe. **24** Ywytyr Erizew heko haw pe wahem mehe, Zeazi upir a'e mokoz ma'e ryu wà kury, waneraha pà tâpuz pupe wà kury. A'e re umuzewyr kar a'e mokoz Nààmà pe uma'erekó ma'e uzar pe wà. **25** Wixe wi wàpuz me. Uze'eg oho Erizew pe. — Ma'e pe ereho, i'i Erizew izupe. — Naha kwaw amo me, i'i Zeazi wemu'em pà izupe.

**26** Uze'eg wi Erizew izupe. — Herekwe wiko nerehe we a'e awa ywyramawa wi iwezyw mehe newe uze'eg pà ihe. Na'ikatu kwaw ma'e ipyo awer izuwi imukatu awer hekuzaromo. Ni temetarer, ni kamirpuku, ni uri tyw, ni uwà tyw, ni àràpùhàràn wà, ni tap'iak wà, ni uma'erekó e ma'e awa wà, ni uma'erekó e ma'e kuzà wà. Iro neremiapo kwer ihewe. **27** A'e rupi Nààmà iperew ur putar nerehe nehe kury, nezuapyapyr wanehe nehe no. Awyeharupi iperew putar wà nehe, i'i Erizew Zeazi pe. A'e wi uhem mehe wereko a'e awa iperew kwer uzehe kury. Ipir xigatu ywàkun ài.

### Erizew umupupur kar itazy

**6** **1** Weruze'eg Erizew amo Tupàn ze'eg imume'u har uzemon'og ma'e wà. Amo 'ar mehe wenoz ma'e izupe wà. — Urereko haw nerehe we har pixika'i a'e. **2** Aze ikatu

newe, tuwe oroho Zotàw yrykaw pe amo ywyra wamonohok pà nehe. Urerur putar a'e ywyra xe amo tåpuz iapo pà zanerekò àwàm romo nehe, i'i izupe wà. — Pepuner peho haw rehe nehe, i'i Erizew wanupe.

**3** — Echo urerupi nehe ty, i'i amo Tupàn ze'eg imume'u har Erizew pe. A'e rupi oho wanupi. **4** A'e paw oho wà kury. Zotàw yrykaw pe uhem mehe uzypyrog uma'erekò pà wà kury. **5** Pitài awa omonohonohok amo ywyra iko kury. Na'arewahy itazy uhem u'yw wi 'y pupe u'ar pà kury. — Ma'e azapo putar kury, hezar, i'i Erizew pe. Nan kwaw hem'a'e. Amo ae awa wiko itazy izar romo a'e. Arur pyez izuwi ihe, i'i izupe.

**6** — Ma'e pe u'ar, i'i Erizew izupe. Wexak kar awa itazy i'ar awer izupe. Na'e omonohonohok Erizew amo ywyra pehegwer kury. Omomor 'y pupe itazy imupupur kar pà kury.

**7** — Epyhyk ty, i'i Erizew izupe. Upyho awa uzywa itazy ipyhyk pà.

### Izaew weityk zauxiapékwer Xir ywy rehe har wà

**8** Amo 'ar rehe Xir wanuwhawete užamátry'ym Izaew iko wà. Upuranu uzehe we har tuwhaw wanehe. — Ma'e pe xiapo putar zaneker haw nehe, i'i wanupe. Umume'u amo hen àwàm ikatu ma'e izupe wà. — Xiapo zaneker àwàm pe pe nehe, i'i wanupe. **9** Iapo 'ym mehe we Tupàn ze'eg imume'u har Erizew omono kar uze'eg Izaew wanuwhawete pe. — Echo zo a'e ywy pehegwer huwake nehe. Ta'e Xir a'e wà xe, uzeàmim a'e pe neràro pà nezuka pà a'e wà xe, i'i Erizew tuwhawete pe. **10** Na'e tuwhawete umume'u Erizew ze'eg a'e ywy rehe har wiko ma'e pe wà. — Peme'egatu nehe, i'i wanupe. Ume'egatu wà. — Peme'egatu nehe, i'i wi wanupe. Ume'egatu wi wà. — Peme'egatu nehe, i'i wi wanupe. Ume'egatu wi wà. Tuwhawete ipurapo wer uker haw rehe amo me. — Xir neràro waiko a'e pe wà, i'i wi Erizew. **11** Na'e wikkahy Xir wanuwhawete a'e kury, ta'e nupuner kwaw Izaew wanuwhawete heitykaw rehe a'e xe. A'e rupi wenoz uzehe

we har tuwhaw uzeupe wà kury, wanehe upuranu pà wà kury. — Ma'enugar xe har wiko Izaew wanuwhawete imyrypar romo, i'i wanupe.

**12** Amo uwazar ize'eg. — Ni amo xe har nuiko kwaw imyrypar romo, tuwhawete. Tupàn ze'eg imume'u har Erizew umume'u neremimume'u paw Izaew wanuwhawete pe a'e. Te neker haw pupe neremimume'u ukwaw a'e. Umume'u izupe a'e, i'i izupe.

**13** — Pekar peho Erizew heko haw hexak pà nehe. Hepurupyhyk wer hehe ihe, i'i tuwhawete amogwer tuwhaw wanupe.

— Notà tawhu pe hekon Erizew a'e, i'i amo teko tuwhawete pe wà. **14** A'e rupi omono kar zauxiapékwer tetea'u a'e pe wà. Weraha kawaru tetea'u uzeupi wà. Weraha ywyramawa tetea'u uzeupi wà no. Pyhaw uhem tawhu pe wà. Umàmàñ izywyr wà.

**15** Iku'egwer pe izi'itahy Erizew pe uma'erekò ma'e upu'äm tåpuz wi uhem pà. Wexak zauxiapékwer Xir weimaw kawaru wanehe we wà, ywyramawa wanehe we wà no. Wexak tawhu izywyr wamàmàñaw wà no. Na'e wixe tåpuz me Erizew pe uze'eg pà kury. — Hezar. Zákázym putar nehe. Ma'e xiapo putar nehe, i'i izupe.

**16** — Ekyze zo ty, i'i Erizew izupe. — Zanerehe we har heta tetea'u wera'u Xir wanehe we har wanuwi a'e wà, i'i izupe.

**17** Na'e uze'eg nezewe Tupàn pe kury. — O Tupàn Tuweharupi Wiko Ma'e. Ewàpptymawok ihewe uma'erekò ma'e heha nehe. Tuwe wexak katu tuwe nehe, i'i izupe. Tupàn uzapo ma'e henoz tawer. Uma'erekò ma'e ume'e ywate kury. Heta tetea'u tata kawaru romo iapo pyrer Erizew izywyr ywytyr izywyr wà. Heta tetea'u tata ywyramawa romo iapo pyrer izywyr wà no.

**18** Ur Xir ikutyr ipyhyk pà wà kury. Na'e uze'eg wi Erizew Tupàn pe. — O Tupàn Tuweharupi Wiko Ma'e. Emuigo kar ko zauxiapékwer hehàpyhà 'ym ma'e romo ne wà kury, i'i izupe. Uzapò Tupàn ma'e Erizew heminozgwer rupi. Xir nahehàpyhà kwaw wà kury. **19** Na'e uze'eg Erizew oho wanupe kury. — Pezawy penape ty wà. Napekar

kwaw 'aw tawhu peiko. Pezur herupi nehe. Apueraha putar awa penemikar pe nehe, i'i wanupe. Weraha Xamari tawhu pe wà kury.

**20** Tawhu pupe waneixe mehe we Erizew uze'eg nezewe Tupàn pe. — O Tupàn Tuweharupi Wiko Ma'e, emuehàpyhàgatu kar ne wà nehe kury. Tuwe wexak katu ma'e wà nehe kury, i'i izupe. Na'e Tupàn wexak katu wi kar ma'e Xir wanupe kury. A'e rupi wexak Xamari tawhu pupe weko haw wà.

**21** Izaew wanuwhawete wexak a'e zauxiapekwer Xir wà kury. Upuranu Erizew rehe. — Aipo azuka putar ihe wà nehe, hezar. Aipo azuka putar ihe wà nehe, i'i izupe.

**22** — Nan kwaw ty, i'i Erizew izupe. — Aipo erezuka zauxiapekwer zéàmàtyry'ymawhu pe neremipyhyk ne wà. Nan. Emono temi'u wanupe kury. Emono 'y wanupe no. A'e re nehe, tuwe uzewyr uzar tuwhawete pe wà nehe, i'i izupe.

**23** Na'e Izaew wanuwhawete uzapo mynykawhu a'e Xir wanupe kury. Wamai'u re wai'u re umuzewyr kar tuwhawete a'e zauxiapekwer Xir wanuwhawete pe wà kury. A'e 'ar henataromo Xir upytu'l Izaew ywy rehe har wàmàtyry'ym ire wà kury.

### Xamari pe har ima'uhezahy wà

**24** Amo kwarahy pawire Menanaz Xir wanuwhawete weraha wemiruze'eg zauxiapekwer paw Izaew wàmàtyry'ym pà a'e wà kury. Umàmàn oho Xamari tawhu izywyr wà. **25** A'e rupi upaw temi'u a'e tawhu pe har wanupe kury. Teko omono pitái kir itaxig parat pitái zumen àkàgwerhekuzaromo wà. Omono 60 kàràm kumana apekwer 200 kàràm rupi wà no.

**26** Amo 'ar mehe Izaew wanuwhawete ukwaw oho iko tawhu pàrirogawhu 'aromo kury. Amo kuzà uhapukaz izupe. — O Tuwhawete hezar, heptytwà pe nehe 'y, i'i izupe.

**27** Uwazar tuwhawete ize'eg izupe. — Aze Tupàn Tuweharupi Wiko Ma'e nanepytwà kwaw nehe, napuner kwaw nepytwà haw rehe ihe nehe. Naheta kwaw ni arozràn ni

win ihewe. **28** Ma'e erenoz putar ihewe nehe, i'i izupe. Uwazar kuzà ize'eg izupe. — Amo 'ar mehe ko kuzà uze'eg nezewe ihewe. — Xi'u nememyr awa kutàri nehe. Pyhewe xi'u putar hememyr awa nehe, i'i ihewe. **29** A'e rupi uruzuka hera'yr ure, ho'o kwer imupupur pà i'u pà ure. Iku'egwer pe aze'eg izupe. — Kutàri xi'u putar nememyr kury, a'e izupe. Umim umemyr ihewi a'e, i'i kuzà tuwhawete pe.

**30** A'e ma'e henu mehe umu'i tuwhawete ukamirpu. Teko a'e pàrirogawhu huwake har ume'e tuwhawete rehe iata mehe wà. Wexak ikamirpu wype har wà, ta'e umu'i ukamirpu a'e xe. Umunehew pàn iànàm ma'e ma'eryru iapo pyr ukamirpu wy pe.

**31** Uhapukaz tuwhawete oho iko. — Aze nazakagok kar kwaw Erizew Xapa ta'yr kutàri nehe, tuwe Tupàn hezuka nehe, i'i oho iko.

**32** Na'e omono amo awa Erizew ipiaromo. A'e 'ar mehe we wiko Erizew weko haw pe. Amo a'e teko wanuwhaw uzekytyar oho hàpuz me wà. Awa tuwhawete hemimur karer ihm 'ym mehe we uze'eg Erizew a'e tuwhaw wanupe. — A'e puruzuka ma'e umur kar amo awa hepyhyk kar pà izupe a'e. A'e rupi, ihm mehe nehe, pèwàptym uken nehe. Pemuix kar zo xe nehe. Tuwhawete ur putar haikweromo na'arewahy a'e nehe no.

**33** Uhem tuwhawete a'e pe Erizew huwake a'e, tuwhaw wanupe ize'eg mehe we a'e. Uze'eg tuwhawete kury. — Tupàn Tuweharupi Wiko Ma'e umu'ar kar ko iaiw paw zanerehe a'e. Màràzàwe tuwe àro ikatu haw hereko ihe, i'i izupe.

**7** **1** Uwazar Erizew ize'eg izupe. — Einu katu Tupàn Tuweharupi Wiko Ma'e newe ize'eg àwàm kury. — Pyhewe ko or mehe we erepuner arozràn ku'i kwer ikatu ma'e ime'eg kar pà nehe. Eremono putar itaxig 10 kàràm hekuzaromo nehe, 3 kir ku'aw har hekuzaromo nehe. Eremono putar 10 kàràm xewar hekuzaromo nehe, 7 kir parat hekuzaromo nehe no, i'i Erizew tuwhawete pe.

**2** Tuwhawete ipytwà har uze'eg Erizew pe. — Aze mo Tupàn Tuweharupi Wiko Ma'e

uwàptymawok ywak a'e, aze mo weityk arozràn ywy rehe, aze mo weityk xewar ywy rehe, nezewe rehe we mo nupuner iwer neze'eg rupi uezapo haw rehe, i'i izupe. Uwazar Erizew ize'eg izupe. — Nereha pupe erexak putar izeapo mehe nehe. Xo ne zo nere'u kwaw nehe, i'i Erizew izupe.

### **Zauxiapekwer Xir ywyrhe har uzeuwàhem wà**

**3** Heta 4 awa Xamari tawhu ukenaw huwake katu pe wà. Iperewaiw ma'e romo wanekon wà. Uze'eg uzeupeupe wà kury. — Mâràzawé tuwe zaiko xe zaneapyk pà zanemàno àwàm harò pà zane. **4** Aze zaixe tawhu pupe nehe, zàmàno putar nehe, ta'e naheta kwaw temi'u zanewe xe. Aze zapytu'u xe nehe, zàmàno putar nehe no. A'e rupi, zaha Xir waker haw pe nehe kury. Aze nazanezuka kwaw wà nehe, zaikuwe putar nehe. Aze zanezuka wà nehe, zàmàno putar nehe. Zuawaygatu zanewe nehe. Zamàno mo nezewe rehe we, i'i uzeupeupe wà.

**5** A'e rupi kwarahy heixe re oho Xir waker haw pe wà. A'e pe wahem mehe naheta kwaw ni pitài awa a'e pe wà. **6** Ta'e Tupàn Tuweharupi Wiko Ma'e wenu kar amo iàoñog ma'e wanupe a'e xe. Nuzawy kwaw zauxiapekwer tetea'u wànoñogaw. Wenu kawaru tetea'u wà. Wenu ywyramawa tetea'u wà no. — Kwa, Izaew wanuwiawete omono temetarer tetea'u Etew wanupe Ezit pe har wanupe no. A'e rupi uzàmàtyry'ym Xir wà a'e wà. **7** A'e rupi, pyhaw, Xir uzàn wanuwi uzepyro pà a'e wà. Wezar uma'e paw wà. Tàpuzràn, kawaru, zumen. Wezar uma'e paw a'e pe imumyz 'ym pà wà.

**8** Uhem a'e 4 awa Xir waker awer pe wà kury. Wixe amo tàpuzràn pupe wà. U'i ma'e a'e pe har pupe wà, u'u ma'e wà no. Upyhyk ma'e a'e pe wemixak kwer wà no. Parat, or, kamir. A'e re uhem oho a'e wi a'e ma'e umim pà wà. Na'e uzewyr wi amo ae tàpuz ràn pupe wixe pà wà. Upyhyk ma'e a'e pe har nezewegaté wà no. **9** Na'e uze'eg uzeupeupe wà. — Na'ikatu kwaw zaneremiapo. Ikatuahy ma'e uezapo xe. Na'ikatu kwaw imume'u 'ym

àwàm. Aze xo pyhewe zo ximume'u nehe, teko uzepyk putar zanerehe wà nehe. Zaha târityka'i ko ma'e imume'u pà tàpuzuhu pe nehe ty wà, i'i uzeupeupe wà.

**10** A'e rupi uhem oho Xir waker awer wi wà. Uzewyr Xamari pe wà. Uhupukaz zauxiapekwer ukenaw rehe har wanupe wà. — Oroho Xir waker haw pe ure. Nuruekak kwaw amo ure wà. Nurenu kwaw amo ure wà no. Kawaru a'e wà, zumen a'e wà no, wiko a'e pe paw rupi wà. Nukwaraw kwaw wà. Tàpuzràn paw a'e pe wain wà no, a'e rupi katete we wà, Xir heityk awer rupi katete wà, i'i wanupe wà.

**11** Zauxiapekwer umume'u a'e ma'e teko wanupe wà. Amo umume'u oho tàpuzuhu pe har wanupe wà no. **12** Ipytun rihi. Upu'am tuwiawete kury, uzehe we har tuwiaw wanupe uze'eg pà kury. — Amume'u putar Xir hemiapro putar awer peme kury. Ukwaw temi'u zanewe heta 'ymaw wà. A'e rupi uhem uker haw wi wà, ka'a pe uzeämim pà wà. — Izaew uhem putar tawhu wi temi'u hekar pà wà nehe, i'i uzeupeupe wà. — Xipyhyk wahem mehe nehe. Nezewe mehe xipyhyk tawhu zane nehe, i'i Xir waiko uzeupeupe wà, i'i tuwiawete amogwer tuwiaw wanupe.

**13** Amo tuwiaw uze'eg kury. — Xe tawhu pe upyta ma'e ràm umàno putar nezewe rehe we a'e wà nehe. Amo umàno kwez wà. A'e rupi, ximono kar amo awa a'e pe zane wà nehe. Weraha putar 5 kawaru wikuwe ma'e wainuromo har wà nehe. Nezewe mehe xikwaw putar uezapo ma'e kwer nehe, i'i izupe.

**14** Wexaexak amo awa wà. Omono kar tuwiawete a'e awa mokoz ywyramawa pupe wà. Peho ma'e Xir zauxiapekwer wanupe uezapo ma'e kwer hexak pà nehe, ikwaw pà nehe, i'i wanupe. **15** Awa oho Zotàw yrykaw pe wà. Wexak ma'e Xir wanemityk kwer tetea'u pe rupi wà. Ta'e weityk uma'e paw uzàn mehe wà xe. Uzewyr a'e ma'e imume'u pà tuwiawete pe wà. **16** Teko Xamari pe har uhem tawhu wi ma'e Xir waker awer pe har wapyhyk pà wà. Uzeapo ma'e Tupàn Tuweharupi Wiko Ma'e ze'eg rupi. Teko

ume'eg na'iruz kir iku'aw har arozràn ikatu wera'u ma'e ku'i kwer 10 kàràm parat rehe wà. Ume'eg 7 kir xewar nezewé wà no.

**17** A'e 'ym mehe Izaew wanuwhawete omono kar upytywà har pàrirogaw ukenaw pe a'e, hehe imuzekaiw kar pà a'e. Teko upyropyrog a'e awa rehe heityk pà wà. Umàno a'e pe Erizew tuwhawete pe ize'eg awer rupi katete. **18** Nezewé i'i Erizew a'e 'ym mehe a'e. — Pyhewe ko or mehe we erepuner arozràn ku'i kwer ikatu ma'e ime'eg kar pà Xamari pe nehe. Eremono putar itaxig 10 kàràm hekuzaromo nehe, 3 kir ku'aw har hekuzaromo nehe. Eremono putar 10 kàràm xewar hekuzaromo nehe no, 7 kir hekuzaromo nehe no, i'i Erizew tuwhawete pe a'e 'ym mehe. **19** A'e tuwhaw uwazar nezewé Erizew pe. — Aze mo Tupàn Tuweharupi Wiko Ma'e uwàptymawok ywak a'e, aze mo weityk arozràn ywy rehe, aze mo weityk xewar ywy rehe, nezewé rehe we mo nupuner iwer mo neze'eg rupi uezapo haw rehe, i'i izupe. Uwazar Erizew ize'eg izupe. — Nereha pupe erexak putar izeapo mehe nehe. Xo ne zo nere'u kwaw a'e temi'u nehe, i'i izupe. **20** Na'e uezapo ma'e izupe a'e ze'eg awer rupi katete. Teko uzuka a'e tuwhaw tawhu wi uzàn mehe wà. Upyropyrogahy hehe izuka pà wà.

### Kuzà Xunem pe har uzewyr uiwy pe

**8** **1** A'e 'ym mehe we Tupàn umuze'eg kar Erizew kuzà Xunez pe har pe. Pema'enukwaw hehe. Erizew umugweraw kar imemyr kwarer. Nezewé uze'eg izupe a'e 'ar mehe. — Nuhyk kwaw temi'u ko ywy rehe har wanupe nehe. Ima'uhez putar tuwe wà nehe. Wama'uhez taw umumaw putar 7 kwarahy ko ywy rehe nehe. A'e rupi, ehem echo ko ywy wi nehe, neànàm waneraha pà nezeupi nehe, amo ae ywy rehe nerekò pà nehe, i'i Tupàn newe, i'i Erizew kuzà pe. **2** Weruzar kuzà Erizew ze'eg. Oho wàñàm wanupi Piri ywy rehe har waiwy rehe wiko pà. Umumaw 7 kwarahy a'e pe.

**3** A'e 7 kwarahy pawire uzewyr Izaew pe. Uze'eg oho tuwhawete pe kury.

— Emuzewyr kar heràpuzugwer heywy kwer ihewe nehe, i'i izupe. **4** A'e 'ar mehe we uze'eg tuwhawete iko Erizew pe uma'erekò ma'e Zeazi her ma'e pe. Ta'e ipurukwaw wer Erizew hemiaipo kwer purumuptuhegatu kar haw wanehe a'e xe. **5** — Erizew umugweraw wi kar amo umàno ma'e kwer a'e, i'i iko izupe. A'e 'ar mehe we uhem a'e kuzà a'e ma'e henoz pà tuwhawete pe. Na'e i'i Zeazi. — O tuwhawete. Naiko a'e kuzà xe a'e kury. Aiko imemyr kwarer Erizew hemimugweraw karer a'e no, i'i izupe.

**6** Upuranu tuwhawete kuzà rehe. — Azeharomoete Zeazi ze'eg awer a'e, i'i izupe. A'e rupi tuwhawete wenoz amo tuwhaw uezupe kury. — Emuzewyr ko kuzà ima'e kwer paw izupe nehe. Emuzewyr arozràn ipo'o pyrer iziwy rehe arer hekuzar paw izupe nehe no, kwarahy amo ae ywy rehe heko mehe arer izupe nehe no, i'i tuwhawete izupe.

### Erizew uze'eg tuwhawete Menanaz rehe

**7** Amo 'ar mehe Xir wanuwhawete Menanaz her ma'e ima'eahy a'e. Oho Erizew heko haw Namaz tawhu pe a'e 'ar mehe. Amo umume'u Erizew tawhu pe heko haw oho tuwhawete pe. **8** A'e rupi uze'eg tuwhawete tuwhaw Azaew her ma'e pe. — Eraha amo ma'e imono pyràm Tupàn ze'eg imume'u har pe nehe. — Eze'eg Tupàn Tuweharupi Wiko Ma'e pe nehe, ere izupe nehe. — Aipo Menanaz ikatu putar nehe, ere Tupàn pe nehe, ere Erizew pe nehe, i'i tuwhawete izupe.

**9** Na'e Azaew omono'og ma'e hekuzar katu ma'e Namaz tawhu pe iapo pyrer tetea'u kury. Upir 40 kamer wakupe pe wamono pà. Na'e oho Erizew pe uze'eg pà. — Tuwhawete Menanaz nera'yà zàwenugar hemur kar newe. — Epuranu hehe nehe, i'i ihewe. — Aipo Menanaz ikatu putar a'e nehe, ere Erizew pe nehe, i'i tuwhawete ihewe, i'i a'e tuwhaw Erizew pe.

**10** Uwazar Erizew izupe. — Tuwhawete umàno putar a'e nehe, i'i Tupàn Tuweharupi Wiko Ma'e ihewe. Emume'u zo ize'eg awer tuwhawete pe. — Nekatu

putar nehe, ere izupe nehe, i'i Erizew a'e tuwihaw pe.

**11** Ume'egatu Erizew iko Azaew rehe. Ume'e wi wi hehe. Te imaranugar Azaew kury. Na'arewahy uzypyrog Erizew uzai'o pà kury. **12** Upuranu Azaew hehe. — Mâràzàwe tuwe erezai'o iko, i'i izupe. Uwazar Erizew ize'eg izupe. — Ta'e akwaw iaiw ma'e Izaew wanupe neremiapo ràm ihe xe. Eremunyk putar tata tawhu Izaew waneko haw wanehe nehe. Erezuka putar kwâkwâmo ne wà nehe. Erezuhazuhaw putar kwarer wà nehe, kuzâtái wà nehe no. Eremowok putar kuzà ipuru'a ma'e wanie ne wà nehe no, i'i izupe.

**13** — Mâràzàwe tuwe apuner ikàg wera'u ma'e romo hereko haw rehe. Naiko kwaw tuwihaw romo ihe, i'i Azaew izupe. — Tupàn Tuweharupi Wiko Ma'e wexak kar Xir wanuwhawete romo nerekò àwàm ihewe a'e, i'i Erizew izupe.

**14** Uzewyr Azaew tuwihawete Menanaz heko haw pe. Na'e upuranu tuwihawete Azaew rehe kury. — Ma'in Erizew a'e, i'i izupe. — Tuwihawete ikatu putar azeharomoete a'e nehe, i'i ihewe.

**15** Iku'egwer pe uphyk Azaew pàn puruwànav kury. Umuàkym 'y pupe. Na'e u'azuwyk tuwihawete oho kury. Na'e Azaew wiko Xir wanuwhawete romo Menanaz hekuzaromo kury.

### ***Zeoràw pureruze'egaw***

**16** Zoràw Akaw ta'yrs Izaew wanuwhawete romo heko mehe 5 haw kwarahy rehe Zeoràw Zuzapa ta'yrs wiko Zuta wanuwhawete romo a'e kury. **17** A'e ma'e izeapo mehe wereko Zeoràw 32 kwarahy a'e. Umumaw 8 kwarahy Zeruzarez pe tuwihawete romo wiko pà.

**18** Hemireko wiko Izaew wanuwhawete Akaw tazyr romo a'e. Wiko Zeoràw ikatu 'ym ma'e romo Tupàn henataromo Akaw zàwe a'e, amogwer Izaew wanuwhawete wazàwe a'e no. Nuzawy kwaw Akaw iànàm wà. Uzapo ikatu 'ym ma'e Tupàn Tuweharupi Wiko Ma'e henataromo. **19** Tupàn Tuweharupi Wiko Ma'e na'ipurumumaw wer

kwaw Zuta wanehe. Ta'e kwehe mehe uzapokatu uze'eg wemiruze'eg Tawi rehe we a'e xe. — Awyzeharupi nezuapyapyr wiko putar tuwihawete romo a'e wà nehe, i'i izupe.

**20** Zeoràw tuwihawete romo heko mehe Enom ywy rehe har uzemu'a'ak Zuta wanuwi wà. Nuweruzar kwaw Zuta wanuwhawete wà kury. Weruzar uzar wà kury. **21** A'e rupi uhem Zeoràw oho Zair pe uzywyramawa waneraha pà kury. A'e pe wahem mehe Enom zauxiapekwer umàmàn waiwyr wà. Ihem wer Zeoràw Enom wanuwi. A'e rupi pyhaw uzàmàtyry'ym oho wà kury. Zauxiapekwer Zeoràw rehe we har upuner a'e wi uhemaw rehe wà kury. Oho weko haw pe wà.

**22** A'e 'ar henataromo Enom wiko uzar heruzar har romo wà. Nuweruzar kwaw Zuta wanuwhawete heruzar her romo wà kury. A'e 'ar rehe tawhu Irimina her ma'e pe har uzemuza'aza'ak Zuta wanuwhawete wi a'e wà no.

**23** Amo umuapyk amogwer Zeoràw hemiapo kwer paw a'e pape Zuta wanuwhawete wanemiapo kwer her ma'e rehe. **24** Umàno Zeoràw kury. Utym hetekwer tuwihawete watymaw pe wà, tawhu Tawi reko awer pe wà. Ta'yrs Akazi her ma'e wiko hekuzaromo.

### ***Tuwihawete Akazi wiko tuwihawete romo***

**25** Zoràw Akaw ta'yrs Izaew wanuwhawete romo heko mehe 12 haw kwarahy rehe Akazi Zeoràw ta'yrs wiko Zuta wanuwhawete romo.

**26** A'e ma'e iapo mehe wereko Akazi 22 kwarahy a'e. Umumaw pitài kwarahy Zeruzarez pe tuwihawete romo wiko pà. Ihy a'e, Atari her romo a'e. Akaw tazyr romo Izaew wanuwhawete Oniri hemimino romo hekon.

**27** Akazi wiko Akaw iànàm romo ta'e wereko Akaw iànàm wemireko romo. A'e rupi nuzawy kwaw Akaw iànàm wà. Uzapo ikatu 'ym ma'e Tupàn Tuweharupi Wiko Ma'e henataromo.

**28** Tuwihawete Akazi uzemyryparypar Zoràw Izaew wanuwhawete rehe we, Azaew Xir wanuwhawete iàmàtyry'ym pà wà.

Zauxiapekwer paw uzàmàtyry'ym oho Hamot-Zireaz tawhu pe wà. Amo ukutuk Zoràw wàmàtyry'ym mehe wà. **29** A'e rupi uzewyr Zoràw Zereew tawhu pe, ukutuk awer imukatu pà muhàg kwaw par pe. Oho Akazi ipyr hexak pà.

### ***Zeu wiko tuwhiweté romo a'e***

**9** **1** A'e ma'e izeapo mehe we Tupàn ze'eg imume'u har Erizew wenoz amo Tupàn ze'eg imume'u har ipyahu ma'e uezupe kury. — Ezemuàgà'yim Hamot-Zireaz pe neho pà nehe kury. Eraha ko zutahky'a uri kawer heraha pà nehe, i'i izupe. **2** — A'e pe nehem mehe ekar Zeu Zuzapa ta'yur Nizi hemimino nehe. Eraha amo ae ipupyaikaw pe nehe, muite hehe we har wanuwi nehe. **3** A'e pe ezakook ko uri kawer iàkàg rehe ko ma'e imume'u pà nehe. — Tupàn Tuweharupi Wiko Ma'e umume'u ko ma'e iko kury. — Izaew wanuwhiweté romo urumuigo kar kwez ihe kury, i'i iko newe, ere izupe nehe, i'i Erizew a'e awa pe. — A'e re na'arewahy ehem a'e wi nehe, i'i izupe.

**4** Na'e oho a'e Tupàn ze'eg imume'u har ipyahu ma'e Hamot Zireaz pe kury. **5** Wexak zauxiapekwer wanuwhiweté wazemono'og mehe wà. — Arur amo ze'eg newe, i'i wanupe. Upuranu Zeu hehe. — Ma'enugar xe har pe ereze'eg iko ne, i'i izupe. — Newe aze'eg iteko ihe, i'i Zeu pe.

**6** Na'e oho amo ipupyaikaw pe hupi. Tupàn ze'eg imume'u har ipyahu ma'e uzakook uri kawer Zeu iàkàg rehe. — Tupàn Tuweharupi Wiko Ma'e umume'u ko ma'e iko newe. — Urumuigo kar heremaihu Izaew wanuwhiweté romo kwez ihe kury, i'i iko newe. **7** — Ezuka neruwhiweté Zoràw Akaw ta'yur nehe. Nezewé mehe azepyk putar Zezamew rehe ihe nehe. Ta'e uzuka heze'eg imume'u har a'e wà xe. Uzuka heremiruze'eg tetea'u a'e wà no xe. **8** Akaw iànàm paw wà nehe, izuapypyr paw wà nehe no, paw rupi katete umàno putar wà nehe. Amumaw putar iànàm awa paw wà nehe, awa pyahu ma'e paw wà nehe, awa tua'u ma'e paw wà nehe

no. **9** Azuka Zeromoàw Nemat ta'yur iànàm ihe wà. Azuka Maaza Ai ta'yur iànàm ihe wà no. Azapo putar nezewegatete haw Zoràw iànàm wanupe ihe wà nehe no. **10** Teko nuzutym kwaw Zezamew hetekwer wà nehe. Zawar u'u putar hetekwer wà nehe, Zereew tawhu huwake wà nehe, i'i Tupàn Tuweharupi Wiko Ma'e iko newe, i'i Tupàn ze'eg imume'u har Zeu pe. A'e ma'e imume'u re uhem Tupàn ze'eg imume'u har ipyahu ma'e a'e wi kury. Uzàn oho a'e wi.

**11** Uzewyr Zeu uezhe we har wapyr kury. Upuranu hehe wà. — Ikatu paw rupi. Ma'e a'e he'o ma'e uputar nerehe a'e, i'i izupe wà. — Pekwaw katu hemimutar, i'i wanupe.

**12** — Nurukwaw kwaw. — Emume'u urewe, i'i izupe wà. Umume'u uezapo ma'e kwer kury. — Nezewe i'i ihewe. — Tupàn uzakook kar uri kawer ihewe nerehe, Zeu, Izaew wanuwhiweté romo nemuigo kar pà ihe kury, i'i kwez ihewe. **13** A'e 'ar mehe we upupirar àmàn wi upurumimaw ma'epirer iapo pyrer wà kury, pyropyrogaaw rehe Zeu iata àwàm rehe wà kury. Upy uxi'äm wà. Uhapukaz wà. — Zeu wiko tuwhiweté romo a'e kury, i'i teko wanupe wà.

### ***Zeuzuka Zoràw***

**14-15** Na'e uezapo Zeu purumuhem kar haw tuwhiweté Zoràw wi kury. Wiko Zoràw Zereew pe ukutukaw imukatu pà. Ta'e iàmàtyry'ymar ukutuk Hamot-Zireaz pe wà xe, Azaew Xir wanuwhiweté iàmàtyry'ym mehe wà xe. Na'e uez'eg Zeu uezhe we har wanupe kury. — Aze peiko hemypyrap romo nehe, emuhem kar zo teko Hamot-Zireaz wi Zereew pe har wanupe ko ma'e imume'u pà pe wà nehe, i'i wanupe.

**16** Na'e uezupir Zeu uzywyramawa pupe Zereew kutyr oho pà kury. Na'ikatu kwaw Zoràw a'e rihi. Akazi Zuta wanuwhiweté wiko a'e pe izupe uez'eg pà.

**17** Amo zauxiapekwer u'äm tåpuz aiha ma'e pupe Zereew tawhu pe. Wexak Zeu. Wexak hehe we har zauxiapekwer wà no. Uhapukaz kury. — Aexak amo awa kawaru kupe pe wahem mehe wà, i'i wanupe. Na'e uez'eg

Zoràw. — Pemono kar amo awa kawaru ku'az har nehe. — Aipo ureàmàtyry'ymar romo peiko. Aipo uremyrypar romo peiko, i'i putar wanupe.

**18** Oho a'e awa Zeu huwàxi mà. Uze'eg izupe. — Tuwhiwete upuranu iko nerehe. Aipo erezur iko hemryrypar romo ne, i'i newe, i'i izupe. — Nan kwaw neze'eg rupi azur ihe, i'i Zeu izupe. — Ekwaw heraikweromo kury, i'i izupe. Zauxiapékwer tåpuz aiha ma'e pe har umume'u uezapo ma'e kwer a'e. — Ze'eg heraha har uwàxi a'e awa wà. Nuzewyr kwaw wà, i'i a'e. **19** A'e rupi tuwhiwete omono kar wi amo awa Zeu rehe imupuranu kar pà. Uwazar wi Zeu a'e awa ize'eg izupe. — Nan kwaw neze'eg rupi azur ihe, i'i izupe. — Ezur heraikweromo kury, i'i izupe.

**20** Umume'u wi zauxiapékwer uezapo ma'e kwer. — Ze'eg heraha har uwàxi a'e awa wà. Nuzewyr kwaw wà, i'i wanupe a'e. Amo ma'e umume'u tuwhiwete pe kury. — A'e awa wanuwhiaw weruata uzywyramawa he'o ma'e ài a'e. Nuzawy kwaw Zeu a'e, i'i izupe.

**21** — Pemuàgà'y'm heywyramawa zéamàtyry'ymawhu rehe har kury, i'i tuwhiwete Zoràw zauxiapékwer wanupe. Umuàgà'y'm izywyramawa wà. Na'e uhem tawhu wi tuwhiwete Akazi rupi kury. Pitaitàigatu wixe uwyramawa pupe wà, Zeu huwàxi pà oho pà wà. Uwàxi wà Nawot iko kwer rehe wà. Na'e Zoràw upuranu hehe.

**22** — Aipo erezur hemryrypar romo ne, i'i izupe. Uwazar Zeu ize'eg izupe. — Nazapuner kwaw zanemyrypar ymar romo zanerekohaw rehe. Ta'e erezapo kar wiwi iaiw ma'e paze ma'e wanupe ne xe. Eremuwete katu wiwi tupàn a'u'a'ne wà xe. Nehy Zezamew uzypyrog a'e tupàn a'u'a'ne wà xe. — Nezuka putar wà nehe, Akazi, i'i izupe.

**23** Na'e weruwak Zoràw uwyramawa heruzàn pà kury. Uhapukaz Akazi pe. — Nezuka putar wà nehe, Akazi, i'i izupe. **24** Upupirar Zeu uwyrarapar ihàm ukàgaw paw rupi kury. Omomor u'yw Zoràw kutyr. Ukutuk ikupe pe. Waxaw izà'a. U'ar kwaw pà

uwymaramawa wi ywy pe, umàno pà. **25** Na'e uze'eg Zeu upytwà har Minikar her ma'e pe kury. — Epyhyk hetekwer kury. Eityk heraha Nawot iko kwer rehe nehe. Amo 'ar mehe zata zaiko kawaru kupe pe Akaw Zoràw tu haikweromo zane. A'e 'ar mehe uze'eg Tupàn Tuweharupi Wiko Ma'e zanewe Akaw ikatu 'ymaw umume'u pà. Pema'enukwaw a'e 'ar rehe. **26** Nezewe i'i Tupàn a'e 'ar mehe a'e. — Karumehe aexak Nawot izuka awer ihe. Aexak ta'y'r wazuka awer ihe no. Amume'u ko ma'e kury. Xe 'aw ko rehe azepyk putar nerehe ihe nehe, i'i Tupàn hehe, i'i Zeu upytwà har pe. Na'e uzapo kar Zeu ma'e upytwà har pe kury. — Epyhyk Zoràw hetekwer kury. Eityk heraha Nawot iko kwer rehe nehe. Nezewe mehe uezapo putar ma'e Tupàn Tuweharupi Wiko Ma'e ze'eg rupi katete nehe, i'i izupe.

### ***Umàno Akazi***

**27** Zuta wanuwhiawete Akazi wexak uezapo ma'e kwer. A'e rupi weruzàn uwyramawa heraha Meteàgà tawhu kutyr kury. Zeu oho haikweromo wemiruze'eg zauxiapékwer wanupi a'e. — Pezuka Akazi nehe no, i'i wanupe. Ywyramawa pupe Gur piarupi iho mehe ukutuk wà. Imireàw tawhu huwake tuz Gur. Uzàn wi wi Akazi nezewe rehe we. Te uhem Mezin tawhu pe kury. Umàno a'e pe. **28** Amogwer tuwhiwete weruzewyr hetekwer heraha Zeruzarez pe wà. Utym hetekwer tuwhiwete watymaw pe wà, tawhu Tawi heko awer pe wà.

**29** Zoràw Akaw ta'y'r Izaew wanuwhiawete romo heko mehe 11 haw kwarahy rehe uzypyrog Akazi Zuta wanuwhiawete romo wiko pà.

### ***Uzuka Zezamew wà***

**30** Uhem Zeu Zereew pe kury. Ukwaw Zezamew ihem awer a'e. A'e rupi umupihun uweha kury. Umuguz u'aw no. Ume'e hin tåpuzuhu ukenaw wi kury, nahu rupi teko katu pe har wanehe ume'e pà kury. **31** Wixe Zeu tåpuzuhu ukenuhu rupi. Hexak mehe uhapukaz Zezamew. — Aipo

hemryrypar romo ereiko, nezar izuka arer, i'i izupe.

**32** Ume'e Zeu ywate hehe. Uhapukaz a'e pe har wanupe. — Mo wiko herehe we wà nehe, i'i wanupe a'e. Na'iruz tuwihaw tåpuzuhu pe har ume'e hehe ukenaw rupi wà. **33** Uze'eg Zeu wanupe. — Peityk a'e kuzà a'e wi nehe, i'i wanupe. Na'e tuwihaw weityk Zezamew a'e wi wà. Upiripirk huwykwer pàrirogaw rehe kawaru wanehe no. Zeu oho i'aromo kawaru wanupi ywyramawa pupe. **34** Wixe tåpuzuhu pupe kury. Umai'u a'e pe. Uwi'u no. Na'e uze'eg zauxiapekwer wanupe. — Tupàn uzepyk a'e kuzà rehe a'e. Pepyhyk hetekwer kury. Pezutym heraha nehe. Ta'e tuwihawete tazyr romo hekon a'e xe, i'i wanupe.

**35** Uhem a'e awa hetekwer itym putar pà wà. Xo iákàg wer zo wexak wà. Xo ipo kwer iákàg wer zo, xo ipykàgwer zo wexak wà. **36** A'e rupi uzewyr Zeu pe imume'u pà wà. Na'e uze'eg Zeu. — Tupàn umume'u kar a'e ma'e izeapo àwàm amo 'ar mehe a'e, wemiruze'eg Eri Xizime pe har pe a'e. Nezewe ize'eg awer a'e. — Zawar u'u putar Zezamew hetekwer Zereeew tawhu huwake a'e wà nehe. **37** Ho'o kwer ipegegwer uhàuhàz putar ma'e repuxi kwer ài nehe. — Na'aw Zezamew hetekwer xe, teko nupuner kwaw u'e haw rehe wà nehe, i'i Eri kwehe mehe, i'i Zeu uzehe we har wanupe.

### *Uzuka Akaw ta'yrs wà*

**10** <sup>1</sup>Tuwihawete Akaw ta'yrs wiko Xamari tawhu pe wà. Heta 70 wà. Uzapo Zeu pape tetea'u a'e tawhu pe har pe imono kar pà wà. Nezewe omono kar uze'eg tuwihaw wanupe, pureruze'eg ma'e wanupe no, Akaw ta'yrs wanehe uzekaiw ma'e wanupe no. Nezewe i'i ze'eg a'e pape rehe har. **2** — Pe peiko tuwihawete ta'yrs wanehe uzekaiw ma'e romo. Heta ywyramawa zeàmàtyry'ymaw pe har wà no. Heta kawaru wà no. Heta takihepuwà no, purukutukaw wà no. Heta tawhu pàrirogawaiha hereko har wà no. **3** Ko pape peme ihem ire nehe, na'arewahy pexaexak tuwihawete ta'yrs ikatu wera'u ma'e kwaw katu wera'u har nehe. Pemuapyk kar tu

hen awer rehe nehe. Pezàmàtyry'ym wyzài teko pe wà nehe, wanuwi ipyro pà pe wà nehe, i'i Zeu pape rehe uze'eg pà.

**4** Ukyze katu tuwihaw Xamari pe har wà. — Nazapuner kwaw Zeu kutyr zaneho haw rehe. Ni tuwihawete Zoràw ni tuwihawete Akazi nupuner kwaw heitykaw rehe wà, i'i uzeupeupe wà.

**5** Na'e tåpuzuhu rehe uzekaiw ma'e a'e, tawhu rehe uzekaiw ma'e a'e no, tuwihaw a'e wà no, Akaw ta'yrs wanehe uzekaiw ma'e a'e wà no, omono kar uze'eg Zeu pe a'e wà kury. — Uruiko neremiruze'eg romo ure kury. Uruzapo putar wyzài neremiapo kar ràm nehe. Naximuigo kar kwaw amo tuwihawete romo nehe. Ezapo ma'e neremimutar rupi nehe, i'i izupe wà.

**6** Na'e uzapo Zeu amo ae pape kury. — Aze peiko herehe we nehe, aze pepurapo wer heremiapo kar ràm nehe, perur Akaw ta'yrs wakàgwer ihewe wà nehe, xe Zereeew pe pyhewe ko 'or mehe nehe, i'i wanupe. A'e 70 Akaw ta'yrs wiko Xamari taw pe har hemetarer katu ma'e wapyr pitàitâigatu wà. Umugakwaw wà. **7** A'e Zeu pape ipyhyk mehe tuwihaw Xamari pe har uzuka a'e 70 Akaw ta'yrs paw rupi wà. A'e re omono wakàgwer kok wapupe wà, Zeu pe wamono kar pà wà, Zereeew pe wà.

**8** Amo umume'u Akaw ta'yrs wakàgwer wanerur awer oho Zeu pe wà. Na'e uze'eg Zeu kury. — Pezapo mokoz ywytyra'i tawhu uken huwake a'e wakàgwer pupe wà nehe. Tuwe upya a'e pe pyhaw wà nehe, i'i wanupe.

**9** Uhem a'e wi iku'egwer pe uken pe oho pà. Uze'eg teko a'e pe har wanupe. — Ihe azapo Zoràw wi purumuhem kar haw ihe. A'e re azuka ihe. Napeiko kwaw izuka arer romo. Mon aipo wiko wi àkàg wer wazarer wazuka arer romo wà. Nazuka kwaw ihe wà.

**10** Peme'e wi àkàgwer wanehe kury. Wexak kar ma'e Tupàn Tuweharupi Wiko Ma'e hemimume'u kwer Akaw izuapyapyr wanehe arer purupe a'e. Uzeapo wamàno awer ize'eg rupi katete a'e. Tupàn Tuweharupi Wiko Ma'e uzapo ma'e wemiruze'eg Eri pe wemimume'u kwer a'e, i'i wanupe.

**11** Na'e Zeu uzuka kar amogwer Akaw iànàm Zereew pe har paw a'e wà kury. Uzuka kar tuwhiw Akaw rehe we har paw wà no. Uzuka kar imyryparer wà no. Uzuka kar hemiruze'eg xaxeto wà no. Ni pitài nuhem kwaw umàno haw wi wà.

### ***Zeu uzuka Akazi iànàm wà***

**12** Uhem Zeu Zereew tawhu wi Xamari tawhu pe oho pà kury. **13** Pe rupi wata mehe àràpuhàràñ mono'ogar wako her ma'e pe wiko mehe uwàxi amo Zuta wanuwhawete Akazi umàno ma'e kwer iànàm wà. Upuranu wanehe. — Mo romo peiko, i'i wanupe. Uwazar ize'eg wà. — Akazi ànàm romo uruiko ure. Oroho uruiko Zereew pe tuwhiw kuzà Zezamew imemyr awa wanupe ureze'eg pà ure, amogwer tuwhiwete iànàm wanupe ureze'eg pà ure no, i'i izupe wà.

**14** Na'e uze'eg Zeu uezehe we har awa wanupe kury. — Pepyhyk ko teko pe wà kury. Pezuka zo xe pe wà kury, i'i wanupe. A'e rupi upyhyk a'e pe wà. Nuzuka kwaw a'e pe wà. Weraha amo ytyzuzàmaw a'e ywy rehe har pe wà. Uzuka paw a'e pe wà. Heta 42 awa wà. Numuigo kar kwaw ni pitài wà.

### ***Uzuka amo Akaw iànàm wà no***

**15** Uhem Zeu a'e wi kury. Pe rupi wata mehe uwàxi Zonanaw Hekaw ta'y. Zonanaw oho iko Zeu pe uze'eg pà. — Nekatu ty, i'i Zeu izupe huwàxi mehe. — Aipo nema'enukwaw paw nuzawy kwaw hemáenukwaw paw, i'i wi Zeu izupe. — Aze ty, i'i Zonanaw Zeu pe. — Zazepopyhyk kury, i'i Zeu izupe. Uzepopyhyk wà kury. Zeu upptywà Zonanaw usywiramawa zeàmàtyry'ymaw pe har pupe izeupir mehe. **16** Na'e uze'eg izupe. — Ezur herupi nehe. Nezewo mehe erexak putar Tupàn Tuweharupi Wiko Ma'e hemiruze'egete romo hereko haw ne nehe, i'i izupe. Weraha Zeu Zonanaw Xamari pe ywyramawa pupe. **17** A'e pe uhem mehe uzuka Zeu Akaw iànàm paw wà kury. Numuigo kar kwaw ni pitài wà. Tupàn Tuweharupi Wiko Ma'e

umume'u a'e ma'e uezapo ma'e ràm Eri pe kwehe mehe.

### ***Uzuka tupàn ua'u Ma'aw imuweste har wà no***

**18** Omono'og Zeu teko Xamari pe har wamuwà wà. Uze'eg wanupe. — Tuwhiwete Akaw umuwete wewer tupàn Ma'aw a'e. Ihe amuwete katu wera'u putar Ma'aw izuwi ihe nehe, i'i mua'u wanupe. **19** A'e rupi, pemono'ono'og Ma'aw ze'eg imume'u har paw pe wà nehe, imuweste katu har paw wà nehe no, xaxeto henataromo har paw wà nehe no. Tuwe ni pitài nuhem kwaw xe wi wà nehe. Ta'e azuka putar ma'ea'y tetea'u Ma'aw henataromo ihe nehe xe. Aze amo nur kwaw xe wà nehe, azuka putar ihe wà nehe. Hemu'em Zeu nezewe Ma'aw imuweste har wanupe nezewe a'e, ta'e ipuruzuka wer wanehe a'e xe.

**20** Na'e uze'eg wi Zeu teko wanupe. — Pemume'u Ma'aw imuweste katu haw 'ar teko wanupe nehe kury, i'i wanupe. Umume'u oho wanupe wà. **21** Omono kar uze'eg heraha har Izaew waiwy nàñàñ wà. A'e rupi ur Ma'aw imuweste har paw a'e pe wà kury. Ni pitài nupyta kwaw weko haw pe wà. Wixe Ma'aw rapuzuhu pupe wà. Tynehem kury. **22** Na'e uze'eg Zeu xaxeto pe kury, kamirpu Ma'aw pe imonokatu pyrer wanehe uzekaiw ma'e pe kury. — Erur kamir Ma'aw pe imonokatu pyrer xe ne wà kury. Emono imuweste katu har wanàñàñ nehe. Weruzar xaxeto ize'eg. **23** Na'e wixe Zeu Ma'aw hàpuzuhu pupe Zonanaw Hekaw ta'y rupi kury. Uze'eg a'e pe uzemon'o'og ma'e wanupe. — Peme'egatu pezehezehe kury. Xo Ma'aw imuweste har zo aputar xe. Naputar kwaw ni pitài Tupàn Tuweharupi Wiko Ma'e imuweste har xe, i'i wanupe a'e. Weruzar ize'eg wà.

**24** Na'e wixe Zonanaw rupi ma'ea'y izuka pà tata pupe hapy pà Ma'aw hagapaw henataromo kury. A'e 'ym mehe umupu'äm 80 zauxiapekwer katu pe tâpuzuhu izywyr wamumàmàñ kar pà wà. — Pezuka teko peme heremimono kar paw rupi pe wà nehe. Aze amo umuhem kar amo xe wi izuka 'ym

pà nehe, umàno putar nehe, weko haw pupe a'e teko ihemaw imekuzar pà nehe, i'i Zeu wanupe.

**25** Uzuka ma'ea'yr Ma'aw henataromo wà kury. Nan kwehe tete uze'eg zauxiapekwer wanupe tuwhaw wanupe kury. — Peixe wazuka pà paw rupi kury. Napemuhem kar kwaw ni pitài wà nehe, i'i wanupe. Wenuhem utakihe puku a'e pe wixe pà wà kury. Uzuka tàpuzuhu pupe paw rupi wà. Pitàitâgatu weityk wanetekwer katu pe wà. Na'e wixe ipupyaikaw Ma'aw henaw hereko har pe wà. **26** Weraha ita upu'äm ma'e Ma'aw hagapaw katu pe wà. Wapy tata pupe wà. Ukaz paw rupi. **27** Nezewe umumaw a'e ita upu'äm ma'e wà. Umumaw tàpuzuhu wà no. Tàpuzuhu uezapo karukarukaw romo ka'aka'aw paw romo teko wanupe kury. Te ko 'ar rehe teko wixe a'e pe ukarukaruk pà wà.

**28** Nezewe umumaw Zeu Ma'aw imuwete haw Izaew pe har a'e wà. **29** Nupytu'u kwaw amogwer tuwhawete Zoromoàw Nemat ta'yr hemiapo kwer ikatu 'ym ma'e záwenugar iapo re wà. Zeromoàw umuwete kar tapi'ak awa hagaw paw itazu or iapo pyrer Izaew wanupe a'e. Umupu'äm amo tapi'ak hagaw paw Metew pe. Umupu'äm inugwer Nà pe no. Zeu numupytu'u kar kwaw Izaew a'e tapi'ak imuwete re wà. **30** Na'e Tupàn Tuweharupi Wiko Ma'e uze'eg Zeu pe. — Erezapo ma'e Akaw izuapyapyr wanupe herenimutar rupi katete. A'e rupi amume'u ko ma'e newe kury. — Nézuapyapyr wiko putar Izaew wanuwhawete romo a'e wà nehe. Nera'yr wiko putar tuwhawete romo a'e nehe. A'e re ta'yr wiko putar tuwhawete romo a'e nehe no. A'e re ta'yr wiko putar tuwhawete romo a'e nehe no. A'e re ta'yr wiko putar tuwhawete romo a'e nehe no. 4 haw uezapo putar nezewe nehe, i'i izupe.

**31** Zeu nuweruzar katu kwaw Tupàn Izaew wazar ze'eg tuweharupi har upy'a nànàn a'e. Nupuir kwaw a'e iaiw ma'e Zeromoàw Izaew wanupe hemiapo karer wi a'e.

### **Zeu umàno a'e**

**32** A'e 'ar mehe Tupàn Tuweharupi Wiko Ma'e uzypyrog Izaew waiwy imupixika'i kar pà kury. Azaew Xir wanuwhawete upyhyk Izaew ywy Zotàw yrykaw kwarahy hemaw kutyr har paw a'e. **33** Ywy hemipyhyk kwer oho Aroer tawhu Aronon yrykaw pe kwarahy hemaw awyze har kutyr har pe. Upyhyk Zireaz ywy a'e no. Upyhyk Mâxà ywy no. Na'iruz Zako ta'yr wazuapyapyr wiko a'e ywy rehe wà. Kaz wà, Humen wà, Manaxe kwarahy hemaw kutyr har wà.

**34** Amo umuapyk amogwer Zeu hemiapo kwer paw a'e pape Izaew wanuwhawete wanemapiro kwer her ma'e rehe wà. Umume'u hemiapo kwer ikyze 'ym mehe arer wà no. **35** Umàno kury. Utym hetekwer Xamari pe wà. Ta'yr Zeoakaz wiko tuwhawete romo hekuzaromo a'e kury. **36** Umumaw Zeu 28 kwarahy Xamari pe Izaew wanuwhawete romo wiko pà.

### **Tuwhawete Akazi ihy uzuka kar iànàm paw zauxiapekwer wanupe wà**

**11** **1** Amo umume'u tuwhawete Akazi imàno haw oho ihy Atari pe wà. Henu mehe na'arewahy uzuka kar tuwhawete iànàm paw zauxiapekwer wanupe wà kury. **2** Xo Zoaz Akazi ta'yr zo uzepyro umàno haw wi. Ipuruzuka wer hehe amogwer wainuiuromo wà. Izaihe Zeoxew her ma'e a'e, Zeoràw tazyr romo Akazi heinyr amo ae u hemireko pupe har hekon a'e. Upyro Zeoxew Zoaz zauxiapekwer wanuwi a'e. Weraha kwarer amo tàpuzuhu ipupyaikaw pe ihyagaw rehe we no. Umim Atari wi. Nezewe mehe zauxiapekwer nuzuka kwaw kwarer wà. **3** Zeozew umumaw 6 kwarahy kwarer rehe uzekaiw pà tàpuzuhu pupe imim pà. Atari wiko tuwhawete romo a'e 'ar mehe. Kuzà a'e.

**4** **7** haw kwarahy rehe xaxeto Zoiaz wenoz zauxiapekwer tuwhawete ipyro har wanuwhaw uezupe wà kury. Wenoz zauxiapekwer tuwhawete hàpuzuhu rehe uzekaiw ma'e wà no, Tupàn Hàpuzuhu pe

wamur kar pà wà. Wamono'og mehe umume'u kar ma'e wanupe kury. Wexak kar Zoa tuwhawete Akazi ta'yr wanupe kury. **5** Na'e uzapo kar ma'e wanupe. — Pytu'u haw 'ar mehe pema'erekō mehe pezemuza'azā'ak na'iruz pehegwer romo nehe. Pitāi pehegwer uzekaiw katu putar tuwhawete hāpuzuhu rehe wà nehe. **6** Amo pehegwer upyta putar ukenawhu Xur her ma'e pe hehe ume'egatu pà wà nehe. Inugwer pehegwer upyta putar ukenawhu rehe a'e pe amogwer zauxiapekwer wanaikweromo wà nehe. **7** Mokoz pehegwer upytu'u putar uma'erekō re pytu'u haw 'aromo wà nehe. A'e mehe oho putar Tupàn Hāpuzuhu pe tuwhawete rām rehe uzekaiw pà wà nehe. **8** Pem'egatu tuwhawete Zoa rehe petakihe puku pepo pe heraha pà nehe. Peho hupi wyzāi iho àwàm me nehe. Aze wyzāi teko uhem penuwake nehe, pezuka nehe, i'i wanupe.

**9** Weruzar tuwhaw Zoiaz ze'eg wà. Weraha zauxiapekwer izupe wà. Pytu'u haw 'ar mehe uma'erekō pà uzypyrog ma'e wà, pytu'u haw 'ar mehe uma'erekō re upytu'u ma'e wà no, oho izupe wà. **10** Omono Zoiaz tuwhawete Tawi ima'e kwer tuwhaw wanupe. Purukutukaw, u'yw wi purumimaw no. A'e 'ym mehe teko omonokatu a'e ma'e paw Tupàn Hāpuzuhu pupe wà. **11** Umupu'äm kar zauxiapekwer takihepu hereko har Tupàn Hāpuzuhu henataromo tuwhawete kwarer ipyro kar pà wanupe. **12** Na'e Zoiaz weraha Zoa katu pe kury, omono tuwhawete àkàg rehe har iákàg rehe kury, tuwhawete romo heko haw hexak kar pà kury. Kwehe amo awa umuapyk wi Tupàn ze'eg pape rehe. Omono a'e pape izupe no. Na'e uzakook uri kawer hehe kury, tuwhawete romo heko haw hexak kar pà a'e pe har wanupe kury. Teko uzepopetek uhapukaz pà wà. — Tuwe tuwhawete wikuwe nehe, i'i izupe wà.

**13** Tuwhawete kuzà Atari wenu wanehapukaz mehe wà. A'e rupi oho Tupàn Hāpuzuhu pe teko wazemono'ogaw pe wà. **14** Wexak tuwhawete tāpuzuhu izita ita iapo

pyrer huwake, teko waneixe haw huwake. Tuwhawete upyta a'e pe a'e. Nezewe waneko awer wà. Tuwhaw wiko izywzywyr wà. Xi'äm ipy har wiko izywzywyr wà no. Teko paw uhapukaz urywete haw rehe wà. Upy uxí'äm waiko wà no. Umu'i Atari opoz uhapukaz pà. — Iaiw ma'e uzapo waiko wà. Iaiw ma'e uzapo waiko wà, i'i iko a'e.

**15** Xaxeto Zoiaz na'ipuruzuka kar wer kwaw Atari rehe Tupàn Hāpuzuhu pupe, ni ywy henaw rehe. A'e rupi uze'eg nezewe zauxiapekwer wanuwhaw wanupe. — Peraha tuwhawete kuzà katu pe kury, zauxiapekwer wamyter romo kury. Aze amo uzeagaw ipyro pà nehe, pezuka a'e teko nehe, i'i wanupe.

**16** A'e rupi upyhyk wà. Weraha hāpuzuhu pe wà. A'e pe ukenawhu kawaru her ma'e huwake uzuka wà.

### Zoiaz uzapokatu ze'eg a'e

**17** Xaxeto Zoiaz uzapokatu ze'eg kury, Tupàn Tuweharupi Wiko Ma'e rehe we, tuwhawete rehe we no, teko wanehe we no. — Peiko Tupàn hemiruze'egete romo kury, i'i wanupe. Uzapokatu uze'eg tuwhawete pe teko wanupe no. **18** A'e rupi oho teko Ma'aw hāpuzuhu pe wà kury. Weityk wà. Upe'i'àì'ág ma'e'a'yr hapy haw a'e pe har wà no. Upe'i'àì'ág tupàn a'ua'u wanagaw paw a'e pe har wà no. A'e pe ma'e'a'yr hapy haw henataromo uzuka xaxeto Ma'aw henataromo har Mâtà her ma'e wà no. Umupyta kar Zoiaz zauxiapekwer Tupàn Hāpuzuhu pe wà. **19** Na'e Zoiaz a'e, tuwhaw a'e wà no, tuwhawete rehe uzekaiw ma'e zauxiapekwer a'e wà no, tuwhawete hāpuzuhu rehe uzekaiw ma'e a'e wà no, weraha tuwhawete Tupàn Hāpuzuhu wi hāpuzuhu rām me a'e wà kury. Teko paw wata oho wanaikweromo wà. Wixe Zoa ukenawhu zauxiapekwer wapu'ämaw rupi. Na'e wapyk tuwhawete henaw rehe kury. **20** Teko paw hurywete wà. Naheta kwaw ikatu 'ymaw Zeruzarez pe Atari tāpuzuhu pe izuka re kury.

**21** Wereko Zoaz 7 kwarahy tuwhawete romo uezapo mehe a'e.

**Tuwihawete Zoaz pureruze'egaw**

**12** <sup>1</sup>Zeu Izaew wanuwihowete romo heko mehe 7 haw kwarahy rehe Zoaz uzeapo Zuta wanuwihowete romo a'e. Umumaw 40 kwarahy Zeruzarez pe tuwihowete romo wiko pà. Ziwi ihy her romo a'e. Merexewa tawhu pe har romo hekon ihy a'e. <sup>2</sup>Ukwarahy nànàn uzapo Zoaz Tupàn Tuweharupi Wiko Ma'e imurywete kar haw a'e, ta'e xaxeto Zoiáz weruze'eg Zoaz tuweharupi a'e xe. <sup>3</sup>Xo tupàn a'ua'u wamuwete haw zo numumaw kwaw a'e. Teko uzuka wi wi ma'ea'yr a'e pe tupàn a'ua'u wanenataromo wà. Wapy yhyk a'e pe wanenataromo wà no.

**4** Wenoz Zoaz xaxeto wamuwà uzeupe wà. — Pemono'og temetarer Tupàn Hàpuzuhu pe imono'og pyrer paw nehe, i'i wanupe. Teko umekuzar ma'ea'yr izuka pyràm wà. Xaxeto omono'og amo temetarer teko wanuwi wà no. Teko omono amo temetarer Tupàn pe wà no, ta'e umume'u izupe wà xe. Amo teko omono e wemetarer ikurer Tupàn pe wà no. **5** Xaxeto pitàitàigatu omono'og wemiaihu wanemetarer tàpuzuhu pe herur pyrer wà. Uzapokatu tàpuzuhu a'e temetarer pupe wà.

**6** Zoaz tuwihowete romo heko mehe 23 haw kwarahy rehe xaxeto nuzapo pixik kwaw ni pitai tàpuzuhu iapo katu haw a'e wà rihi. **7** A'e rupi Zoaz wenoz Zoiáz uzeupe kury. Wenoz amogwer xaxeto uzeupe wà no. Upuranu wanehe. — Máràzawé tuwe naapezapokatu kwaw Tupàn Hàpuzuhu. Ko 'ar henataromo pepyhik zo temetarer penemimono'og ràm nehe. Pemur ihewe nehe. A'e rupi apuner tàpuzuhu iapo katu àwàm rehe ihe nehe, i'i wanupe.

**8** — Ikatu nezewe àwàm urewe, i'i xaxeto izupe wà. — Nuruzapo kwaw tàpuzuhu iapo katu haw ure nehe, i'i izupe wà.

**9** Na'e upyhyk Zoiáz amo ma'e ryu wyrapew iapo pyrer kury. Uzapo ikwar iwàpytmaw rehe. Umuapyk a'e ma'eryru ma'ea'yr hapy haw huwake. Aze amo wixe tàpuzuhu pupe wà, wexak a'e ma'e ryu opo awyze har rehe har kutyr. Xaxeto tàpuzuhu rehe uzekaiw ma'e omono temetarer Tupàn

imuwete har wanemirur kwer paw ipupe wà. **10** Temetarer teteau' hyru pupe heta mehe tuwihowete ze'eg imuapykar a'e, xaxeto wanuwihowe a'e no, ur a'e pe ipapar pà wà. Omonokatu ma'eryru pàñ iapo pyrer pupe wà. **11** Heta haw pape rehe imuapyk ire omono a'e temetarer tàpuzuhu iapo katu haw rehe uzekaiw ma'e wanupe wà. A'e ae omono ywyra pinar wanupe wà, tàpuz iapo har wanupe wà no, **12** ita rehe uma'erekò ma'e wanupe wà no, ita imonohonohokar wanupe wà no, um'e'eg kar ywyra tàpuzuhu iapo katu àwàm wà, ita wà no. Umekuzar amogwer ma'e hekuzar wà no. **13** A'e 'ar rehe numuapu'a kwaw a'e temetarer ma'e iapo pà wà. Ni kawaw, ni kawawpew, ni xi'am, ni zepinaw tatainy ihàm imonohokaw. Nuzapo kwaw ma'e parat iapo pyrer ni or iapo pyrer a'e 'ar rehe wà. **14** Omono a'e temetarer uma'erekò ma'e wanupe wà. Ume'eg kar ma'e tàpuzuhu iapo katu pyràm hupi wà no. Nuzapo kwaw amo ae ma'e a'e temetarer rupi a'e 'ar rehe wà. **15** Iapo katu haw rehe um'e'egatu ma'e wiko imunar 'ym ma'e romo azeharomoete wà. A'e rupi tuwihowete nuenoz kwaw ipapar awer pape rehe imuapyk pyrer wanupe. **16** Aze teko omono temetarer xaxeto wanupe wemiaipo kwer ikatu 'ym ma'e imekuzar pà, xaxeto upyhyk a'e temetarer wà. Nomono kwaw hyru pupe wà. Ta'e nezewe haw uzapo kar Tupàn ze'eg kwehe arer a'e xe.

**17** A'e 'ar rehe Azaew Xir wanuwihowete uzàmàtyry'ym Kat tawhu oho kury. Upyhyk kury. A'e re ipuruàmàtyry'ym wer Zeruzarez rehe. **18** Zoaz Zuta wanuwihowete omono'og temetarer kury. A'e 'ym mehe Zuzapa omonokatu temetarer Tupàn Tuweharupi Wiko Ma'e pe. Zeoràw omonokatu temetarer izupe no. Akazi omonokatu temetarer izupe no. Zoaz omono'og a'e temetarer paw kury. Omono wemetarer Tupàn pe imono pyrer a'e temetarer rehe we no. Omono itazu or Tupàn Hàpuzuhu pe har paw hehe we no. Omono itazu or wàpuzuhu pe har paw hehe we no. Omono kar a'e temetarer paw tuwihowete Azaew pe kury. A'e rupi Azaew nuzàmàtyry'ym kwaw Zeruzarez kury.

**19** Amo umuapyk Zoaz hemiapo kwer paw a'e pape Zuta wanuwhawete wanemairo kwer her ma'e rehe.

**20-21** Tuwihaw Zoaz rehe we har utyryk izuwi wà. Mokoz tuwihaw uzuka Zoaz wà. Na'aw waner xe wà: Zozakar Ximeat ta'y, Zozamaz Xomer ta'y no. A'e 'ym mehe tuwihawete uzapo kar amo tâpuz ywy Zeruzarez izywyr har rehe kwarahy hemaw kutyr. Tawhu Xira piar izywyr uzapo a'e. A'e mokoz tuwihaw uzuka Zoaz a'e tâpuz pupe wà. Utym teko Zoaz hetekwer tuwihawete watymaw pe wà, tawhu Tawi heko awer pe wà. Zoaz ta'y Amazi her ma'e wiko tuwihawete romo u hekuzaromo kury.

### ***Zeokaz wiko Izaew wanuwhawete romo***

**13** <sup>1</sup>Zoaz Akazi ta'y Zuta wanuwhawete romo heko mehe 23 haw kwarahy rehe Zeokaz Zeu ta'y wiko Izaew wanuwhawete romo. Umumaw 16 kwarahy Xamari pe tuwihawete romo wiko pà. <sup>2</sup>Uzawy Zeokaz Tupân rape. Hemiapo kwer na'ikatu kwaw Tupân Tuweharupi Wiko Ma'e pe. Nuzuawy kwaw Zeromoàw Nemat ta'y a'e. Uzapo kar ikatu 'ym ma'e Izaew wanupe izàwegatete. Nutyryk pixik kwaw ikatu 'ymaw wi. <sup>3</sup>A'e rupi Tupân Tuweharupi Wiko Ma'e wikwahy Izaew wanehe kury. A'e rupi weityk kar Izaew Azaew Xir wanuwhawete pe wà, ta'y Menanaz pe wà no. <sup>4</sup>Na'e Zeokaz uze'eg Tupân Tuweharupi Wiko Ma'e pe kury. Tupân uwazar ize'eg ize'eg ire. Xir wanuwhawete upuraraw kar ma'erahy tetea'u iko Izaew wanupe. Tupân wexak ipuraraw mehe wà. <sup>5</sup>Na'e omono kar Tupân amo tuwihaw Izaew wanupe kury, Xir wanuwi wapyro àwàm romo kury. A'e re wiko katu haw rehe a'e 'ym mehe arer zàwegatete wà. <sup>6</sup>Nupuir kwaw ikatu 'ym ma'e iapo haw Zeromoàw Izaew wanupe hemiapo karer wi wà. Uzapo wi wi oho waiko wà. Ywyra u'àm ma'e tupân ua'u romo iapo pyrer upyta Xamari pe. Teko nueityk kwaw wà.

**7** Xir wanuwhawete umumaw etea'i zauxiapekwer kawaru ku'az har wà. Umumaw etea'i ywyramawa wà no. Umumaw etea'i zauxiapekwer upy rehe wata ma'e wà no. Xo màràmàràn zo heta we Zeokaz pe wà. <sup>50</sup>zauxiapekwer kawaru ku'az har heta we wà kury. <sup>10</sup>ywyramawa heta we wà no. <sup>10</sup>miw zauxiapekwer upy rehe wata ma'e heta we wà no. Xir wanuwhawete umu'im'u amogwer ywyku'i kwer ài wà.

**8** Amo umuapyk amogwer Zeokaz hemiapo kwer paw a'e pape Izaew wanuwhaw wanemairo kwer her ma'e rehe. Umume'u ma'e ukyze 'ym mehe hemiapo kwer no, a'e pape rehe no. <sup>9</sup>Umàno a'e. Utym hetekwer Xamari pe wà. Ta'y Zeoaz uzeapo tuwihawete romo hekuzaromo kury.

### ***Zeoz wiko Izaew wanuwhawete romo***

**10** Zoaz Zuta wanuwhawete romo wiko mehe 37 haw kwarahy rehe Zeoaz Zeokaz ta'y uezapo Izaew wanuwhawete romo. Umumaw 16 kwarahy Xamari pe tuwihawete romo wiko pà. <sup>11</sup>Uzawy Zeoaz Tupân rape. Hemiapo kwer na'ikatu kwaw Tupân Tuweharupi Wiko Ma'e pe. Nuzawy kwaw Zeromoàw Nemat ta'y. Uzapo kar ikatu 'ym ma'e Izaew wanupe Zeromoàw zàwegatete. Nupytu'u kwaw. <sup>12</sup>Amo umume'u amogwer Zeoaz hemiapo kwer a'e pape Izaew wanuwhawete wanemairo kwer her ma'e rehe. Amazi Zuta wanuwhawete iàmàtyr'ym awer a'e pape rehe a'e no. <sup>13</sup>Umàno Zeoaz. Utym hetekwer tuwihawete watymaw pe wà, Xamari pe wà. Ta'y Zeromoàw mokoz haw uezapo tuwihawete u hekuzaromo kury.

### ***Erizew umàno a'e***

**14** Na'e Erizew ima'eahy tuwe kury. Nuhem kwaw a'e ma'eahy haw puruwi. Upuruzuka tuwe a'e. Erizew imàno etea'i mehe we tuwihawete Zeoaz oho hexak pà. Uzuwàzuwàn uza'o pà. — Heru, heru. Ereiko zauxiapekwer tetea'u wazàwé Izaew wapyro pà wàmàtyr'ymar wanuwi ne, i'i izupe.

**15** Na'e uze'eg Erizew izupe. — Epyhyk amo ywyrapar amo u'yw rehe we kury, i'i izupe. Upyhyk Zeoaz ywyrapar u'yw rehe we. **16** — Ezemuàgà'ym u'yw imomor haw rehe kury, i'i izupe. Weruzar tuwiawete Erizew ze'eg. Na'e omono Erizew opo tuwiawete ipo 'aromo kury. **17** — Ewàptymawok ukenaw Xir ywy kutyr har kury, i'i izupe. Uwàptymawok ukenaw. Na'e i'i Erizew izupe. — Emomor u'yw kury, i'i izupe. Omomor tuwiawete u'yw. Na'e i'i Erizew izupe, — Ereiko Tupàn Tuweharupi Wiko Ma'e hu'yw zàwe nugar romo. Tupàn weityk kar putar Xir newe a'e wà nehe. Erezàmàtyry'ym putar Xir echo Apek pe nehe. Ereityk putar ne wà nehe, i'i izupe.

**18** A'e re uze'eg wi Erizew Zeoaz pe. — Epyhyk amogwer u'yw nepo pe ywy ipetepetek pà wapupe nehe, i'i izupe. Na'iruz haw rupi tuwiawete upetek ywy. Na'e upytu'u. **19** Wikwahy Erizew kury. Uze'eg izupe. — Aze mo erepetek 5 haw rupi o 6 haw rupi, ikatu wera'u mo. Eremumaw tuwe mo Xir ne wà. Xo na'iruz haw zo ereityk putar ne wà nehe kury, i'i izupe.

**20** Umàno Erizew kury. Utym hetekwer wà. Kwarahy nànàn Moaw izuapaypr uzemono'ono'og Izaew waiwy pe wixe pà wà. **21** Amo 'ar mehe amo teko wexak amo Moaw amo umàno ma'e kwer utym mehe wà. Ukyze Moaw wanuwi wà, a'e rupi weityk a'e hetekwer Erizew itym awer pupe wà. A'e re uzàn a'e wi wà. Hetekwer uhyk Erizew ikàgwer rehe. A'e 'ar mehe we a'e awa ukweraw wi upu'äm pà kury.

### Izaew uzàmàtyry'ym Xir wà

**22** Azaew Xir wanuwiawete wiko Izaew wazar romo Zeoakaz tuwiawete romo heko haw 'ar nànàn a'e. **23** Tupàn Tuweharupi Wiko Ma'e ikatu Izaew wanupe kury. Numumaw kar kwaw Xir wanupe wà. Upytwà a'e wà, ta'e kwehe mehe uzapo uze'egatu Àmàràw rehe we Izak rehe we Zako rehe we a'e xe. Naheharaz pixik kwaw wemiaihu wanuwi wà.

**24** Azaew Xir wanuwiawete imàno mehe ta'yr Menanaz wiko tuwiawete romo kury. **25** Zeoaz Izaew wanuwiawete weityk Menanaz na'iruz haw rupi a'e. Upyhyk wi tawhu Menanaz hemipyhyk kwer wà. Zeoakaz Zeoaz tu tuwiawete romo heko mehe upyhyk Menanaz a'e tawhu wà. Zeoaz upyhyk wi wà kury.

### Amazi wiko Zuta wanuwiawete romo

**14** <sup>1</sup> Zeoaz Zeoakaz ta'yr Izaew wanuwiawete romo heko mehe mokoz haw kwarahy rehe Amazi Zoaz ta'yr wiko Zuta wanuwiawete romo. <sup>2</sup> Amazi wereko 25 kwarahy a'e ma'e izeapo mehe. Umumaw 29 kwarahy Zeruzarez pe tuwiawete romo wiko pà. Ihy Zeoàna her romo a'e. Zeruzarez pe har romo hekon. <sup>3</sup> Amazi hemiapo kwer ikatu Tupàn pe. Na'ikatuahy kwaw tuwiawete Tawi ài, uzeaikweromo har ài. Uzapo ma'e u Zoaz ài. <sup>4</sup> Nuweityk kwaw tupàn a'ua'u wamuwete haw. Teko uzuka wi wi ma'e a'yr oho waiko tupàn a'ua'u wanupe wà. Wapy yhyk oho waiko wanupe tuweharupi wà no.

<sup>5</sup> Ikàg tuwe Amazi kury. A'e 'ym mehe amo tuwiaw uzuka tuwiawete. Tuwiawete wiko Amazi tu romo a'e. Ikàg mehe na'arewahy uzuka kar a'e tuwiaw a'e wà kury. <sup>6</sup> Nuzuka kwaw wana'yr paw wà. Weruzar Tupàn Tuweharupi Wiko Ma'e ze'eg Moizez pe imur pyrer. Nezewe i'i a'e ze'eg. — Pezuka zo awa ta'yr hemiapo kwer ikatu 'ym ma'e rehe nehe. Pezuka zo awa tu hemiapo kwer ikatu 'ym ma'e rehe nehe. Aze amo uzapo iaiw ma'e nehe, xo a'e zo pezuka putar hemiapo kwer hekuzaromo nehe, i'i a'e ze'eg.

<sup>7</sup> Wyàpypznaw Xa her ma'e rehe Amazi uzuka 10 miw zauxiapékwer Enom ywy rehe har wà. Wàmàtyry'ym mehe upyhyk Xera tawhu. Omono amo ae her hehe. Zokiteew, i'i izupe. Te ko 'ar rehe nezewe i'i teko a'e tawhu pe wà.

<sup>8</sup> Na'e Amazi omono kar uze'eg Zeoaz Izaew wanuwiawete pe kury. — Zazeàmàtyry'ym nehe ty, i'i izupe. <sup>9</sup> Uwazar tuwiawete Zeoaz

ze'eg izupe. — Amo 'ar mehe amo xu 'yw ywytyr Irimano ywy rehe har wamyter pe har omono kar uze'eg amo ywyra ywyràkàxigyw her ma'e pe. — Emur nerazyr hera'yr pe hemireko romo nehe, i'i izupe. Amo miar ukwaw a'e pe. Upyrog a'e xu rehe. **10** Azeharomoete ne Amazi ereityk Enom ywy rehe har ne wà. A'e rupi ereiko wera'u amogwer wanuwi ne kury. Nerurywete nehe, ta'e teko paw ukwaw nerer a'e wà kury xe. Máràzawé tuwe nezeàmàtyry'ym wer ne. Xo iaiw paw zo eremuhem kar putar nezeupe nehe, teko neremiaihu wanupe nehe, i'i Zeoaz Amazi pe.

**11** Amazi na'ipurenu wer kwaw ize'eg rehe. A'e rupi uhem tuwhiwete Zeoaz uzehe we har zauxiapékwer wanupi kury. Uzàmàtyry'ym Amazi oho Mete-Xemez Zuta ywy rehe har pe. **12** Zeoaz weityk zauxiapékwer Amazi hemiruze'eg wà. Uzàn oho upaw rupi weko haw pe wà. **13** Upyhyk Zeoaz Amazi Mete-Xemez pe. A'e wi oho Zeruzarez pe. Weityk ipàrirogaw iaiha ma'e tawhu wi. Uzypyrog ipàrirogaw heityk pà ukenawhu Eparai her ma'e pe. Oho te ukenawhu iapar haw her ma'e pe. Heta 200 met ru'u a'e ipàrirogaw iphegwer. **14** Upyhyk itaxig parat wemixak kwer paw. Upyhyk itazu or wemixak kwer paw no. Upyhyk ma'e Tupàn Hápuzuhu pe har paw no. Upyhyk temetarer tuwhiwete tâpuzuhu pe har paw no. Weraha teko a'e wi wà no. Na'e uzewyr Xamari pe kury.

**15** Amo umuapyk amogwer Zeoaz hemiapo kwer paw pape Izaew wanuwhiwete wanemipa kwer her ma'e rehe. Nukyze kwaw ma'e wi Amazi Zuta wanuwhiwete iàmàtyry'ym mehe. A'e pape umume'u ikyze 'ym awer no. **16** Umàno Zeoaz. Utym hetekwer Xamari pe har wanuwhiwete watymaw pe wà. Ta'yur Zeromoàw mokoz haw wiko tuwhiwete hekuzaromo kury.

### **Amazi umàno a'e**

**17** Zeoaz Zeoakaz ta'yur Izaew wanuwhiwete imàno re Amazi Zuta wanuwhiwete umumaw amo 15 kwarahy

wikuwe pà. **18** Amo umuapyk amogwer Amazi hemiapo kwer a'e pape Zuta wanuwhiwete wanemipa kwer her ma'e rehe.

**19** Amo teko Zeruzarez pe har uzemono'og Amazi izuka àwàm imume'u pà wà. Amo umume'u a'e ma'e izupe. A'e rupi Amazi uzàn oho Araki tawhu pe. Iàmàtyry'ymar oho haikweromo a'e pe wà. Uzuka a'e pe wà.

**20** Iànàm weraha hetekwer Zeruzarez pe kawaru kupe pe wà. Utym hetekwer tuwhiwete watymaw pe tawhu Tawi heko awer pe wà. **21** Na'e teko umuigo kar ta'yur Uzi tuwhiwete romo tu hekuzaromo a'e wà. Wereko Uzi 16 kwarahy tuwhiwete wiko mehe. **22** U imàno re Uzi upyhyk wi tawhu Erat her ma'e. Uzapokatu wi wi a'e tawhu.

### **Zeromoàw mokoz haw wiko Izaew wanuwhiwete romo**

**23** Amazi Zoaz ta'yur Zuta wanuwhiwete romo heko mehe 15 haw kwarahy rehe Zeromoàw mokoz haw Zeoaz ta'yur wiko Izaew wanuwhiwete a'e kury. Ummuw 41 kwarahy Xamari pe tuwhiwete romo wiko pà. **24** Zeromoàw mokoz haw uzawy Tupàn rape. Hemiapo kwer na'lkatu kwaw Tupàn Tuweharupi Wiko Ma'e pe. Nuzawy kwaw Zeromoàw ipy Nemat ta'yur. Uzapokatu ikatu 'ym ma'e Izaew wanupe a'e no.

**25** Zeromoàw mokoz haw upyhyk wi Izaew waiwy kwehe arer paw a'e kury. A'e ywy uzypyrog Amat pe kwarahy heixe haw awyze har kutyr. Oho Yryhu Umàno Ma'e Kwer her ma'e kwarahy hemaw awyze har kutyr. Tupàn Tuweharupi Wiko Ma'e Izaew wazar umume'u a'e ywy imuzewyr kar àwàm Izaew wanupe. Umume'u kar a'e ma'e Tupàn ze'eg imume'u har Zon her ma'e pe. Amitaz ta'yur romo Kate-Eper pe har romo hekon Zon a'e.

**26** Wexak Tupàn Tuweharupi Wiko Ma'e Izaew ma'erahy ipuraw mehe wà. Naheta pixik kwaw ni pitái Izaew wapytywà har wà.

**27** Na'ipurumumaw wer kwaw Izaew wanehe a'e. A'e rupi upytywà kar Izaew Zeromoàw mokoz haw pe wà.

**28** Amo umuapyk amogwer Zeromoàw mokoz haw hemiapo kwer a'e pape Izaew wanuwhiwete wanemiapo kwer her ma'e rehe. Upyhyk wi Namaz tawhu Amat tawhu Izaew wanupe. A'e pape umume'u a'e ma'e paw a'e. **29** Umàno Zeromoàw mokoz haw her ma'e. Utym hetekwer tuwhiwete watymaw pe wà. Ta'yr Zakari uezapo tuwhiwete romo hekuzaromo kury.

#### *Uzi wiko Zuta wanuwhiwete romo*

**15** <sup>1</sup>Zeromoàw mokoz haw Izaew wanuwhiwete romo heko mehe 27 haw kwarahy rehe Uzi Amazi ta'yr wiko Izaew wanuwhiwete romo. **2** Wereko 16 kwarahy tuwhiwete romo wiko mehe. Umumaw 52 kwarahy Zeruzarez pe tuwhiwete romo wiko pà. Ihy Zekori her romo a'e. Zeruzarez pe har romo hekon. **3** Nuzawy kwaw Uzi u a'e. Hemiapo kwer ikatu Tupàn Tuweharupi Wiko Ma'e pe. **4** Xo pitài ma'e zo na'ikatu kwaw izupe. Nuweityk kwaw tupàn a'ua'u wamuwete haw. Teko uzuka wi wi ma'ea'yàr a'e pe wà. Wapy yhyk a'e pe wà no. **5** A'e rupi Tupàn umuma'eahy kar tuwhiwete Uri kury. Upuraraw perew iaiw ma'e. Umumaw u'ar paw uperew pà. Imàno mehe iperew. Wiko amo tâpuz pupe muiteal'i amogwer teko wanuwi. Ta'yr Zotàw wiko tuwhiwete agaw hekuzaromo. Weruze'eg teko hekuzaromo wà.

**6** Amo umume'u amogwer Uzi hemiapo kwer a'e pape Zuta wanuwhiwete wanemiapo kwer her ma'e rehe. **7** Umàno Uzi. Utym hetekwer tuwhiwete watymaw pe tawhu Tawi heko awer pe wà. Ta'yr Zotàw wiko tuwhiwete romo hekuzaromo.

#### *Zakari wiko Izaew wanuwhiwete romo*

**8** Uzi Zuta wanuwhiwete romo heko mehe 38 haw kwarahy rehe Zakari Zeromoàw mokoz haw ta'yr wiko Izaew wanuwhiwete romo. Umumaw 6 zahy Xamari pe tuwhiwete romo wiko pà. **9** Nuzawy kwaw Zakari amogwer Izaew wanuwhiwete Zakari haikweromo har wà. Hemiapo kwer na'ikatu kwaw Tupàn Tuweharupi Wiko Ma'e pe. Nuzawy kwaw Zeromoàw Nemat ta'yr. Uzapo kar ikatu 'ym ma'e Izaew wanupe.

Nupytu'u kwaw a'e iaiw ma'e iapo re. Uzapo kar a'e ma'e Izaew wanupe tuwhiwete Zeromoàw Nemat ta'yr zàwegatete. **10** Xarum Zaw ta'yr omono'og amo teko tuwhiwete Zakari rehe ipuruzuka wer ma'e wamuwà wà. Uzuka Imireàw tawhu pe. Xarum upyta hekuzaromo tuwhiwete romo kury.

**11** Amo umuapyk amogwer Zakari hemiapo kwer a'e pape Izaew wanuwhiwete wanemiapo kwer her ma'e rehe.

**12** Nezewe uezapo ma'e Tupàn Tuweharupi Wiko Ma'e ze'eg tuwhiwete Zeu pe imume'u pyrer rupi katete a'e kury. — Nezuapypyk wiko putar Izaew wanuwhiwete romo zeirugatu haw rupi wà nehe, i'i Tupàn Zeu pe a'e 'ym mehe.

#### *Xarum wiko Izaew wanuwhiwete romo*

**13** Uzi Zuta wanuwhiwete romo heko mehe 39 haw kwarahy rehe Xarum Zaw ta'yr wiko Izaew wanuwhiwete romo kury. Umumaw pitài zahy Xamari pe tuwhiwete romo wiko pà.

**14** Menaem Gani ta'yr oho Xiza tawhu wi Xamari pe kury. Uzuka Xarum. Upyta tuwhiwete romo hekuzaromo. **15** Amo umuapyk amogwer Xarum hemiapo kwer paw a'e pape Izaew wanuwhiwete wanemiapo kwer her ma'e rehe. Weityk tuwhiwete wiko mehe a'e. A'e pape umume'u a'e ma'e a'e no. **16** Menaem weityk Tapu tawhu a'e. Uzuka a'e pe har paw wà. Weityk taw a'e ywy rehe har paw wà no. Te taw Xiza huwake har weityk wà. Uzapo a'e ma'e ta'E Tapu pe har nuwàpytymawok kwaw weko haw tawhu izupe wà xe. Ukixi kar kuzà ipuru'a ma'e wanie paw wà no.

#### *Menaem wiko Izaew wanuwhiwete romo*

**17** Uzi Zuta wanuwhiwete heko mehe 39 haw kwarahy rehe Menaem Gani ta'yr wiko Izaew wanuwhiwete romo. Umumaw 10 kwarahy Xamari pe tuwhiwete romo wiko pà. **18** Uzapo ikatu 'ym ma'e. Hemiapo kwer na'ikatu kwaw Tupàn Tuweharupi Wiko Ma'e pe. Nuzawy kwaw Zeromoàw Nemat ta'yr. Uzapo kar ikatu 'ym ma'e Izaew wanupe.

**19** Xigirat-Pirezer Axir wanuwhawete wixe wà Izaew waiwy pe kury. Menaem omono itaxig parat tetea'u izupe. Heta 34 miw kir ipuhuz taw. Ta'e ipurupytywà wer hehe xe. Ta'e heko wer tuwhawete ikàg wera'u ma'e romo a'e no xe. **20** Naheta tete kwaw temetarer Menaem pe. A'e rupi uze'eg awa hemetarer katu ma'e Izaew rehe har wanupe kury. — Pitàitaigatu pemur itaxig parat 570 kàràm ihewe nehe. Nezewe mehe Xigirat-Pirezer uzewyr putar uiwy pe nehe, i'i wanupe.

**21** Amo umuapyk Menaem hemiapo kwer paw a'e pape Izaew wanuwhawete wanemiapo kwer her ma'e rehe. **22** Umàno a'e. Utym hetekwer wà. Ta'yri Pekai her ma'e wiko tuwhawete romo hekuzaromo kury.

#### **Pekai wiko Izaew wanuwhawete romo**

**23** Uzi Zuta wanuwhawete romo heko mehe 50 haw kwarahy rehe Pekai Menaem ta'yri wiko Izaew wanuwhawete romo. Umumaw mokoz kwarahy Xamari pe tuwhawete romo wiko pà. **24** Uzapo ikatu 'ym ma'e. Hemiapo kwer na'ikatu kwaw Tupàn Tuweharupi Wiko Ma'e pe. Nuzawy kwaw Zeromoàw Nemat ta'yri. Uzapo kar ikatu 'ym ma'e teko wanupe. Nupytu'u kwaw iapo kar ire. **25** Amo zauxiapekwer Pekai hemiruze'eg wanuwhaw Peka her ma'e a'e, Hemari ta'yri a'e, omono'og 50 awa Zirez pe har wà. — Xiuka tuwhawete nehe, i'i uzeupeupe wà. Uzuka Pekai oho tâpuzuhu tâtâ ma'e Xamari pe har pe wà. Peka wiko tuwhawete romo hekuzaromo kury.

**26** Amo umuapyk amogwer Pekai hemiapo kwer paw a'e pape Izaew wanuwhawete wanemiapo kwer her ma'e rehe.

#### **Pekai wiko Izaew wanuwhawete romo**

**27** Uzi Zuta wanuwhawete romo heko mehe 52 haw kwarahy rehe Peka Hemari ta'yri wiko Izaew wanuwhawete romo. Umumaw 20 kwarahy Xamari pe tuwhawete romo wiko pà. **28** Uzapo ikatu 'ym ma'e. Hemiapo kwer na'ikatu kwaw Tupàn Tuweharupi Wiko Ma'e pe. Nuzawy kwaw Zeromoàw Nemat

ta'yri. Uzapo kar ikatu 'ym ma'e Izaew wanupe. Nupytu'u kwaw iapo kar ire.

**29** Peka tuwhawete romo heko mehe Axir wanuwhawete Xigirat-Pirezer uphyhk tawhu tetea'u wà. Uphyhk ywy tetea'u no. Na'aw tawhu waner xe wà: Izom, Apewmetemaka, Zanoa, Kez, Azor. Na'aw ywy pehegwer hemipyhyk kwer waner xe wà: Zirez, Karirez, Napitari. Weraha tekó a'e tawhu pe har a'e ywy rehe har weko how Axir ywy rehe wà.

**30** Zotàw Uzi ta'yri Zuta wanuwhawete romo heko mehe 20 haw kwarahy rehe Osez Era ta'yri omono'og tuwhawete Peka rehe ipuruzuka wer ma'e wà. Uzuka oho wà. Osez wiko tuwhawete romo hekuzaromo.

**31** Amo umuapyk Peka hemiapo kwer paw a'e pape Izaew wanuwhawete wanemiapo kwer her ma'e rehe.

#### **Zotàw wiko Zuta wanuwhawete**

**32** Peka Hemari ta'yri Izaew wanuwhawete romo heko mehe mokoz haw kwarahy rehe Zotàw Uzi ta'yri wiko Zuta wanuwhawete romo. **33** Wereko 25 kwarahy tuwhawete romo wiko mehe. Umumaw 16 kwarahy Zeruzarez pe tuwhawete romo wiko pà. Ihy a'e, Zeru her romo a'e. Zanok tazyr romo hekon. **34** Nuzawy kwaw Zotàw u a'e, Uzi a'e. Hemiapo kwer ikatu Tupàn Tuweharupi Wiko Ma'e pe. **35** Xo pitài ma'e zo nuzapo kwaw Tupàn imurywete kar pà. Nuweityk kwaw tupàn a'ua'u wamuwete haw a'e. Teko uzuka wi wi ma'e a'yri a'e pe wà. Wapy wi wi yhyk a'e pe tupàn a'ua'u wanenataromo wà no. Uzapo Zotàw Tupàn Hâpuzuhu ukenaw kwarahy heixe haw awyze har kutyr har a'e.

**36** Amo umuapyk amogwer Zotàw hemiapo kwer paw a'e pape Zuta wanuwhaw wanemiapo kwer her ma'e rehe.

**37** Tuwhawete romo heko mehe Tupàn Tuweharupi Wiko Ma'e omono kar Hezim Xir wanuwhawete Zuta pe. Omono kar Peka Izaew wanuwhawete a'e pe no. Uzàmàtyry'ym kar Zuta a'e tuwhawete wanupe wà. **38** Umàno Zotàw. Utym hetekwer tuwhawete watymaw pe wà, tawhu

Tawi reko awer pe wà. Ta'yr Akaz wiko tuwiawete romo hekuzaromo.

**Akaz wiko Zuta wanuwiawete romo**

**16** <sup>1</sup> Peka Hemari ta'yr Izaew wanuwiawete romo heko mehe 17 haw kwarahy rehe Akaz Zotàw ta'yr wiko Zuta wanuwiawete romo. <sup>2</sup> Wereko 20 kwarahy tuwiawete romo wiko mehe. Umumaw 16 kwarahy Zeruzarez pe tuwiawete romo wiko pà. Akaz nuiko kwaw wipy tuwiawete Tawi zàwe. Hemiapo kwer na'ikatu kwaw uzar Tupàn Tuweharupi Wiko Ma'e pe. <sup>3</sup> Nuzawy kwaw Izaew wanuwiawete a'e wà. Te wa'yr uzuka tupàn a'u'a wanenataromo. Wapy wa'yr hetekwer tata pupe. Kwehe mehe Tupàn Tuweharupi Wiko Ma'e umuixe kar Izaew a'e ywy rehe. Teko a'e ywy rehe har uzapo agwer iaiw ma'e wà. A'e rupi — Pemuhem kar a'e teko iro ma'e ko ywy wi wà nehe, i'i Tupàn Izaew wanupe. Ko 'ar rehe Akaz uzapo kar agwer iaiw ma'e Izaew wanupe kury. Iro hemiapo kwer Tupàn pe. <sup>4</sup> Uzuka Akaz ma'e'yr tupàn a'u'a wanupe wà. Wapy yhyk wamuwete haw pe no, ywytyr apyr, ywyra i'ág ma'e wype upaw rupi no.

<sup>5</sup> Na'e Hezim Xir wanuwiawete a'e, Izaew wanuwiawete Peka a'e no, uzàmàtyry'ym Zeruzarez tawhu oho wà kury. Umàmàñ izywyr wà. Nezewe rehe we nupuner kwaw Akaz heitykaw rehe wà.

<sup>6</sup> A'e kwarahy rehe Enom wanuwiawete uphyk wi Erat tawhu oho kury. Umuhem kar Zutew a'e pe wiko ma'e a'e tawhu wi wà. Enom izuapypapr oho Erat pe wà. Te ko 'ar rehe wiko a'e pe wà.

<sup>7</sup> Akaz omono amo uze'eg heraha har Xigirat-Pirezer Axir wanuwiawete pe wà kury. — Aiko neremiruze'eg romo ihe. Aiko nera'yr romo no. Ezur hepyro pà Xir wanuwiawete Izaew wanuwiawete wanuwi nehe. Ta'e heàmàtyry'ym waiko wà xe, i'i izupe.

<sup>8</sup> Upyhyk Akaz itaxig parat Tupàn Hàpuzuhu pe har. Upyhyk itazu or a'e pe har no. Upyhyk temetarer wàpuzuhu pe har

paw no. Omono kar e Axir wanuwiawete pe. <sup>9</sup> Nezewe uwazar Axir wanuwiawete Akaz pe. Ur zauxiapekwer tetea'u wanupi Namaz tawhu pe kury. Upyhyk kury. Uzuka tuwiawete Hezim. Weraha teko a'e pe har Kir tawhu pe wemipyhyk kwer romo wà kury.

<sup>10</sup> Tuwiawete Akaz oho Namaz tawhu pe tuwiawete Xigirat-Pirezer huwàxi mà. Wexak ma'e'yr happy haw a'e pe har. A'e rupi uzapo kar hagaw paw pape rehe xaxeto Uri pe imono kar pà, a'e ma'emume'u haw inuromo paw rupi a'e. <sup>11</sup> Na'e Uri uzapo amo ma'e'yr happy haw inugwer hagaw paw tuwiawete Akaz Namaz wi hemimir kwer zàwenugar. Umumaw iapo haw Akaz izewyr 'ym mehe we. <sup>12</sup> Namaz wi uhem mehe Akaz wexak a'e ma'e'yr izuka haw imuhyk pyrer kury. <sup>13</sup> A'e rupi wapy ma'e'yr tetea'u hehe wà kury. Omono arozràñ tupàn a'u'a wanupe no. Uzakook win hehe no. Uzakook tupàn a'u'a wamuawyzé kar haw huwy kwer hehe no. <sup>14</sup> Heta amo ma'e'yr happy haw itazu morog iapo pyrer a'e pe Tupàn Tuweharupi Wiko Ma'e henataromo har romo. Ma'e'yr happy haw ipyahu ma'e Tupàn Hàpuzuhu wamyter pe hin a'e. A'e rupi Akaz weraha a'e Tupàn henataromo har kwarahy heixe haw awyze har rehe har kutyr ma'e'yr happy haw ipyahu ma'e ikupe kutyr. <sup>15</sup> Na'e uze'eg nezewe Uri pe. — Ku'em mehe eapy ma'e tata pupe Tupàn henataromo nehe. Karuk mehe emono arozràñ izupe nehe. Emono a'e ma'e paw hemae'yr happy haw ipyahu ma'e rehe nehe. Emono tuwiawete ma'e Tupàn pe imono pyr hehe nehe no. Emono teko wama'e Tupàn pe imono pyr hehe nehe no. Emono uwà tykwer win teko wanemimono hehe nehe no. Ezakook ma'e'yr izuka pyrer paw wanuwykwer a'e ma'e'yr happy haw pyahu ma'e rehe nehe no. Ezapo zo ma'e a'e ma'e'yr happy haw itazu morog rehe nehe. Xo ihe zo apuranu putar Tupàn rehe ma'e uzeapo ma'e ram imume'u kar pà izupe ihe nehe, i'i izupe.

<sup>16</sup> Na'e Uri uzapo ma'e paw tuwiawete ze'eg rupi katete. <sup>17</sup> Tuwiawete Akaz o'ok a'e ywyramawa itazu morog iapo pyrer

tàpuzuhu pe har a'e wi a'e. Weraha kawaw ywyramawa rehe har a'e wi no. Heta amo 'y hyru uhua'u ma'e amo 12 tapi'ak awa hagaw paw wakupe pe a'e. O'ok tapi'ak hagaw paw wanuwi itahupew rehe imuapyk pà kury.

**18** Akaz uzapo amo ae ma'e Axir wanuwhawete imurywete kar pà. Tuwhiwete henaw wapyk amo ywyrapew rehe Tupàn Hápuzuhu pupe. Akaz weraha a'e ywyrapew a'e wi. Uwàptym tuwhiwete tàpuzuhu pupe waneixe haw no.

**19** Amo umuapyk amogwer Akaz hemiapo kwer paw a'e pape Zuta wanuwhawete wanemiapo kwer her ma'e rehe. **20** Umàno Akaz. Utym hetekwer tuwhiwete watymaw pe wà, tawhu Tawi heko awer pe wà. Ta'y Ezeki wiko tuwhiwete romo hekuzaromo.

#### Osez wiko Izaew wanuwhawete romo

**17** <sup>1</sup>Akaz Zuta wanuwhawete romo heko mehe 12 haw kwarahy rehe Osez Era ta'y wiko Izaew wanuwhawete romo. Umumaw 9 kwarahy Xamari pe tuwhiwete romo wiko pà. **2**Uzapo ikatu 'ym ma'e. Hemiapo kwer na'ikatu kwaw Tupàn Tuweharupi Wiko Ma'e pe. Nezewe rehe we nuiko kwaw iaiw ma'e romo amogwer Izaew wanuwhawete wazàwe. **3**Axir wanuwhawete Xamanezer ur ikutyr iàmàtyry'ym pà kury. Weityk Xamanezer Osez. Osez umumaw kwarahy tetea'u temetarer tetea'u imono kar pà Xamanezer pe. Na'ikatu kwaw nezewe haw Osez pe. **4**A'e rupi amo kwarahy mehe omono kar uze'eg heraha har Ezit wanuwhawete Xo her ma'e pe. — Heptytyà pe nehe, i'i izupe. Upytu'u temetarer kwarahy nànàmar Axir pe imono kar ire kury. A'e ma'e ikwaw mehe, upyhyk kar Xamanezer Osez zauxiapekwer wanuwe kury. Umunehew kar zemunehew paw pe.

#### Axir ywy rehe har weityk Xamari tawhu wà

**5**Na'e Xamanezer wixe Izaew ywy rehe kury. Umàmà Xamari tawhu izywyr wà. Umumaw mokoz kwarahy a'e pe har wamuhem kar 'ym pà wà. Na'iruz haw

kwarahy rehe, **6**Osez tuwhiwete romo heko mehe 9 haw kwarahy rehe Axir wanuwhawete upyhyk Xamari tawhu kury. Weraha Izaew Axir ywy rehe wà, wemipyhyk kwer romo wà. Umupyta kar amo Ar tawhu pe wà. Umupyta kar amo rykaw Amor Koza ywy rehe har huwake wa. Umupyta kar amo tawhu Mez ywy rehe har wanuwe wà no.

**7**A'e tuwhiwete upyhyk Xamari tawhu a'e, ta'e Izaew uzapo ikatu 'ym ma'e Tupàn Tuweharupi Wiko Ma'e uzar henataromo wà xe. A'e 'ym mehe Tupàn upyro waipy Ezit wanuwhawete wi a'e wà. Upyro a'e ywy wi wà. Nezewe rehe we umuwete katu amo ae tupàn wà. **8**Uzapo ma'e teko weko àwàm pe har wazàwe. Tupàn Tuweharupi Wiko Ma'e umuhem kar a'e teko Izaew wanenataromo. Uzapo ma'e wazàwe a'e re wà. Izaew wanuwhawete uzapo iaiw ma'e a'e teko wazàwe. A'e rupi teko Izaew uzapo uwihawete wazàwe wà no. **9**Izaew wanemiapo kwer na'ikatu kwaw Tupàn Tuweharupi Wiko Ma'e pe. Uzapo tupàn a'ua'u wamuwe haw weko haw tawhu nànàm wà. Taw pixika'i wera'u ma'e pe heta tupàn a'ua'u wamuwe haw. Taw uhua'u wera'u ma'e pe heta tupàn a'ua'u wamuwe haw no. **10**Umpu'äm itapuku tupàn ua'u hagapaw romo wà. Umpu'äm ywyra amo tupàn ua'u hagapaw romo wà no. Umpu'äm ywytyr apyr nànàm wà. Umpu'äm ywyra i'ág nànàm wà no. **11**Wappyhyk tupàn a'ua'u wamuwe haw nànàm wà no. Tupàn umuhem kar teko a'e ywy wi Izaew wanenataromo wà. Ta'e umume'u a'e ywy Izaew waipy wanuwe kwehe mehe a'e xe. Izaew nuzawy kwaw a'e teko wà kury. Uzapo iaiw ma'e Tupàn henataromo wà. A'e rupi Tupàn Tuweharupi Wiko Ma'e wikwahy wanehe kury, wanemiapo kwer wanehe kury. **12**Umuwete katu tupàn a'ua'u waiko wà. Kwehe mehe Tupàn Tuweharupi Wiko Ma'e uze'eg waipy wanuwe, a'e ma'e iapo 'ymaw imume'uhay pà wanuwe.

**13**Tupàn Tuweharupi Wiko Ma'e omono kar uze'eg heraha har wanuwe. Omono kar uze'eg imume'u har wanuwe no. — Pemume'u

ko heremimutar Izaew wanupe nehe, Zuta wanupe nehe no. — Pepytu'u ikatu 'ym ma'e iapo re nehe. Peruzar heremiapo putar haw nehe, heze'eg pape rehe imuapyk pyrer nehe, peipy wanupe heremimono kar nehe. Kwehe mehe amono a'e heze'eg heremiruze'eg wanupe ihe, heze'eg imume'u har wanupe ihe no. Amono kar peme ihe. Pemume'u heze'eg heremiaihu wanupe nehe, a'e wanupe, i'i Tupàn Tuweharupi Wiko Ma'e wemiruze'eg wanupe. **14** Teko Izaew ywy kwarahy heixe haw awyze har kutyr har wà, na'ipureruzar wer kwaw Tupàn ze'eg rehe wà. Nuzawy kwaw uwipy wà. Tupàn ze'eg heruzar 'ymar romo wanekon wà. Nuzeruzar kwaw Tupàn Tuweharupi Wiko Ma'e rehe wà, uzar rehe wà. **15** Tupàn ipurumu'e wer wanehe uze'eg rehe. Na'ipureruzar wer kwaw a'e ze'eg rehe wà. Uhaw ze'egatu waipy wanehe we hemiapo kwer wà. Nuzekaiw katu kwaw hemimume'u kwer rehe wà. Umuwete katu tupàn a'ua'u tykwer zàwenugar wà. A'e rupi a'e ae wiko tykwer ài a'e wà no. Uzapo ma'e oho waiko ywy uiwy huwake har wazàwe wà. Uhaw Tupàn Tuweharupi Wiko Ma'e hemiapo putar haw wà. — Pezapo zo iaiw ma'e ywy penuwake har rehe har wazàwe nehe, i'i Tupàn wanupe. Nezewe rehe we uzapo oho waiko wà. **16** Uhaw Tupàn Tuweharupi Wiko Ma'e uzar ze'eg paw wà. Umupyràn itazu mokoz tapi'ak awa gagapaw iapo pà wà. Na'e umuwete a'e tapi'ak wà. Uzapo ywyra imupu'äm pyr Azera her ma'e imuweste pyràm wà no. Umuwete zahytata wà no, umuwete tupàn ua'u Ma'aw her ma'e wà no. **17** Uzuka wa'yà wazyr tata pupe wapy pà tupàn a'ua'u wanenataromo wamuawyze kar pà wà. Upuranu oho tekwe ikatu 'ym ma'e wanupe uze'eg ma'e wanehe wà, ta'e ipurukwaw wer ma'e ikwaw pyr 'ym rehe wà xe. Upuranu ma'e uezapo ma'e ràm imume'u har wanehe wà no. Xo iaiw ma'e zo uzapo wà. Wanemiapo kwer na'ikatu kwaw Tupàn Tuweharupi Wiko Ma'e pe. A'e rupi wikwahy wanehe. **18** Wikwahy tuwe a'e

kury. A'e rupi umuhem kar teko Izaew ywy wi wà kury. Xo Zuta ywy rehe har zo upyta uiwy rehe a'e wà kury.

**19** Nezewe rehe we teko Zuta ywy rehe har nuweruzar kwaw uzar Tupàn Tuweharupi Wiko Ma'e ize'eg a'e wà no. Uzapo iaiw ma'e Izaew wazàwe wà. **20** A'e rupi Tupàn Tuweharupi Wiko Ma'e utryyk Izaew nànàn kury. Uzepyk wanehe. Omono wàmàtyry'ymar wanupe. Iahykaw rehe omono kar uzewi wà.

**21** Umuza'aza'ak Tupàn wemiaihu mokoz romo kwehe mehe wà. — Izaew, za'e pitái pehogwer pe. — Zuta, za'e inugwer pe. Na'e Izaew umuigo kar Zeromoàw Nemat ta'yr uwihawete romo wà. Umunyryk kar Zeromoàw Izaew Tupàn Tuweharupi Wiko Ma'e wi wà. Uzapo kar iaiw ma'e wanupe.

**22** Izaew weruzar Zeromoàw wà. Wiko hemiruze'eg romo wà. Iaiw ma'e Zeromoàw hemiapo kwer paw Izaew uzapo a'e wà no.

**23** Te, iahykaw rehe Tupàn omono kar uzewi wà kury. Ta'e nezewe haw wemiaipo ràm umume'u kwehe mehe uze'eg imume'u har wanupe a'e xe. A'e rupi zauxiapekwer weraha Izaew Axir ywy rehe wà kury. Nupuner kwaw a'e wi uhemaw rehe wà. Wiko Axir wanuwhawete pe uma'erekò e ma'e romo wà. Wiko a'e pe te ko 'ar rehe wà.

### Axir ywy rehe har werur

#### teko amo ae ywy rehe har Izaew pe wà

**24** Axir wanuwhawete werur teko tetea'u amo ae tawhu parer Izaew pe wà, Xamari pe wà. Na'aw a'e tawhu waner xe wà: Mawiron, Kuta, Iwa, Amat, Xepawai. Umuigo kar a'e teko tawhu Xamari ywy rehe har pe wà kury, Izaew wanekuzaromo wà kury. Weraha Izaew Axir pe ipyhk pyrer romo wà. Axir ywy rehe har wiko a'e tawhu wazar romo wà kury. Uzapo weko haw a'e pe wà. **25** A'e pe oho mehe wà, a'e pe weko àwàm iapo mehe wà, numuwete katu kwaw Tupàn Tuweharupi Wiko Ma'e wà. A'e rupi Tupàn omono kar zàwàrhu a'e pe wà. Zàwàrhu uzuka amogwemogwer a'e pe har wà. **26** Amo umume'u a'e ma'e oho Axir wanuwhawete pe

wà. — Teko tawhu Xamari ywy rehe har pe neremimono kar kwer a'e wà, nukwaw kwaw Tupàn a'e ywy rehe har ze'eg a'e wà. A'e rupi omono kar a'e Tupàn zàwàruhu a'e teko waneko haw pe wà. Uzuka zàwàruhu amo teko oho waiko wà, i'i izupe wà. **27** Na'e tuwihiawete uze'eg nezewe tuwihiaw wanupe kury. — Pemuzewyr kar pitai xaxeto a'e teko a'e wi zaneremirur kwer wanehe we har a'e ywy rehe nehe. Tuwe uzewyr a'e pe wiko pà nehe, teko a'e pe har wamu'e pà Tupàn a'e ywy rehe har ze'eg rehe nehe, i'i wanupe.

**28** Na'e amo xaxeto Izaew wainuromo har Xamari tawhu wi herur pyrer oho Metew pe wiko pà kury. Umu'e teko Tupàn Tuweharupi Wiko Ma'e imuweste katu haw rehe wà.

**29** Nezewe rehe we teko Xamari ywy rehe har uzapo wi wi tupàn a'ua'u uezueupe wà. Umuapyk a'e tupàn a'ua'u Tupàn imuweste haw Xamari ywy rehe arer hemiapo kwer pape rehe wà. Tawhu pitaitàigatu pe har uzapo tupàn a'ua'u uezuepe wà. **30** Mawiron parer uzapo uzar Xukot-Menot hagapaw wà. Kuta parer uzapo uzar Nerugaw hagapaw wà no. Amat parer uzapo uzar Azima hagapaw wà no. **31** Iwa parer uzapo uzar Niwaz uzar Tarutak wanagapaw wà. Xepawaim parer wapy wa'yr tata pupe uzar Anaramerek her ma'e henataromo Anamerek her ma'e henataromo wà. **32** A'e teko imuweste Tupàn Tuweharupi Wiko Ma'e a'e wà no. Wexaexak wyzai awa ueziuinuromo har xaxeto romo wamuigo kar pà tupàn a'ua'u wamuweste haw pàràm wà. A'e xaxeto omono ma'e Tupàn pe tupàn a'ua'u wanupe a'e wamuweste haw pe wà, teko wanekuzaromo wà. **33** Umuweste Tupàn Tuweharupi Wiko Ma'e wà. Umuweste uzar tupàn a'ua'u wà no. Umuweste tupàn a'ua'u weko awer pe har pitaitàigatu wà.

**34** Te ko 'ar rehe uzapo ma'e wemiapo kwer kwehe arer zàwenugar oho waiko wà. Numuwete katu kwaw Tupàn Tuweharupi Wiko Ma'e wà. Nuweruzar kwaw ize'eg Zako izuapyapyr wanupe imono pyrer wà. Tupàn omono Izaew amo ae her romo Zako pe a'e 'ar mehe kwehe mehe a'e.

**35** Kwehe mehe Tupàn Tuweharupi Wiko Ma'e uzapokatu uze'eg Izaew wanehe we a'e. Nezewe i'i wanupe a'e mehe. — Pemuwete katu zo amo ae tupàn pe wà nehe. Peapyk zo pepenàràg rehe wanenataromo nehe. Peiko zo wanemiruze'eg romo nehe. Pezuka zo ma'ea'yr wanenataromo nehe. **36** Peruzar heze'eg nehe. Tupàn Tuweharupi Wiko Ma'e romo aiko ihe. Apupyro Ezit ywy wi hepuner haw rupihekàgaw rupi ihe. Peapyk pepenàràg rehe herenataromo nehe. Pezuka ma'ea'yr herenataromo nehe. Pemono ma'e ihewe nehe. **37** Kwehe mehe amuapyk heze'eg pape rehe ihe. Amuapyk heremiaipo putar haw hehe ihe no. Peruzar a'e ze'eg heremiaipo putar haw nehe. Pemuwete zo amo ae tupàn pe wà nehe. **38** Peneharaz zo heze'egatu penehe we heremiaipo kwer wi nehe. **39** Aiko Tupàn Tuweharupi Wiko Ma'e romo ihe. Aiko pezar romo. Aze hemuwete katu pe nehe, apupyro putar peàmàtyry'ymaw paw wanuwi nehe, i'i Tupàn Izaew wanupe.

**40** Nezewe rehe we teko a'e ywy rehe uhem ma'e kwer a'e wà, nuzekaiw kwaw ize'eg rehe wà. Uzapo wi wi ma'e oho waiko wemiapo kwer kwehe arer zàwenugar ài wà.

**41** Umuwete Tupàn Tuweharupi Wiko Ma'e wà. Umuwete uzar tupàn a'ua'u wà no. Te ko 'ar rehe wazuapyapyr uzapo ma'e oho waiko nezewe a'e wà.

### Ezeki wiko Zuta wanuwihiawete romo

**18** <sup>1</sup>Era Izaew wanuwihiawete romo heko mehe na'iruz haw kwarahy rehe Ezeki Akaz ta'yr wiko Zuta wanuwihiawete romo kury. **2** A'e ma'e izeapo mehe wereko Ezeki 25 kwarahy. Urumaw 29 kwarahy Zeruzarez pe tuwihiawete romo wiko pà. Ihy a'e, Awì her romo a'e. Zakari tazyr romo hekon. **3** Nuzawy kwaw Ezeki wipy tuwihiawete Tawi a'e. Hemiaipo kwer ikatu Tupàn Tuweharupi Wiko Ma'e pe. **4** Urumaw tupàn a'ua'u wamuweste haw paw wà. Ukauka a'e itapuku tupàn a'ua'u hagapaw wà no. Weityk ywyra upu'äm ma'e tupàn a'ua'u hagapaw no. Ukauka moz itazu morog iaipo pyrer ipegegwer tetea'u iapo pà. Kwehe

mehe Moizez umupyàràn itazu a'e moz hagapaw iapo pà. Neutà her romo a'e. Moz, i'i zaneze'eg rupi. A'e 'ym mehe teko Izaew wapy yhyk moz henataromo imuwete pà wà.

**5** Ezeki uzeruzar Tupàn Tuweharupi Wiko Ma'e Izaew wazar rehe a'e. Naheta pixik kwaw tuwiawete izàwenugar Zuta wanupe a'e 'ar 'ym mehe wà, ni a'e 'ar pawire wà. **6** Wiko tuwe Tupàn Tuweharupi Wiko Ma'e hemiruze'eg romo a'e. Nupytu'u kwaw heruzar ire. Weruzar katu ize'eg Moizez pe imono pyrer paw. **7** A'e rupi Tupàn Tuweharupi Wiko Ma'e wiko hehe we a'e. Wyzài ma'e iapo mehe ikatu a'e ma'e. Ezeki naheko wer kwaw Axir wanuwiawete hemiruze'eg romo a'e. A'e rupi uwak izuwi. **8** Weityk Piri ywy rehe har wà. Wixe waiwy rehe. Upyhyk taw paw rupi wà, pixika'i ma'e wà, uhua'u ma'e wà no. Uzàmàtyry'ym tawhu Kaz her ma'e oho kury, ywy tawhu izywyr har iàmàtyry'ym pà no.

**9** Ezeki Zuta wanuwiawete romo heko mehe 4 haw kwarahy rehe, Ozez Era ta'y Izaew wanuwiawete romo heko mehe 7 haw kwarahy rehe, Xamanezer Axir wanuwiawete wixe Izaew ywy rehe kury. Zauxiapekwer hemiruze'eg umàmàn Xamari tawhu izywyr wà. **10** Ummuw mokoz kwarahy izywyr upyhyk Xamari tawhu wà kury. Ezeki Zuta wanuwiawete romo heko mehe 6 haw kwarahy rehe uezapo a'e ma'e. Ozez Izaew wanuwiawete romo heko mehe 9 haw kwarahy rehe uezapo a'e. **11** Axir wanuwiawete weraha Izaew uiwy pe wemipyhyk kwer romo wà. Umuigo kar amo Ar tawhu pe wà. Umuigo kar amo yrykaw Amor Kozà ywy rehe har huwake wà. Omono kar amo tawhu Mez ywy rehe har wanupe wà no.

**12** A'e ma'e uezapo a'e wà, ta'e Izaew nuweruzar kwaw uzar Tupàn Tuweharupi Wiko Ma'e a'e wà xe. Uhaw ze'eg uezupe Tupàn hemiaipo katu kwer wà. Uhaw Tupàn ze'eg Moizez pe imono pyrer paw wà. Tupàn Tuweharupi Wiko Ma'e hemiruze'eg hekon Moizez. Na'izekaiw

wer kwaw ize'eg rehe wà. Na'ipureruzar wer kwaw hehe wà no.

### *Axir ipuruàmàtyry'ym wer Zeruzarez pe har wanehe wà*

**13** Ezeki Zuta wanuwiawete romo heko mehe 14 haw kwarahy rehe Xenakeriw Axir wanuwiawete uzàmàtyry'ym tawhu Zuta ywy rehe har pàrirogawaiha hereko har paw wà kury. Upyhyk paw rupi wà. **14** Na'e Ezeki omono kar uez'eg Xenakeriw pe kury. Araki tawhu pe hekon Xenakeriw. — Azawy ihe. Aze ikatu newe nehe, ehem heywy wi nehe. Wyzài ma'e nereminoz ràm amono putar newe neho àwàm hekuzaromo nehe, i'i izupe. Tuwiawete umur kar uez'egaw Ezeki pe. — Emur kar 10 miw kir itaxig parat ihewe nehe. Emur kar miw kir itazu or ihewe nehe no, i'i izupe. **15** A'e rupi Ezeki omono kar itaxig Tupàn Hápuzuhu pe har paw izupe, wàpuzuhu pe har paw izupe no. **16** O'ok itazu or Tupàn Hápuzuhu hukenaw wi. O'ok itazu or ukenaw wype har wi no, izywyr har wi no. Omono kar a'e ma'e paw Xenakeriw pe.

**17** Nezewe rehe we Axir wanuwiawete omono kar zauxiapekwer tetea'u Araki tawhu wi Ezeki iàmàtyry'ym pà Zeruzarez pe wà kury. Na'iruz tuwiawete ikàg wera'u ma'e wiko a'e zauxiapekwer wanuwiaw romo wà. Zeruzarez pe uhem mehe upyhyk pe pàm imupinimar waneko haw rupi har wà. Wiko yrykaw ypa'w iapo pyrer i'aromo har wi 'y herur har huwake wà. **18** Na'e uez'eg tuwiaw teko wanupe wà. — Perur tuwiawete Ezeki xe wà nehe, i'i wanupe. Nale na'iruz tuwiaw Zuta ywy rehe har uhem tawhu wi wanupe uez'eg pà wà. Na'aw waner xe wà: Eriaki Iwki ta'y, tuwiawete hàpuzuhu rehe uzekaiw ma'e. Xemina tuwiawete ze'eg pape rehe imuapykar. Zoa Azap ta'y tuwiawete ipitywà har. **19** Amo Axir wanuwiaw uez'eg wanupe kury. — Peraha ko Axir wanuwiawete ikàg wera'u ma'e ze'eg Ezeki pe nehe kury. — Mâràzawé tuwe nerekzye kwaw ihewi ne, peze izupe nehe, i'i wanupe wà. **20** — Xo heze'eg zo umumaw putar takihepuku nehe, ere iko nezeupe. Mo

nepytywà putar Axir wanuwhawete imumaw mehe wà nehe. **21** Aipo ereàro zauxiapekwer Ezit ywy rehe har wanur àwàm iko. Wanàro haw nuzawy kwaw xu heraha haw wwyra pokokaw romo. Upen putar nepo ikuak pà nehe. Nezewe wiko Parao Ezit wanuwhawete uzehe uzeruzar ma'e wanupe. **22** Aipo erezeruzar iko Tupàn Tuweharupi Wiko Ma'e nezar rehe. Ezeki umumaw kar Tupàn Tuweharupi Wiko Ma'e henataromo ma'e'yr hapy haw a'e. — Xo Zeruzarez pe zo pemuwete katu Tupàn nehe, i'i Zuta wanupe, Izaew wanupe no. — Mâràzàwe tuwe a'e tupàn nepytywà putar nehe kury. **23** Azapokatu putar ze'eg nerehe we Axir wanuwhawete hekuzaromo ihe kury. Amono putar mokoz miw kawaru newe ihe wà nehe, aze erepuner mokoz miw awa kawaru waku'az àràm wamono'ogaw rehe nehe. **24** Nerepuner kwaw Axir wanuwhaw ikàg 'ym wera'i ma'e heitykaw rehe. Ereàro ywyramawa Ezit wanemimur kàràm iko ne wà. Ereàro zauxiapekwer Ezit wanemimur kàràm iko ne wà no. **25** — Uzàmàtyry'ym heywy a'e. A'e ae umumaw tawhùl heywy rehe har a'e wà. Tupàn Tuweharupi Wiko Ma'e nupytywà kwaw wamumaw mehe a'e, ere iko nezeupe. Erezawy iko. Tupàn Tuweharupi Wiko Ma'e a'e ae hemur kar xe neywy rehe har wàmàtyry'ym kar pà ihewe a'e, wamumaw kar pà ihewe a'e, i'i tuwhawete iko newe, i'i a'e tuwhaw Ezeki pe.

**26** Na'e Eriaki a'e, Xemina a'e no, Zoa a'e no, uze'eg a'e tuwhaw pe a'e wà kury. — Eze'eg Aram izuapyapyr waze'eg rupi, ta'e urukwaw waze'eg ure xe. Eze'eg zo ureze'eg rupi Emerew ze'eg rupi nehe. Ta'e teko pàrirogawaiha rehe har paw uzeapyaka waiko wà, i'i izupe wà.

**27** Uwazar tuwhaw a'e na'iruz awa ze'eg wanupe kury. — Aipo xo penuwihawete pe zo heruwihawete umur kar uze'eg. Aipo xo peme zo umur kar uze'eg. Nan kwaw pa. Aze'eg iteko pàrirogaw alha rehe wapyk ma'e wanupe no. Ú'u putar wepxi kwer wà nehe. Ui'u putar uty pupe wà nehe no. Pe no, pezapo

putar wazàwe nehe no, ta'e pema'uhez tetea'u putar nehe xe, i'i wanupe.

**28** Nezewe rehe we a'e tuwhaw upu'äm teko wanupe uhapukaz pà Emerew ze'eg rupi kury. — Penukatu Axir wanuwhawete ikàg wera'u ma'e peme hemimume'u ràm nehe. Nezewe uze'eg a'e. **29** — Tuwe Ezeki nahemu'em kwaw peme nehe. Ta'e nupuner kwaw pepyro haw rehe a'e nehe xe. **30** Tuwe napemuzeruzar kar kwaw Tupàn Tuweharupi Wiko Ma'e rehe nehe. Tupàn napepyro kwaw urewi nehe. Zauxiapekwer Axir ywy rehe har uphyk tawhu peneko haw a'e wà nehe. **31** Pezekaiw zo Ezeki rehe nehe. Nezewe uze'eg Axir wanuwhawete iko peme kury. — Pehem tawhu wi kury, ihewe pezemono pà kury, i'i iko peme. Aze peruzar ize'eg nehe, pepuner uwà tykwer peko pe har i'u haw rehe nehe. Pe'u putar pema'ywa 'a kwer nehe no. Pe'i putar ytyzùzàmaw peywy rehe har rehe nehe no. **32** Tuwhawete peneraha putar amo ae ywy peywy záwenugar pe nehe. Pezapo putar peneko àwàm a'e pe nehe. Heta uwà tyw a'e pe. Pezapo putar win nehe. Heta arozràn a'e pe. Pezapo putar typy'ak nehe no. Heta uri tyw a'e pe. Heta uri kawer no. Heta hâir no. Aze peruzar ize'eg nehe, napemào kwaw nehe. Peikuwe putar nehe. Tuwe Ezeki nahemu'em kwaw peme nehe. — Tupàn Tuweharupi Wiko Ma'e pepyro putar a'e nehe, i'i mua'u iko peme. Pezeruzar zo ize'eg rehe nehe. **33** Aipo amo tupàn amo ae ywy wazar upyro wemiaihu Axir wanuwhawete wi a'e wà. Nan kwaw pa. **34** Ma'e pe hekon tupàn Amat izuapyapyr wazar kury. Ma'e pe hekon tupàn Arapaz izuapyapyr wazar kury. Xepawaim wazar nupyro kwaw wemiaihu wà. Ena wazar nupyro kwaw wemiaihu wà. Iwa wazar nupyro kwaw wemiaihu wà. Aipo Xamari wazar upyro Xamari pe har ihewi wà,hekàgaw wi wà. Nupyro kwaw wà. **35** Ni pitái tupàn upyro uiwy rehe har ihewi wà. — Tupàn Tuweharupi Wiko Ma'e upyro putar Zeruzarez Axir wanuwhawete wi a'e nehe, peze ru'u peiko. Mâràzàwe tuwe peze'eg peiko nezewe, i'i a'e tuwhaw teko wanupe.

**36** Teko nuwazar kwaw iz'e'g wà, ta'e Ezeki uzapo kar nezewe haw wanupe xe. Ni pitái ze'eg numume'u kwaw wà. **37** Na'e Eriaki Xemina Zoa a'e wà kury, umu'i ukamir puku uzemumikahy haw hexak kar pà a'e wà kury. Umume'u Axir wanuwhaw ze'eg awer oho tuwhawete Ezeki pe wà kury.

**Tuwhawete Ezeki upuranu Izai rehe a'e**

**19** <sup>1</sup> Wenu tuwhawete Ezeki wama'emume'u awer. Umu'i ukamir puku a'e no. Umunehew pàn iànàm ma'e ma'eryru iapo pyr uzehe Tupàn Tuweharupi Wiko Ma'e ràpuzuhu pe oho pà kury. **2** Úze'eg Eriaki wàpuzuhu rehe uzekaiw ma'e pe kury. Uze'eg Xemina uze'eg imuapyk kar pe no. Uze'eg xaxeto tua'uhez wera'u ma'e wanupe no. — Peze'eg peho Izai Amoz ta'yur pe nehe, i'i wanupe. Umunehew pàn iànàm ma'e ma'eryru iapo pyr a'e 'ar mehe wà no. **3** Nezewe uze'eg tuwhawete Izai pe. — Kutàri ma'erahy ipurawar paw 'ar rehe zaiko. Amo uzepyk iko zanerehe. Zanemaranugar zane. Naxiawy kwaw kuzà imemryxak etea'i ma'e zane. Ikàgaw nuhyk kwaw izupe. A'e rupi imemry nuzexak kar kwaw. **4** Axir wanuwhawete umur kar zauxiapekwer wanuwhaw urewe a'e. Uze'eg zemueteahy Tupàn Tuweharupi Wiko Ma'e rehe. Tuwe Tupàn Tuweharupi Wiko Ma'e Zanezar wenu waze'eg zemueteahy haw nehe. Tuwe uzepyk uze'eg zemueteahy ma'e kwer wanehe nehe. Nezewe rehe we eze'eg Tupàn pe teko xe har wikiwe ma'e wanehe nehe, i'i Ezeki Izai pe.

**5** Ezeki pe uma'erekó ma'e weraha iz'e'g Izai pe wà kury. **6** Umur kar Izai ko ze'eg Ezeki pe. — Nezewe i'i Tupàn Tuweharupi Wiko Ma'e iko newe kury. — Tuwe Axir nanemupytuhegatu kar kwaw wà nehe. Nezewe i'i waiko wà. — Tupàn nupuner kwaw pepyro haw rehe a'e, i'i Axir waiko peme wà. Pezekaiw zo waze'eg rehe. **7** Tupàn wenu kar putar amo ma'e uzeapo ma'e kwer imume'u awer Axir wanuwhaw pe nehe. Henu mehe uzewyr putar weko

haw pe uiwy pe nehe. Tupàn uzuka kar putar tuwhawete a'e pe nehe, i'i Izai izupe.

**Axir ywy rehe har ipuruàmàtyry'ym wi wer Zeruzarez pe har wanehe**

**8** Axir wanuwhawete uhem Arahi wi Irimina tawhu iàmàtyry'ym pà. A'e tuwhaw Ezeki pe uze'eg ma'e a'e, ukwaw uwihawete hemiapo a'e. A'e rupi oho Irimina pe izupe uze'eg pà. **9** Sirak Exio wanuwhawete werur zauxiapekwer Ezit ywy rehe har tetea'u wanerekò Axir wakutyr wà kury. Axir ukwaw wanur àwàm a'e wà. Umume'u uwihawete pe wà. Henu mehe Axir wanuwhawete omono kar amo pape Ezeki Zuta wanuwhawete pe kury. **10** Nezewe i'i a'e pape. — Tupàn nezar rehe erezeruzar iko ne. — Axir wanuwhawete nupyhyk kwaw Zeruzarez a'e nehe, i'i Tupàn newe. Hemu'em iko newe. Ezeruzar zo hehe nehe. **11** Wyzài ywy imumaw mehe, azapo iaiw ma'e a'e ywy rehe har wanupe ihe. Aipo erekwaw wanupe heremiapo kwer. Aipo erepuner hepô wi nezepyro haw rehe nehe. **12** Axir wanuwhawete heipy a'e wà, weityk tawhu Koà ywy rehe har paw wà. Weityk tawhu Àrà ywy rehe har paw wà no. Weityk tawhu Hezep ywy rehe har paw wà no. Uzuka teko Èn ywy rehe har Teraxa tawhu pe har wà no. Wazar a'e wà, a'e tupàn a'u'a u'a'e wà, nupuner kwaw wapyro haw rehe a'e wà. **13** Nema'enukwaw katu amo tawhu wanuwhawete wanehe ne. Amat tawhu pe har wanuwhawete. Arapaz tawhu pe har wanuwhawete. Xepawaim tawhu pe har wanuwhawete. Ena tawhu pe har wanuwhawete. Iwa tawhu pe har wanuwhawete. Ma'e pe wanekon a'e tuwhawete kutàri wà, i'i izupe a'e, uze'eg a'e pape rehe imuapyk pà a'e.

**14** Pape herur har omono pape tuwhawete Ezeki pe wà kury. Umugeta Ezeki. Na'e oho Tupàn Hàpuzuhu pe kury. Omono a'e pape a'e pe Tupàn Tuweharupi Wiko Ma'e henataromo kury. **15** Uze'eg nezewe izupe. — O Tupàn Tuweharupi Wiko Ma'e Izaew wazar. Ereapyk in nerentaw rehe Kerumin

wa'aromo ne. Xo ne zo ereiko Tupàn romo. Ereiko teko ywy nànànar wazar romo. Erezapo ywak kwehe mehe. Erezapo ywy no. **16** O Tupàn Tuweharupi Wiko Ma'e. Exak urewe uezapo ma'e nehe. Einu katu ma'e Xenakeriw hemimume'u nehe. Uze'eg zemueteahy iko nerehe, Tupàn. **17** Axir wanuwiaw umumaw teko tetea'u wà. Umuaiw waiwy wà no. **18** Wapy tupàn a'ua'u a'e ywy rehe har wà no. Nuiko kwaw tupànete romo wà. Xo ma'e hagaw paw romo ywyra iapo pyrer ita iapo pyrer romo wanekon wà. Teko uzapo a'e tupàn a'ua'u opo pupe wà. **19** Kutàri, Tupàn Tuweharupi Wiko Ma'e urezar, urepyro pe Axir wanuwi nehe. Nezewe mehe teko ywy nànànar ukwaw putar Tupàn Tuweharupi Wiko Ma'e romo nereko haw a'e wà nehe. Tupànete romo ereiko, i'i Ezeki Tupàn pe.

### **Izai omono kar uze'eg tuwhiawete pe**

**20** Na'e Izai omono kar amo ze'eg tuwhiawete Ezeki pe kury. **21** — Tupàn Tuweharupi Wiko Ma'e Izaew uwazar putar neze'eg newe nehe kury, i'i izupe. — Zeruzarez tawhu pe har upuka waiko nerehe wà, Xenakeriw. Uze'eg urywahyahy waiko nerehe wà. **22** Mo rehe ereze'eg zemueteahy ne. Mo wi ereiko wera'u. Mo rehe ereze'eg urywahyahy. A'e ma'e pawerezapo ihewe. Aiko Tupàn Izaew wazar uzemonokatu ma'e romo ihe. **23** Eremur kar neze'eg herur har ihewe ne wà. — Heta tetea'u ywyramawa ihewe wà. Apyhyk ywytyr aiha katu wera'u ma'e Irimano ywy rehe har ihe wà. Amonohok ywyra ywyràkàxigyw aiha wera'u ma'e ihe wà no. Amonohok ywyra xipere aiha wera'u ma'e ihe wà no. Ahem ka'a muitea'u har pe ihe no, ere ihewe. **24** — A'ywykàz ytyzùzàmaw ywy muitea'u har rehe ihe. Ai'u a'e ytyzùzàmaw rehe ihe, ere ihewe. — Zauxiapekwer heremiruze'eg wapy umuxinig kar yrykaw Niru her ma'e wà, ere ihewe.

**25** Kwehe mehe hemal'enukwaw a'e ma'e rehe ihe. Ko 'ar rehe azapo kar iteko newe kury. Aipo erekwaw ko ma'e ne. Ereity

tawhu pàrirogaw hereko har echo ne wà, ywytyr tykwer iapo pyr romo erezapo a'e tawhu wanupe. Ihe amono nekàgaw newe a'e ma'e iapo kar pà newe. **26** A'e rupi a'e ywy rehe wiko ma'e na'ikàg kwaw a'e wà. Ukyze tuwe oho waiko wà. Imaranugar wà no. Nuzawy kwaw ka'api'i kaiwer rehe har wà. Nuzawy kwaw ka'akyr izu ma'e wà. Nuzawy kwaw ka'akyr tåpuz 'aromo hezuz ma'e wà. Ywytyr ur kwarahy hemaw wi a'e ka'api'i imuxinig kar pà.

**27** Ihe urukwaw katu ihe. Akwaw neremiapo kwer. Akwaw neho àwàm. Naneakatuwawahy kwaw herehe. Akwaw nereko haw. **28** Akwaw herehe neakatuwawahy 'ym awer. Akwaw amogwer wanuwi nezemuigo kar awer. Amono putar amo iapu'a ma'e nexi rupi nehe kury. Amono putar amo nemupytu'u kar àwàm nezuru pupe nehe. Urumuzewyr kar putar nerape kwer rupi ihe nehe kury, i'i Tupàn iko Xenakeriw pe, i'i Izai Ezeki pe.

**29** Na'e uze'eg wi Izai tuwhiawete Ezeki pe kury. — Uzeapo putar amo ma'e a'e nehe. A'e ma'e hexak mehe erekwaw putar amogwer uezapo ma'e ràm wanur etea'i àwàm nehe. Ko kwarahy rehe nehe, kwezomo kwarahy rehe nehe no, pe'u putar xo hezuz e ma'e zo nehe, teko hemitym 'ygwer zo pe'u putar nehe. Mokoz kwarahy pawire pepuner arozràñ itymaw rehe ipo'o haw rehe nehe. Pepuner uwà hà'yz itymaw rehe nehe no. Pepuner uwà tykwer win i'u haw rehe nehe no. **30** Zuta ywy rehe har umàno 'ym ma'e kwer nuzawy kwaw ka'a ywy rehe wapy imuixe katu har wà nehe. Nuzawy kwaw ma'e a'iakatu ma'e wà nehe. **31** Ta'e heta we putar teko Zeruzarez pe wà nehe, ywytyr Xiàw rehe wà nehe no. Ta'e Tupàn Tuweharupi Wiko Ma'e ipurapo kar wer a'e ma'e rehe a'e xe, i'i izupe.

**32** Uze'eg wi Izai. — Nezewe uze'eg Tupàn Tuweharupi Wiko Ma'e iko Axir wanuwiawete rehe a'e kury. — Axir wanuwiawete nuixe kwaw 'aw tawhu pupe a'e nehe. Ni pitài u'yw nomomor kwaw ikutyr nehe. Ni pitài zauxiapekwer u'yw wi purumimaw hereko har uhem putar 'aw tawhu

huwake wà nehe. Nuzapo kwaw pyropyrogaaw tawhu izywyr ipupe uezupir àwàm wà nehe.

**33** Axir wanuwhawete uzewyr putar wape kwer rupi nehe, 'aw tawhu pupe wixe 'ym pà nehe. **34** Azekaiw katu putar 'aw tawhu rehe nehe. Apyro putar 'aw tawhu nehe. Ta'e namuze'eg kar kwaw teko herer ikatu ma'e rehe ihe wà nehe xe. Ta'e kwehe mehe azapokatu heze'eg heremiruze'eg Tawi pe ihe xe. Ihe Tupàn Tuweharupi Wiko Ma'e ihe kury, aze'eg kwez ihe kury, i'i Tupàn newe, i'i Izai Ezeki pe.

**35** A'e 'ar mehe we pyhaw Tupàn reko haw pe har oho Axir waker haw pe kury. Uzuka 185 miw zauxiapekwer a'e pe wà. Iku'egwer pe wikuwe ma'e wexak umàno ma'e kwer wanetekwer tetea'u a'e pe wà.

**36** Na'e Xenakeriw Axir wanuwhawete uhem oho a'e wi kury. Uzewyr Nin tawhu pe. Upyta a'e pe. **37** Amo 'ar mehe umuwete katu uzar tupàn Nihok her ma'e oho hâpuzuhu pe. Heta mokoz ta'yri izupe a'e wà. Anaramerek ta'yri ipy her romo a'e. Xarezer inugwer ta'yri her romo a'e. A'e ta'yri uzuka u oho a'e pe wà, utakihe pupe wà. A'e re użan Ararat ywy rehe wà. Amo ae ta'yri Ezar-Anom her ma'e wiko tuwhawete romo u hekuzaromo.

**Tupàn umukatu tuwhawete Ezeki**

**20** <sup>1</sup>A'e kwarahy rehe ima'eahy tuwhawete Ezeki. Umàno târia'i. Tupàn ze'eg imume'u har Izai Amoz ta'yri oho hexak pà kury. — Nezewe i'i Tupàn Tuweharupi Wiko Ma'e newe, i'i izupe. — Emuàgà'yim nema'e paw nehe. Ta'e nanekatu kwaw nehe. Ezemùagà'yim nemàno àwàm rehe nehe, i'i iko newe, i'i Izai izupe.

**2** Na'e uwak Ezeki pàrirogaw kutyr ume'e pà. Uze'eg Tupàn pe.

**3** — O Tupàn Tuweharupi Wiko Ma'e. Tuweharupi aiko neremiruze'eg romo ihe. Ama'ereko katu tuwe newe heptytu'u 'ym pà. Tuweharupi azapo neremipa putar haw iteko, i'i izupe. Na'e uzai'oahy kury.

**4** Izai uhem ipupaikaw pyrer tuwhawete heko haw wi. Tapuzuhu myter pe oho mehe

we Tupàn Tuweharupi Wiko Ma'e uze'eg izupe.

**5** — Ezewyr Ezeki pe kury. Eze'eg nezewe heremiaihu wanuwhawete pe nehe. — Ihe Tupàn Tuweharupi Wiko Ma'e neipy Tawi ijar ihe, Aenu ihewe neze'eg mehe kwez ihe. Aexak nerehay kwer no. Urumukatu putar nehe. Na'iruz 'ar pawire ereho putar heràpuzuhu pe nehe. **6** Amono putar amo 15 kwarahy newe. Xo 15 kwarahy pawire zo eremàno putar nehe. Amono kar putar Axir wanuwhawete 'aw tawhu Zeruzarez wi ihe nehe. Apyro putar 'aw tawhu izuwi nehe, ta'e namuze'eg zemueteahy kar kwaw teko herer ikatu ma'e rehe ihe wà nehe xe, ta'e azapokatu heze'eg heremiruze'eg Tawi pe kwehe mehe ihe xe, ere Ezeki pe nehe, i'i Tupàn Izai pe.

**7** Na'e uze'eg Izai kury. — Pemu'imü'i ma'e kwer pi her ma'e imuapu'a pyr romo iapo pà nehe. Pemono tuwhawete iperew rehe nehe. A'e re ikatu putar nehe.

**8** Upuranu Ezeki hehe. — Ma'e uezapo putar hemukatu àwàm hexak kar pà ihewe nehe, ta'e na'iruz 'ar pawire heho wer tâpuzuhu pe ihe xe, i'i izupe.

**9** Uwazar Izai ize'eg izupe. — Tupàn Tuweharupi Wiko Ma'e wexak kar putar amo ma'e newe nehe, uze'eg awer rupi katete wemiapo ràm hexak kar pà newe nehe. Ma'enugar ma'e ereputar. Aze ru'u, pyropyrogaaw i'ág oho putar kwerupi na'arewahy nehe, aze ru'u, ur putar ko rupi nehe. Ma'enugar ityryk àwàm ereputar nehe, i'i izupe.

**10** Uwazar Ezeki ize'eg izupe. — Kwarahy ihmaw kutyr i'ág imunyryk àwàm nazawaiw kwaw Tupàn pe. Tuweharupi oho ikutyr a'e. Aputar i'ág kwarahy heixe haw kutyr izewyr àwàm. Nezewe mehe akwaw putar Tupàn ikàgaw nehe, i'i izupe.

**11** Na'e Izai uze'eg Tupàn Tuweharupi Wiko Ma'e pe kury. Tupàn umuzewyr kar pyropyrogaaw i'ág kwarahy heixe haw kutyr kury. Kwehe mehe tuwhawete Akaz uzapo a'e pyropyrogaaw.

**Mawiron wanuwhiwete omono  
kar uze'eg heraha har Ezeki pe wà**

12 A'e kwarahy rehe Meronak-Màrànà Mawiron pe har wanuwhiwete a'e, Màrànà ta'yr a'e, ukwaw tuwhiwete Ezeki ima'eahy awer a'e. A'e rupi omono kar amo pape izupe. Omono e amo ma'e izupe imurywete kar haw romo no. 13 Umuixe katu kar Ezeki ize'eg herur har wamuwà wà. Wexak kar wemetarer paw wanupe. Itaxig parat, itazu or no, taz záwenugar no, kápuhág no, takihepuku no, purukutukaw no, ywyramawa no. Wexak kar ma'e uma'e imonokatu haw pe har wanupe upaw rupi katete a'e. 14 Na'e Tupàn ze'eg imume'u har Izai uze'eg oho izupe. Upuranu hehe. — Ma'e wi ko awa wanur wà. Ma'in newe wà, i'i izupe. Uwazar Ezeki ize'eg izupe. — Ur amo ywy xe wi muitea'u har wi wà. Ur Mawiron ywy wi wà, i'i izupe.

15 Upuranu wi Izai hehe. — Ma'e wexak neràpuzuhu pupe wà, i'i izupe. — Wexak ma'e upaw rupi katete wà. Aexak kar hem'a'e imonokatu haw pe har wanupe upaw rupi katete ihe, i'i tuwhiwete Izai pe.

16 Uze'eg wi Izai tuwhiwete pe kury. 17 — Amo 'ar mehe zauxiapekwer weraha putar a'e ma'e paw Mawiron pe a'e wà nehe. Neipy omono'og a'e ma'e a'e temetarer paw wà. Eremonokatu neràpuzuhu pupe. Nupyta kwaw ni pitái nema'e xe nehe. Weraha putar upaw rupi katete wà nehe. 18 Upyhyk putar amo nera'yir waneraha pà wà nehe no. Uzapo putar nera'yir hapi'a 'ym ma'e romo wà nehe. A'e re uma'erekoo putar Mawiron wanuwhiwete ràpuzuhu pupe wà nehe, i'i Izai tuwhiwete pe.

19 — Herekuwe mehe we heremaihu wiko putar katu haw rehe zeàmàtyry'ym pà wà nehe. Xo hemànre re uezapo putar agwer iaiw ma'e nehe, i'i Ezeki uezupe. A'e rupi uze'eg Ezeki nezewé Izai pe kury. — Tupàn Tuweharupi Wiko Ma'e ize'eg ihewe neremimur kwer ikatuahy a'e, i'i izupe.

**Amogwer Ezeki hemiapo kwer**

20 Amo umuapyk amogwer tuwhiwete Ezeki hemiapo kwer a'e pape Zuta

wanuwhiwete wanemiapo kwer her ma'e rehe. Umum'e'u hemiapo ikyze 'ym mehe arer. Umume'u hemiapo kwer ytyuzàmaw no. Uzapo amo pe ywy wy pe har 'y heraha haw tawhu wy pe har no. A'e ma'e paw amo umuapyk a'e pape rehe. 21 Umàno Ezeki. Ta'yr Manaxe wiko tuwhiwete romo hekuzaromo.

**Manaxe wiko Zuta wanuwhiwete romo**

**21** 1 Wereko Manaxe 12 kwarahy Zuta wanuwhiwete romo wiko mehe. Umumaw 55 kwarahy Zeruzarez pe tuwhiwete romo wiko pà. Ezima ihy her romo a'e. 2 Uzapo Manaxe ikatu 'ym ma'e Tupàn Tuweharupi Wiko Ma'e henataromo. Kwehe Izaew upyro a'e ywy a'e ywy rehe har wanuwi uhàuház mehe wà. A'e ywy rehe har uzapo iaiw ma'e tuweharupi tupàn a'ua'u wamuwete mehe wà. Manaxe uzapo kar agwer ma'e Izaew wanupe kury. 3 Uzapo wi tupàn a'ua'u wamuwete haw. Manaxe tu Ezeki her ma'e weityk a'e wamuwete haw a'e 'ym mehe a'e. Manaxe uzapo kar wi. Uzapo wi Ma'aw imuwete haw. Umupu'äm wi ywyra tupàn a'ua'u hagaw paw no, Izaew wanuwhiwete Akaw her ma'e hemiapo kwer zawegatete no. Manaxe umuwete katu zahytata a'e no. 4 Uzapo tupàn a'ua'u wamuwete haw Tupàn Hápuzuhu pupe no. A'e 'ym mehe Tupàn umume'u ko ma'e teko Izaew wanupe. — Hemuwete katu 'ág tâpuzuhu pupe nehe. Manaxe umuwete kar tupàn a'ua'u tâpuzuhu pupe a'e wà kury. 5 Tupàn Hápuzuhu huwakea'i katu pe uzapo Manaxe ma'e'a'yir hapy haw zahytata wamuwete haw romo wà. 6 Uzuka wa'y tata pupe hapy pà tupàn a'ua'u wanenataromo wamuwete katu pà no. Umume'u ma'e uezapo ma'e ràm oho iko. Umume'u ma'e ikwaw pyr 'ym oho iko no. Uzapo purumupytuhegatu kar haw paze ài no. Upuranu umàno ma'e kwer pe uze'eg ma'e wanehe no. Upuranu tekwe ikatu 'ym ma'e pe uze'eg ma'e wanehe no. Uzapo ikatu 'ym ma'e teteal'u Tupàn Tuweharupi Wiko Ma'e henataromo. Na'ikatu kwaw hemiapo kwer Tupàn pe. A'e rupi wikwahy

Tupàn kury. **7** Umupu'äm Manaxe ywyra aiha ma'e Tupàn Hàpuzuhu pupe. Kwehe mehe Tupàn Tuweharupi Wiko Ma'e uze'eg nezewe Tawi pe a'e, ta'y'r Xàrumàw pe a'e no. — Ame'eg Izaew ta'y'r wazuapyapr waiwy ihe. Aexaexak 'ág tåpuzuhu Zeruzarez pe har ihe. Teko hemuwete katu putar xe awyzeharupi a'e wà nehe. **8** Aze teko Izaew izuapyapyrus weruzar heze'eg paw wà nehe, aze uzapo ma'e paw heze'eg wanupe Moizez hemimono kwer wà nehe, a'e mehe namuhem kar kwaw ko ywy wi amo ae teko wanupe ihe wà nehe. Ta'e amono ko ywy waipy wanupe kwehe mehe ihe xe, i'i Tupàn Tawi pe Xàrumàw pe kwehe mehe. **9** Zuta izuapyapyrus nuweruzar kwaw Tupàn ze'eg wà. Manaxe uzapo kar iaiw ma'e tetea'u wanupe. Wanemiapo kwer iaiw wera'u a'e ywy rehe arer kwehe arer Tupàn hemityk kwer wanemiapo kwer wanuwi wà. Kwehe mehe Tupàn weityk kar a'e teko Izaew wanupe. A'e rupi Izaew upyro waiwy oho waiko wanuwi wà kury.

**10** Tupàn umuze'eg kar uze'eg imume'u har teko wanupe kury.

**11** — Zuta wanuwhawete Manaxe uzapo iaiw ma'e oho iko a'e. Hemiaipo kwer iaiw wera'u Amohe wanemiapo kwer wanuwi wà. Uzapo tupàn a'ua'u wà, a'e rupi uzapo kar ikatu 'ym ma'e Zuta wanupe. **12** A'e rupi ihe Tupàn Tuweharupi Wiko Ma'e Izaew wazar ihe, amu'ar putar iaiw pàwàm uhua'u ma'e imuwa' Zeruzarez rehe Zuta rehe ihe nehe. Imume'u haw henu mehe teko ipytuhegatu putar wà nehe. **13** Azepyk putar Zeruzarez rehe nehe. Kwehe mehe azepyk tawhu Xamari rehe. Azepyk Izaew wanuwhawete Akaw rehe no. Azepyk Akaw izuapyapyrus nehe. Nezegagete azepyk putar Zuta ywy rehe har wanehe ihe nehe. Amuhem kar putar teko paw Zeruzarez wi ihe wà nehe. Nuzawy kwaw kawaw imukatu pyrer imuvak pyrer nehe. **14** Apuir putar teko umàno 'ym ma'e kwer ihe wà nehe. Amono putar a'e teko wàmàtyry'ymar wanupe ihe wà nehe. Wàmàtyry'ymar upyhyk putar a'e teko a'e wà nehe. Imunar putar wama'e paw

wanehe waiwy rehe har paw wanehe wà nehe no. **15** Azapo putar a'e ma'e heremaihuhu wanupe ihe nehe, ta'e uzapo ma'e heremimutar 'ym a'e wà xe. Wanemiapo kwer iro ihewe. Hemuikwahy kar wà. Waipy Ezit ywy wi wahemaw henataromo te kutàri hemuikwahy kar wà waiko tuweharupi wà, i'i Tupàn teko wanupe.

**16** Manaxe uzuka teko ikatu 'ym ma'e iapo 'ymar tetea'u a'e wà. Pe Zeruzarez myter pe har tynehem wanuwykwer pupe. Uwyryk wanuwy kwer pe rupi. Umuwete kar tupàn a'ua'u teko wanupe wà no. Uzawy tuwe Tupàn rape a'e. Hemiaipo kwer na'ikatu kwaw Tupàn Tuweharupi Wiko Ma'e pe.

**17** Amo umume'u amogwer Manaxe hemiaipo kwer paw a'e pape Zuta wanuwhawete wanemiapo kwer her ma'e rehe. Umume'u hemiaipo kwer iaiw ma'e paw no. **18** Umàno Manaxe. Utym hetekwer hàpuzuhu huwake ma'etymaw Uza her ma'e pe. Ta'y'r Amon wiko tuwhawete romo hekuzaromo kury.

#### **Amon wiko Zuta wanuwhawete romo**

**19** Wereko Amon 22 kwarahy Zuta wanuwhawete romo wiko mehe. Umumaw mokoz kwarahy tuwhawete romo wiko pà Zeruzarez pe. Mezuremet ihy her romo a'e. Aruz tazyr romo hekon. Tawhu Zomata her ma'e pe har romo hekon.

**20** Amon nuzawy kwaw u Manaxe a'e. Hemiaipo kwer na'ikatu kwaw Tupàn Tuweharupi Wiko Ma'e pe. **21** Uzapo ma'e u hemiaipo kwer zàwenugar. Úmuwete tupàn a'ua'u u hemimuwete kwer wà, wanemiruze'eg romo wiko pà wà. **22** Nezewe Amon utyryk Tupàn Tuweharupi Wiko Ma'e wipy wazar wi. Nuweruzar kwaw ize'eg.

**23** Amo 'ar mehe amogwer tuwhaw Amon rehe we har umume'u izuka àwàm uzepeupe wà kury. Na'e uzuka oho hàpuzuhu pupe wà.

**24** Teko Zuta ywy rehe har a'e wà kury, uzuka Amon izuka arer paw a'e wà kury. Umuigo kar ta'y'r Zuzi hekuzaromo tuwhawete romo wà kury.

**25** Amo umume'u amogwer Amon hemiapo kwer paw a'e pape Zuta wanuwhawete wanemipa kwer her ma'e rehe. **26** Utym Amon hetekwer itymaw pupe wà, ma'etymaw Uza her ma'e pe wà. Ta'yri Zuzi wiko tuwhawete romo hekuzaromo.

**Zuzi wiko Zuta wanuwhawete romo**  
**22** <sup>1</sup> Wereko Zuzi 8 kwarahy Zuta wanuwhawete romo wiko mehe. Umumaw 31 kwarahy Zeruzarez pe tuwhawete romo wiko pà. Zeni ihy her romo a'e. Anai tazyr romo hekon. Mokat tawhu parer romo hekon. **2** Zuzi hemiapo kwer ikatu Tupàn Tuweharupi Wiko Ma'e pe. Nuzawy kwaw wipy tuwhawete Tawi a'e. Nuhem kwaw Tupàn rape wi, ni ko rupi, ni kwe rupi.

### *Iwki wexak pape Tupàn ze'eg hereko har tāpuzuhu pupe*

**3** Tuwhawete romo wiko mehe 18 haw kwarahy rehe wenoz uze'eg imuapykar uezuepe kury. Xàpà her romo a'e. Azari ta'yri romo Mexurà hemimino romo hekon. Omono kar Zuzi Xàpà Tupàn Hàpuzuhu pe kury.

**4** — Eze'eg echo xaxeto wanuwhawete Iwki her ma'e pe kury. — Epapar temetarer xaxeto tāpuzuhu rehe uzekaiw ma'e wanemimono'og kwer nehe. Ta'e teko werur wemetarer kury a'e pe hezar pà wà xe. **5** Tuwe omono a'e temetarer awa tāpuzuhu iapo katu har wanuwhaw wanupe nehe. A'e tuwhaw a'e wà nehe, tuwe omono temetarer **6** wyrya pinar wanupe wà nehe, tāpuzuhu iapo har wanupe wà nehe no, ita ima'ema'e har wanupe wà nehe no. Ta'e uma'ereko waiko tāpuzuhu iapo katu pà wà xe. **7** Awa tāpuzuhu iapo katu har ikatu a'e wà. Nuiko kwaw ma'e rehe imunar ma'e romo wà. A'e rupi ezeruzar wanehe nehe. — Ma'e peme'eg kar a'e temetarer rupi, peze zo wanupe nehe, ere Iwki pe nehe, i'i Zuzi Xàpà pe.

**8** Umume'u Xàpà tuwhawete ze'eg awer oho Iwki pe. Iwki umume'u amo ma'e Xàpà pe. — Aexak pape Tupàn ze'eg kwehe arer hereko har xe tāpuzuhu pupe ihe, i'i izupe. A'e rupi omono a'e pape Xàpà pe. Umugeta Xàpà

a'e pape uezuepe. **9** A'e re uezuep Xàpà oho tuwhawete pe. — Newe uma'ereko ma'e upyhyk temetarer tāpuzuhu pe imono'og pyrer a'e wà. Omono tāpuzuhu pe imono'og pyrer a'e wà. Omono tāpuzuhu iapo katu har wanupe wà, i'i izupe.

**10** Umume'u amo ma'e tuwhawete pe no. — Areko amo pape xe hepó pe ihe. Iwki umur ko pape ihewe, i'i izupe. Na'e umugeta a'e pape tuwhawete pe kury. **11** A'e Tupàn ze'eg pape rehe imuapyk pyrer henu mehe umu'i tuwhawete ukamirpuku, ta'e uzemumikahy tuwe a'e xe. **12** Na'e omono'og amo tuwhaw uezuepe wanenoz pà wà kury. Xaxeto Iwki, Àikà Xàpà ta'yri, Amor Mikai ta'yri, Xàpà tuwhawete ze'eg imuapyk kar, Azai tuwhawete pe uma'ereko ma'e. Ur ipyr paw rupi wà. Nezewe uze'eg wanupe.

**13** — Pepuranu peho Tupàn Tuweharupi Wiko Ma'e rehe herekuzaromo Zuta wanekuzaromo nehe. Peze'eg izupe ko pape rehe nehe. — Ma'e uruzapo putar nehe, peze izupe nehe. Tupàn wikwahy zanerehe, ta'e zaneipy nuweruzar kwaw ze'eg ko pape rehe imuapyk pyrer a'e wà xe.

**14** Na'e a'e awa uhem oho a'e wi wà. Iwki, Àikà, Amanom, Xàpà, Azai. Uze'eg oho amo Tupàn ze'eg imume'u har kuzà Una her ma'e pe wà. Wiko Zeruzarez pehegwer ipyahu ma'e rehe. Imen a'e, Xarum her romo a'e. Xiwa ta'yri romo Ara hemimino romo hekon. Uzekaiw imen xaxeto wakamir rehe a'e. A'e awa umume'u ma'e uezapo ma'e kwer oho Una pe wà. **15** — Pezewyr tuwhawete pe ko ma'e imume'u pà izupe nehe, i'i wanupe.

**16** — Nezewe i'i Tupàn Tuweharupi Wiko Ma'e Izaew wazar newe kury. — Ihe azepyk putar Zeruzarez tawhu rehe ihe nehe, teko ipupe har paw wanehe nehe no. Ta'e nezewe i'i a'e pape tuwhawete hemimugeta kwer a'e xe. **17** Teko upuir ihewi a'e wà. Uzuka ma'ea'yr amo ae tupàn wanenataromo wà. A'e rupi hemiukwahy kar wemiapo kwer paw rehe wà. Hekwahy haw tata zàwenugar umunyk wà. Aikwahy Zeruzarez pe har wanehe. Nuwew kwaw a'e tata. **18** Ihe Tupàn Tuweharupi Wiko Ma'e Izaew wazar

amume'u putar ko ma'e ihe nehe kury, tuwhiwete rehe heze'eg pà ihe nehe kury.

— Erenu heze'eg a'e pape rehe imuapyk pyrer ne. **19** A'e rupi erezemumikahy neremiapo kwer wi. Erezemumew herenataromo uma'erek e ma'e ài. Eremu'i nekamir nezai'o pà heze'eg henu mehe. Ta'e amume'u Zeruzarez rehe teko wanehe hezepyk àwàm ihe xe. Azapo putar Zeruzarez amo ma'e hexakaw iro ma'e romo nehe. Aze teko ipurumume'u wer uze'egaiw amo rehe wà nehe, umume'u putar 'aw tawhu her wà nehe. Ihe Aenu ihewe neze'eg mehe. **20** A'e rupi xo nemànò re zo azepyk putar Zeruzarez rehe ihe nehe. Erepuner nemànò haw rehe katu haw rehe nehe, i'i Tupàñ newe, i'i Una a'e awa wanupe. Na'e umume'u a'e awa a'e ze'eg oho tuwhiwete pe wà kury.

### **Zuzi uzapokatu uze'eg Tupàñ rehe we**

**23** <sup>1</sup>Na'e tuwhiwete Zuzi omono'og Zuta wanuwhaw paw Zeruzarez pe har wanuwhaw paw uzeupe wanenoz pà wà kury. **2** A'e paw oho Tupàñ Hápuzuhu pe wà. Xaxeto oho wanupi wà no. Tupàñ ze'eg imume'u har oho wanupi wà no. Teko paw oho wanupi wà no. Ikàg ma'e hemetarer katu ma'e oho wà. Hemetarer 'ym ma'e oho wà no. Na'e tuwhiwete umugeta a'e Tupàñ ze'eg pape rehe har tåpuzuhu pe hexak pyrer paw wanupe kury. **3** Upù'am izita tuwhiwete wapu'ämaw huwake. Uzapokatu uze'eg Tupàñ Tuweharupi Wiko Ma'e rehe we kury. — Ureruzar putar neze'eg tuweharupi ure nehe. Oromonokatu putar neremiapo putar haw nehe no. Ureruzar katu putar urepy'a nànàñ nehe. Urerukwe nànàñ ureruzar putar neze'eg nehe. Aze neze'eg uzapo kar ma'e urewe, uruzapo putar a'e ma'e paw ure nehe, i'i tuwhiwete Tupàñ pe teko wanekuzaromo. Na'e teko paw umume'u katu a'e ma'e paw iapo àwàm wà. **4** Na'e uze'eg Zuzi Iwki xaxeto wanuwhawete pe, xaxeto ipytywà har wanupe no, zauxiapekwer tåpuzuhu rehe uzekaiw ma'e tåpuzuhu ukenaw rehe upyta ma'e wanupe no. — Penuhem tupàñ Ma'aw

imuwtete haw paw tåpuzuhu wi nehe, Tupàñ Tuweharupi Wiko Ma'e råpuzuhu wi nehe. Penuhem ywyra pukua'u tupàñ a'ua'u imuwtete haw xe wi nehe no. Penuhem zahytata imuwtete haw xe wi nehe no, i'i wanupe. Weruzar iz'e'eg wà. Weraha muite tawhu wi kaiwer pe wa. A'e pe tuwhiwete umunyk tata a'e ma'e hapy pà upaw rupi. Ywyapyznaw Xenorom her ma'e rehe wapy a'e ma'e. Na'e weraha kar tåtäpypzgwer Metew tawhu pe. **5** Omono kar tupàñ a'ua'u waxaxeto a'e wi wà. A'e 'ym mehe amo ae Zuta wanuwhiwete umuigo kar amo awa xaxeto romo tupàñ a'ua'u wanenataromo wà. Uzuka ma'e'a'yr tupàñ a'ua'u wanenataromo wà. Tawhu Zuta ywy rehe har nànàñ heta tupàñ a'ua'u wamuwtete haw wà. Taw Zeruzarez huwake har nànàñ heta tetea'u wà no. Tuwhiwete Zuzi omono kar a'e xaxeto paw a'e tawhu wanuwi wà. Zuzi omono kar amo waxaxeto a'e wi wà no. Tupàñ Ma'aw xaxeto wà, kwarahy xaxeto wà no, zahy xaxeto wà no, zahytata xaxeto wà no, zahytata uhu ma'e xaxeto wà no. **6** Wenuhem ywyra pukua'u tupàñ ua'u hagapaw romo iapo pyrer Tupàñ Hápuzuhu wi no. Weraha muite tawhu wi ywyapyznaw Xenorom pe. Wapy tata pupe. Umuzeapo kar tåtäpypzgwer romo. Na'e uhàuhàz tåtäpypzgwer twypaw rehe teko hemetarer 'ym ma'e wanetekwer watym awer rehe. **7** Weityk awa wyzai tupàñ a'ua'u wanenataromo kuzà wanehe we ma'e iapo har waker haw oho. Tupàñ Hápuzuhu pupe uker wà. Amo kuzà oho a'e ipupyaikaw pe kamir iapo pà hopoz iapo pà wà. Xaxeto umunehew a'e ma'e ywyra pukua'u henataromo ma'e'a'yr izuka mehe wà. **8** Tuwhiwete Zuzi weraha xaxeto paw Zeruzarez pe wà kury. Tawhu Zuta ywy rehe har wanehe arer wà, a'e ywy nànàñ arer wà no. Uzypyrog Zema pe Merexewa pe oho pà. Omono'ono'og xaxeto paw wà. Umuaiw tupàñ a'ua'u wanenataromo ma'e'a'yr hapy haw paw wà. Ta'e a'e xaxeto uzuka ma'e'a'yr a'e wazuka haw rehe tupàñ a'ua'u wanupe wà xe. Weityk tuwhiwete tekwe ikatu 'ym ma'e ywyxiguhu rehe har wamuwtete haw paw no. A'e 'ym mehe Zuzue

a'e, tawhu pe har wanuwhiwah a'e, uzapo a'e ma'e'a'yr happy haw pàrirogaw ukenaw huwake a'e. Aze amo wixe tawhu pupe, a'e ukenaw iawyze har rehe hin. Tuwhiweté Zuzi weityk a'e ma'e'a'yr happy haw kury.

**9** — Napepuner kwaw ma'e'a'yr wazuka haw rehe Tupàn Tuweharupi Wiko Ma'e ràpuzuhu pupe pe wà nehe kury, i'i tuwhiweté a'e xaxeto wanupe kury. — Pepuner typy'ak imuapiruru kar pyr 'ym i'u haw rehe amogwer xaxeto wanehe we nehe, i'i wanupe.

**10** Tuwhiweté Zuzi umuaiw tupàn a'ua'u wamuwete haw Inom ywyàpyznaw rehe har Topet her ma'e a'e no. A'e re ni amo nupuner kwaw wa'yr izuka haw rehe tupàn Morok her ma'e imuawyze kar pà wà kury. Nupuner kwaw wazyr izuka haw rehe wà no. **11** A'e 'ym mehe Zuta wanuwhiweté omonokatu amo kawaru kwarahy imuwté haw rehe wà. Omonokatu ywyramawa wà no. Tuwhiweté Zuzi upyro a'e kawaru a'e ywyramawa teko wanuwi xaxeto wanuwi wà no. Xaxeto omonokatu a'e ywyramawa Tupàn Hàpuzuhu huwakea'i katu pe wà, ukenaw huwake wà, Nàtàmerek ker haw huwake wà. Nàtàmerek wiko tuwhiweté ikàg ma'e tuwhiweté rehe we a'e. Tuwhiweté Zuzi wenuhem a'e ma'e a'e wi wà. **12** A'e 'ym mehe Zuta wanuwhiweté uzapo tupàn a'ua'u wamuwete haw tâpuzuhu 'aromo har imuàtâ pyrer rehe wà no, tuwhiweté Akaz heko haw 'aromo wà. Weityk Zuzi a'e ma'e'a'yr happy haw wà no. Tuwhiweté Manaxe uzapo mokoz ma'e'a'yr happy haw Tupàn Hàpuzuhu huwakea'i katu pe a'e, wikuwe mehe a'e. Zuzi weityk a'e ma'e a'e wà no. Uzaikaikaw ywyàpyznaw Xenorom her ma'e pe heityk pà.

**13** Umuaiw Zuzi amo ma'e'a'yr happy haw no. Tuwhiweté Xàrumàw uzapo a'e ma'e'a'yr happy haw wikuwe mehe. Zeruzarez huwake kwarahy hemaw kutyr hin. Ywytyr uri tyw her ma'e huwake kwarahy hemaw awyze har kutyr har kutyr hin. Teko umuwete Atarot tupàn kuzà Xítom pe har wazar iaiw ma'e a'e pe a'e wà. Umuwete Kemoz Moaw wazar a'e pe wà no. Umuwete Morok Amon wazar iro

ma'e a'e pe wà no. Umuaiw Zuzi wamuwete haw. **14** Ukauka Zuzi ita aiha ma'e tupàn a'ua'u hagapaw a'e wà. Weityk ywyra iaiha ma'e tupàn a'ua'u hagapaw a'e wà no. Upyhyk teko wàkàgwer tetea'u kury. Upyupyk a'e ma'e wypyta awer a'e kagwer pupe a'e.

**15** Kwehe mehe, a'e 'ym mehe, tuwhiweté Zeromoàw Nemat ta'yr uzapo amo tupàn a'ua'u wamuwete haw Metew tawhu pe. Uzapo kar ikatu 'ym ma'e teko wanupe a'e pe. Umuaiw Zuzi a'e tupàn a'ua'u wamuwete haw. Weityk ma'e'a'yr happy haw. Ukauka ita hehe arer ipegegwer romo. Umu'imü'i a'e ita pehegwer ywy ku'i kwer romo iapo pà. Wapy ywyra aiha ma'e tata pupe no. **16** Na'e Zuzi uzareko kury. Wexak amo teko wanetekwer watym awer ywytyr rehe. — Pepyro wakàgwer a'e wi nehe, i'i zauxiapékwer wanupe. Weruzar ize'eg, wakàgwer herur pà izupe. Na'e tuwhiweté Zuzi wapy a'e kagwer paw a'e ma'e'a'yr happy haw rehe. A'e ma'e iapo mehe umuaiw a'e ma'e'a'yr happy haw. Na'ikatu kwaw ma'e'a'yr happy haw romo kury, i'i teko wà. Amo Tupàn ze'eg imume'u har umume'u a'e ma'e izeapo ma'e ràm a'e, kwehe mehe a'e, Zeromoàw a'e pe heko mehe mynykawhu pe heko mehe a'e. Uzareko wi tuwhiweté Zuzi kury. Wexak Tupàn ze'eg imume'u har a'e ma'e imume'u arer hetekwer itym awer a'e pe kury. **17** Upuranu tuwhiweté teko wanehe. — Mo hetekwer itym awer 'aw a'e, i'i wanupe. Teko Metew pe har uwazar ize'eg izupe wà. — Tupàn ze'eg imume'u har Zuta ywy wi uhem ma'e kwer hetekwer itym awer a'e. Umume'u 'ág ma'e'a'yr happy haw pe uezapo ma'e ràm a'e. Ne erenumaw a'e ma'e iapo haw kwez kury, hemimume'u kwer kwez kury, i'i izupe wà.

**18** — Tuwe nezewé nehe. Penuhem zo ikagwer nehe, i'i wanupe. Nezewé ikagwer upyta a'e pe Tupàn ze'eg imume'u har Xamari wi ur ma'e kwer kagwer rehe we.

**19** Oho Zuzi tawhu Izaew ywy rehe har nànàñ. Weityk tupàn a'ua'u wamuwete haw upaw rupi. Izaew wanuwhiweté uzapo a'e ma'e a'e 'ym mehe a'e wà. Pema'enukwaw ma'e'a'yr happy haw Metew pe har pe

hemiaipo kwer rehe. Uzapo nezewegatete haw amogwer ma'ea'yr hapy haw nànàn no. **20** A'e 'ym mehe xaxeto uzuka ma'ea'yr tupàn a'ua'u wanupe. Na'e Zuzi uzuka a'e xaxeto a'e ma'ea'yr hapy haw rehe pitàitâigatu wà kury. Umunyk tata teko kagwer rehe a'e ma'ea'yr hapy haw nànàn no. A'e re uzewyr Zeruzarez pe kury.

### *Pakuwa mynykawhu*

**21** — Pezapo mynykawhu zaneipy Ezit wi wahem awer rehe pema'enukwaw pà nehe, Tupàn Tuweharupi Wiko Ma'e imuweste katu pà nehe. Ta'e nezewe a'e Tupàn ze'eg kwehe arer uzapo kar zanewe a'e xe. **22** Kwehe mehe a'e pureruze'egar wiko Izaew izuapyapyr wanuwhaw wà. A'e 'ar henataromo uzapo agwer mynykaw wà. Mynykawhu Zuzi hemiaipo kwer uhua'u wera'u amogwer Izaew wanuwhawete Zuta wanuwhawete wanemiapo kwer wanuwi upaw rupi katete a'e. **23** Zuzi Zuta wanuwhawete romo wiko mehe 18 haw kwarahy rehe uzapo a'e mynykawhu zaneipy Ezit wi wahem awer her ma'e wà. Umuwete katu Tupàn Tuweharupi Wiko Ma'e a'e mynykawhu iapo mehe wà, Zeruzarez pe wà.

### *Amo Zuzi hemiaipo kwer no*

**24** Tuwhawete Zuzi ipureruzar wer Tupàn ze'eg a'e pape Iwki xaxeto wanuwhawete tåpuzuhu pe hemixak kwer rehe har rehe a'e. A'e rupi umuhem kar tekwe ikatu 'ym ma'e pe uze'eg ma'e paw Zeruzarez wi a'e wà. Umuhem kar Zuta ywy nànàn no. Omono kar ma'e uzeapo ma'e ràm ikwaw pyr 'ym imume'u har a'e wi wà no. Weityk kar tupàn a'ua'u teko wanàpu me har paw wà, tupàn a'ua'u hagapaw wà no. Wyzaì tupàn a'ua'u wamuweste haw umuhem kar a'e wi. **25** A'e 'ym mehe naheta kwaw amo tuwhawete izàwenugar wà. Weruze'egatu tuwe Tupàn Tuweharupi Wiko Ma'e upy'a pupe, uma'enukwaw pupe no, ukàgaw pupe no. Weruzar Tupàn ze'eg Moizez pe imur pyrer paw oho iko. Imàno

re nuvezak kar pixik kwaw amo tuwhawete Zuzi izàwenugar wà no.

**26** Tupàn Tuweharupi Wiko Ma'e wikwahy we Zuta wanehe, ta'e tuwhawete Manaxe hemiaipo kwer a'e 'ar 'ym mehe arer iaiw tuwe a'e wà xe. Nupytu'u kwaw ikwahy haw izuwi a'e rihi. **27** Na'e uze'eg Tupàn Tuweharupi Wiko Ma'e kury. — Azapo kar ikatu 'ym ma'e Izaew wanupe kwehe mehe ihe. Azapo kar putar ikatu 'ym ma'e Zuta wanupe nezewegatete nehe no. Amuhem kar putar Zuta izuapyapyr herenatar wi ihe wà nehe. Apuir putar Zeruzarez wi. Kwehe mehe aexaexak a'e tawhu ihe. Apuir putar heràpuzuhu wi ihe nehe no. — Hemuwete katu a'e pe nehe, a'e teko wanupe. Atyryk putar izuwi ihe nehe kury, i'i Tupàn uzeupe.

### *Zuzi hemiaipo kwer*

**28** Amo umuapyk tuwhawete Zuzi hemiaipo kwer paw a'e pape Zuta wanuwhawete wanemiapo kwer her ma'e rehe nehe. **29** Zuzi tuwhawete romo heko mehe Parao Nek Ezit ywy rehe har wanuwhaw weraha zauxiapekwer tete'a'u Ewparat yrykaw pe Axir wanuwhawete ipytywà pà. Uhem tuwhawete Zuzi tuwhawete Nek iàmàtyry'ym pà Mezin pe. Zauxiapekwer wazeàmàtyry'ym mehe we amo uzuka tuwhawete Zuzi a'e wà. **30** Amogwer tuwhaw Zuzi rehe we arer omono hetekwer wyramawa pupe wà, Zeruzarez pe heruzewyr pà wà. Utym hetekwer utym àwàm pupe wà. Teko Zuta ywy rehe har wexaexak Zoakaz Zuzi ta'yr wà kury. Uzakook uri kawer hehe tuwhawete romo imuigo kar pà tu hekuzaromo wà.

### *Zoakaz wiko Zuta wanuwhawete romo*

**31** Zoakaz wereko 23 kwarahy Zuta wanuwhawete romo wiko mehe. Umumaw na'iruz zahy Zeruzarez pe tuwhawete romo wiko pà. Amutaw ihy her romo a'e. Zeremi tazyr romo hekon. Irimina tawhu parer romo hekon. **32** Nuzawy kwaw Zoakaz wipy wà. Uzapo ikatu 'ym ma'e. Hemiaipo kwer na'ikatu kwaw Tupàn Tuweharupi Wiko Ma'e pe.

**33** Tuwihawete Nek upyhyk kar Zoakaz zauxiapekwér wanupe Himina tawhu pe heko mehe. Hamat ywy rehe tuz. Upyhyk wà. A'e rupi upytu'u tuwihawete romo wiko re kury. Tuwihawete Nek wenoz temetarer tetea'u Zuta wanupe kury. Itaxig parat 3.400 kir. Itazu or 34 kir no. **34** Parao Nek umuigo kar Eriaki Zuzi ta'yur Zuta wanuwiwahete romo a'e kury, tu Zuzi hekuzaromo a'e kury. Omono amo ae her izupe kury. — Zeoaki, i'l izupe kury. Tuwihawete Nek weraha Zoakaz Ezit ywy pe. Umàno Zoakaz a'e pe.

### **Zeoaki wiko Zuta wanuwiwahete romo**

**35** Wenoz tuwihawete Zeoaki temetarer teko wanupe. Aze amo hemetarer katu a'e, wenoz temetarer tetea'u izupe. Aze amo wereko xo måràn temetarer zo a'e, xo temetarer pixika'i ma'e wenoz izupe. Ezit wanuwiwahete wenoz temetarer tetea'u Zeoaki pe. A'e rupi Zeoaki wenoz temetarer tetea'u teko wanupe. Omono'ono'og itaxig itazu inuromo izupe imono pà.

**36** Wereko Zeoaki 25 kwarahy Zuta wanuwiwahete romo wiko mehe. Umumaw 11 kwarahy Zeruzarez pe tuwihawete wiko pà. Zemina ihy her romo a'e. Penai tazyr romo hekon. Huma tawhu parer romo hekon. **37** Nuzawy kwaw Zeoaki wàmuzgwer wà. Uzapo ikatu 'ym ma'e. Hemiaipo kwer na'ikatu kwaw Tupàn Tuweharupi Wiko Ma'e pe.

**24** <sup>1</sup>Zeoaki tuwihawete romo heko mehe Mawiron wanuwiwahete Namukononozor her ma'e ur Zuta ywy rehe a'e pe har wàmàtyry'ym pà kury. Umumaw na'iruz kwarahy Zeoaki izar romo wiko pà. A'e re Zeoaki upytu'u hemiruze'eg romo wiko re. Nuweruzar kwaw ize'eg. Nomono kwaw temetarer izupe.

**2** Tupàn Tuweharupi Wiko Ma'e ipurumumaw wer Zuta wanehe. A'e rupi uzapo ma'e uze'eg kwehe arer rupi katete. Kwehe mehe umume'u wemiapo ràm wemiruze'eg wanupe, uze'eg imume'u har wanupe no. A'e rupi omono kar zauxiapekwér tetea'u Zuta wakutyr wà kury. Zauxiapekwér Mawiron ywy rehe har wà, zauxiapekwér Xir

ywy rehe har wà no, zauxiapekwér Moaw izuapyapyr wà no, zauxiapekwér Amon izuapyapyr wà no. **3** Tupàn Tuweharupi Wiko Ma'e uzapo kar a'e ma'e Zuta wanupe. Ta'e ipurumuhem kar wer Zuta ywy rehe har wanehe uwa wi a'e xe, tuwihawete Manaxe hemiaipo kwer iaiw ma'e rehe a'e xe. **4** Wikuwe mehe uzuka teko ikatu 'ym ma'e iapo 'ymar tetea'u a'e wà. Tupàn Tuweharupi Wiko Ma'e na'ipurumunàn wer kwaw wazuka awer rehe Manaxe wi a'e. Naheharaz wer kwaw hemiaipo kwer wi.

**5** Amo umume'u Zeoaki hemiaipo kwer paw a'e pape Zuta wanuwiwah wanemaiopo kwer her ma'e rehe. **6** Umàno Zeoaki kury. Ta'yur Zoaki wiko tuwihawete romo hekuzaromo.

**7** Ezit ywy rehe har nuhem pixik kwaw uiwy wi zauxiapekwér wanupi a'e 'ar ire a'e. Ta'e Mawiron wanuwiwahete upyro ywy Ezit wanuwiwahete hemipyhyk kwer paw izuwi a'e wà xe. Uzypyrog ywy ipyro pà izuwi Ewparat yrykaw pe. Upyro ywy oho iko te Ezit ywyaw kwarahy heixe haw awyze har kutyr har pe no.

### **Weraha tuwihawete Zoaki Mawiron pe wà**

**8** Wereko Zoaki 18 kwarahy Zuta wanuwiwahete romo wiko mehe. Umumaw na'iruz zahy Zeruzarez pe tuwihawete romo wiko pà. Neu ihy her romo a'e. Ewnàtà tazyr romo hekon. Zeruzarez pe har romo hekon. **9** Nuzawy kwaw Zoaki u a'e. Uzapo ikatu 'ym ma'e oho iko. Hemiaipo kwer na'ikatu kwaw Tupàn Tuweharupi Wiko Ma'e pe.

**10** Zoaki tuwihawete heko mehe zauxiapekwér Mawiron ywy rehe har ur Zeruzarez kutyr a'e wà. Tuwihaw tuwihawete Namukononozor rehe we har werur a'e zauxiapekwér wà. Umàmàn Zeruzarez izywyr wà. **11** Zauxiapekwér tawhu izywyr waneko mehe we tuwihawete Namukononozor a'e ae oho a'e pe a'e kury. **12** Tuwihawete Zoaki a'e, ihy a'e no, ta'yur a'e wà no, tuwihaw hehe we har a'e wà no, paw rupi katete uzemono Mawiron wanuwiwahete pe wà. Tuwihawete romo wiko mehe 8 haw

kwarahy rehe Namukononozor weraha Zoaki a'e wi wemipyhyk kwer romo.

**13** Weraha temetarer Tupàn Hápuzuhu pe har paw Mawiron pe a'e no, tuwiaw hápuzuhu pe har paw heraha pà a'e no. Uzeapo ma'e Tupàn Tuweharupi Wiko Ma'e ze'eg rupi katete. Namukononozor uhauhaw ma'e or iapo pyrer Xárumàw hemiapo kwer paw a'e, Tupàn Hápuzuhu pupe har paw a'e. **14** Weraha teko Zeruzarez pe har paw wemipyhyk kwer romo wà. Tuwiaw paw wà, teko hemetarer katu ma'e paw wà no, teko ikàg ma'e paw wà no. Weraha 10 miw teko weko haw pe wà. Weraha ma'e iapo haw kwaw par paw wà no. Weraha itaper imupyrànar kwaw par paw wà no. Xo hemetarer pixik 'ym ma'e zo wezar Zuta ywy rehe wà.

**15** Namukononozor weraha Zoaki Mawiron pe wemimunehew kwer romo. Weraha iànam uezupi wà no. Ihy, hemireko wà, tuwiaw hehe we har wà, Zuta rehe har ikàg wera'u ma'e wà. **16** Namukononozor omono kar awa ikàg wera'u ma'e paw rupi Mawiron pe wà. Heta 7 miw wà. Weraha miw ma'e iapo haw kwaw paw itaper imupyrànar wanehe we wà no. A'e awa paw ukwaw zeàmàtyry'ymawhu wà.

**17** Na'e Namukononozor umuigo kar Matani Zoaki itutyr Zuta rehe upyta ma'e wanuwhawete romo kury. Omono amo ae her izupe. Zeneki her pyahu romo kury.

#### **Zeneki wiko Zuta wanuwhawete romo**

**18** Wereko Zeneki 21 kwarahy Zuta wanuwhawete romo wiko mehe. Umumaw 11 kwarahy Zeruzarez pe tuwiawete romo wiko pà. Amutaw ihy her romo a'e. Zeremi tazyr romo hekon. Irimina tawhu parer romo hekon. **19** Tuwiawete Zeneki uzapo ikatu 'ym ma'e oho iko. Hemiaopi kwer na'ikatu kwaw Tupàn Tuweharupi Wiko Ma'e pe. Nuzawy kwaw tuwiawete Zoaki a'e. **20** Wikwahy tuwe Tupàn Tuweharupi Wiko Ma'e teko Zeruzarez pe har wanehe kury, Zuta ywy rehe har wanehe no. A'e rupi uthyrik wanuwi wamono kar pà uzenataromo wà kury.

#### **Mawiron zauxiapekwer weityk Zeruzarez wà**

**25** <sup>1</sup>Zeneki nuputar kwaw Mawiron wanuwhawete Namukononozor uzar romo kury. A'e rupi ur Namukononozor zauxiapekwer tetea'u wanupi Zeruzarez iàmàtyry'ym pà kury. Zeneki tuwiawete romo heko mehe 9 haw kwarahy rehe 10 haw zahy rehe 10 haw 'ar mehe uhem tawhu pe wà. Uzapo uker haw tawhu izywyr wà. Uzapo pyropyroga pàrirogaw rehe uezupir àwàm romo wà, tawhu izywyr wà. **2** Umumaw mokoz kwarahy umàmànar imuàgà'ym pà wà. Zeneki tuwiawete romo heko mehe we 11 haw kwarahy rehe umumaw iapo haw wà. **3** A'e kwarahy rehe 4 haw zahy rehe 9 haw 'ar mehe, tawhu pe har wama'uhez katu mehe, temi'u heta 'ym mehe, **4** Mawiron waxaw pàrirogaw wà kury. Heta tetea'u zauxiapekwer tawhu izywyr wà. Nezewa rehe we zauxiapekwer Izaew uhem a'e wi pyhaw uzàn pà wà. Mawiron nuexak kwaw wà. Uhem pe tuwiawete ima'e tymaw piar rupi wà. Uhem oho ukenaw mokoz pàrirogaw wamyter pe har rupi wà. Uzàn oho uthyrik Zotàw kutyr wà. **5** Zauxiapekwer Mawiron oho tuwiawete Zeneki haikweromo wà. Uhem huwake ywytyr heta 'ymaw Zeriko huwake har pe heko mehe wà. Zauxiapekwer Zeneki rehe we har paw wezar uzar wà. **6** Zauxiapekwer Mawiron pe har upyhyk Zeneki wà kury. Weraha Mawiron uwihawete pe wà. Himina tawhu pe hekon Mawiron wanuwhawete a'e 'ar mehe. Na'e Namukononozor umume'u Zeneki pe wemiaopi kàràm izupe a'e pe kury. **7** Uzuka ta'yur henataromo wà. A'e re Namukononozor ukutuk kar Zeneki reha zauxiapekwer wanupe. Na'e umunehew kyhàhàmtà morog iapo pyrer pupe wà. A'e re weraha Mawiron pe wà.

#### **Namukononozor umunyktata Tupàn Hápuzuhu rehe**

**8** Namukononozor Mawiron wanuwhawete romo wiko mehe 19 haw kwarahy rehe 5 haw zahy rehe 7 haw 'ar mehe tuwiawete ipytywà

har Nemuzàràñà her ma'e a'e, zauxiapékwer paw wanuwihaw a'e, wixe Zeruzarez tawhu pupe kury. **9** Umunyk tata Tupàn Hàpuzuhu rehé. Umunyk tata tuwihawete hàpuzuhu rehé no. Umunyk tata amogwer tuwihaw wanàpuz nànàñ no. **10** Zauxiapékwer weityk pàrirogaw tawhu izywyr har paw wà. **11** Na'e Nemuzàràñà weraha a'e tawhu pe hezar pyrer paw Mawiron pe wà kury. Weraha amogwer uma'erekò ma'e ma'e iapo haw kwaw katu har, Mawiron wamyrypar romo paw wà no. **12** Wezár amo teko hemetarer 'ym ma'e Zuta rehé wà. Umumá'erekò kar uwà tyw pe wà, ko pe wà no.

**13** Zauxiapékwer Mawiron ukauka Tupàn Hàpuzuhu izita itazu morog iapo pyrer wà. Ukauka ywyramawa wà no. Ukauka zahakaw itazu morog iapo pyrer wà no. Na'e weraha a'e itazu morog paw Mawiron pe wà. **14** Weraha amogwer tàpuzuhu pe har a'e wi wà no. Ywy imomor haw, tátapyzgwer ma'ea'y happy haw rehé har hyru no, zepinaw incemo tatainý pupe har imonohokaw no, zapopew yhyk ikaz taw no, amogwer ma'e itazu morog iapo pyrer tàpuzuhu pe har paw no. **15** Nemuzàràñà weraha ma'e parat iapo pyrer or iapo pyrer paw uezupi. Kawaw pixikal'i, kawaw tátapyzgwer imono'ogaw no. **16** Kwehe mehe tuwihawete Xàrumàw uzapo kar ma'e tete'a'u Tupàn Hàpuzuhu pupe imonokatu pà. A'e mokoz izita itazu morog iapo pyrer, ywyrapew, zahakawhu. Ipuhuz katu wera'u a'e ma'e. A'e rupi teko nupuner kwaw ipuhuz taw hagaw paw rehé wà. **17** Amo izita nuzawy kwaw inugwer. Heta 8 met waiha katu haw. Heta iaapeao haw ywate. Heta 1,30 met a'e iaapeao haw iaiha haw. Iaapeao haw nànàñ heta imupuràgete haw. Heta ma'e a kwer homà her ma'e hagapaw iaapeao haw nànàñ no.

### Zauxiapékwer weraha

#### Zuta ywy rehe har Mawiron pe wà

**18** Nemuzàràñà zauxiapékwer Mawiron wanuwihaw a'e, weraha amo ae teko wemimunehew kwer romo wà no. Xerai xaxeto wanuwihawete, Xoponi no, amogwer na'iruz tuwihaw Tupàn Hàpuzuhu

pe har wà no, **19** zauxiapékwer tawhu pe har wanuwihaw no, tuwihawete ipytywà har a'e pe wikuwe ma'e wà no, awa zauxiapékwer wamono'ogar no, amo 60 awa ikàg ma'e wà no. **20** Nemuzàràñà weraha a'e teko paw Mawiron wanuwihawete pe wà. Himina tawhu pe hekon tuwihawete. **21** Amat ywy rehé tuz. A'e pe wahem mehe tuwihawete upetepetek kar a'e teko paw zauxiapékwer wanupe wà kury. Na'e uzuka kar wà no. Nezewe zauxiapékwer amo ae ywy rehé har weraha Zuta ywy rehé har waiwy wi wemimunehew kwer romo wà.

### Zenari wiko Zuta wanuwihaw romo

**22** Na'e Mawiron wanuwihawete Namukononozor her ma'e umuigo kar Zenari Àikà ta'yr Xàpà hemimino Zuta ywy rehé wanuwihaw romo kury. — Eruze'eg teko Mawiron pe oho 'ym ma'e kwer paw ne wà nehe, i'i izupe. **23** Amo Izaew wanuwihaw wà, amo zauxiapékwer wà no, nuzemono kar kwaw Mawiron wanupe wà. A'e teko ukwaw Zenari tuwihaw romo weko awer wà kury. A'e rupi uze'eg oho izupe Mipa pe wà kury. Na'aw tuwihaw waner xe wà: Izimaew Netani ta'yr Zoàñà Karea tazyr, Xerai Tanumet ta'yr Neto tawhu pe har, Zazani Maaka pe har. **24** Uze'eg Zenari a'e tuwihaw wanupe. — Azeharomoete ko heze'eg kury. Pekyze zo Mawiron wanuwihaw wanuwi nehe. Pepyta ko ywy rehé peneko pà nehe. Pema'erekò Mawiron wanuwihawete pe nehe. Peneko àwàm ikatu putar peme nezewe mehe nehe, i'i wanupe.

**25** Nezewe rehé we a'e kwarahy rehé 7 haw zahy rehé Izimaew Netani ta'yr Erizàm hemimino a'e, tuwihawete iàñàm romo wiko ma'e a'e, oho Mipa pe 10 awa wanupi kury. Uzàmàtyr'y'm Zenari oho wà. Uzuka wà. Amo Izaew wiko a'e pe ipyr wà no. Izimaew uzuka a'e teko a'e wà no. **26** Na'e Izaew paw wà, ikàg ma'e wà, ikàg 'ym ma'e wà no, uehm a'e ywy wi zauxiapékwer wanuwihaw wanupi wà kury. Oho Ezit ywy rehé wà. Ta'e ukyze Mawiron ywy rehé har wanuwi a'e wà kury xe.

**Tuwihawete umuhem  
kar Zoaki zemunehew paw wi**

**27** Amo kwarahy rehe Emiw-Meronak wiko Mawiron wanuwhawete romo a'e kury. Ikatu Zuta wanuwhawete Zoaki pe a'e. Umuhem kar zemunehew paw wi kury. Ummumaw Zoaki 37 kwarahy 11 zahy 27 'ar zemunehew paw pe wiko pà. Na'e tuwhawete umuhem kar zemunehew paw wi. **28** Ewimeronak ikatu Zoaki pe. Umuigo

kar wi tuwhawete romo uzehe we. Na'e Zoaki ikàg wera'u amogwer tuwhawete Mawiron pe imunehew pyrer wanuwi a'e kury.

**29** Wenuhem kar ikamir zemunehew pe imunehew pyrer wà kury. Umunehew ukamirpuku ikatu ma'e kury. Umai'u tuwhawete rehe we u'ar nànà no.

**30** Tuweharupi hekuwe mehe tuwhawete omono temetarer izupe ima'e hekuzar ràm romo no.

# 1 WAMUME'U AWER

**Ànàw izuapyapyr wà**

**1** Heta amo Ànàw ta'yrs Xet her ma'e izupe a'e. Heta amo Xet ta'yrs Enok her ma'e izupe a'e. Heta amo Enok ta'yrs Kàinà her ma'e izupe a'e. **2** Heta amo Kàinà ta'yrs Maararew her ma'e izupe a'e. Heta amo Maararew ta'yrs Zare her ma'e izupe. **3** Heta amo Zare ta'yrs Enok her ma'e izupe. Heta amo Enok ta'yrs Matuzarez her ma'e izupe. Heta amo Matuzarez ta'yrs Aramek her ma'e izupe. **4** Heta amo Aramek ta'yrs Noe her ma'e izupe. Heta na'iruz ta'yrs Noe pe: Xem, Kàm, Zape waner romo wà.

**Noe ta'yrs wazuapyapyr wà**

**5** Zape ta'yrs waner wà: Komer, Makok, Manaz, Zàwà, Tumaw, Mezek, Xiraz. Pitàitáigatu wiko teko tetea'u wanu romo wà. Wazuapyapyr wereko u her pitàitáigatu wà no. **6** Na'aw Komer izuapyapyr waner xe wà kury: Akenaz, Hipat, Togarimà. **7** Na'aw Zàwà izuapyapyr waner xe wà: Eriza, Epàn ywy rehe har wà, Xip ywy rehe har wà, Hoz ywy rehe har wà.

**8** Na'aw Kàm izuapyapyr waner xe wà kury: Kuxi, Ezit, Irim, Kànàà. **9** Wazuapyapyr wereko u her wà no. Na'aw Kuxi izuapyapyr waner xe wà kury: Xewa, Awira, Xawita, Hama, Xatek. Wazuapyapyr weraha u her wà no. Na'aw Hama izuapyapyr waner xe wà kury: Zawa, Nenà. Wazuapyapyr weraha u

her wà no. **10** Heta amo Kuxi ta'yrs Nihoz her ma'e izupe. Niniroz wiko ywy tetea'u rehe har wanuwhawete romo a'e, wanuwhawete waneityk pà a'e. **11** Na'aw Ezit izuapyapyr waner xe wà kury: Irim, Anam, Ereaw, Napitu, **12** Paturu, Kaziru, Kereta. (Piri ywy rehe har wiko Kereta izuapyapyr romo a'e wà). **13** Na'aw Kànàà izuapyapyr waner xe wà kury: Xitom tyky'yr romo hekon. Ete wiko tywyr romo. Wazuapyapyr weraha u her wà no. **14** Kànàà wiko teko tetea'u waipy romo a'e. Na'aw a'e teko waner xe wà kury: Zepu izuapyapyr wà, Amohe ywy rehe har wà, Zirikaze izuapyapyr wà, **15** Ewe izuapyapyr wà, Araki izuapyapyr wà, Xine izuapyapyr wà, **16** Ariwaxi izuapyapyr wà, Zemar izuapyapyr wà, Amat izuapyapyr wà. **17** Na'aw Xem ta'yrs waner xe wà kury: Èràw, Axur, Arapaxaz, Iruz, Àrà, Uz, Ur, Zeter, Mezek. Wazuapyapyr weraha u her wà no. **18** Heta Arapaxaz ta'yrs Xera her ma'e izupe. Heta amo Xera ta'yrs Emer her ma'e izupe a'e. **19** Heta mokoz ta'yrs Emer pe wà: Pereg tyky'yr her romo a'e, ta'e i'ar rehe teko ywy rehe har uzemuza'aza'ak kar a'e wà xe. Zemuza'aza'ak kar haw i'l her zaneze'eg rupi. Zokità tywyr her romo a'e. **20** Na'aw Zokità izuapyapyr waner xe wà: Awmona, Xerew, Azar-Mawe, Zer, **21** Anoniràw, Uzaw, Nikira, **22** Omaw, Amimaew, Xama, **23** Opir, Awira, Zoaw.